

Yanj nihánj taj xna'anj daj qui'yaj nij apóstol cune' Jesucristó man nata' se nana so' rihaan yuvii a

Nana nihánj taj xna'anj daj ca'mii Jesucristó rihaan nij apóstol cune' so' man nata' se nana so' rihaan yuvii gaa ataa quinan' Jesucristó xta' a

¹⁻² Dan me se yanj ca'née 'unj rihaan so' asij rque me se rihaan yo' cachrón 'unj nana che'é nu' se vaa qui'yaj Jesucristó do', che'é nu' nana tucu'yón Jesucristó do', asij tacoo, ndaa se quinan' so' xta', qui'yaj Diosé a. Dan me se asino ca'ne' so' suun rihaan nij apóstol cune' so' man nata' se nana so' rihaan yuvii, ndaa vaa cataj Nimán Diosé rihaan so', gaa ne quinan' so' xta', ne dan me se nu' nana che'é yo' me cachronj rihaan yanj ca'néj rihaan so', Teófilo.

³ Dan me se gaa quisíj cavi' Jesucristó rihaan rcutze, gaa ne guun que'ee tihaan so' man so' rihaan nij apóstol yo', che'é rej guun ya rá nij so' se vaa ya cunuu i'na' uún so' a. Dan me se vij chihaa ya güii quene'en nij apóstol man so', ne ca'mii ndo'o so' ga nij apóstol che'é rej guun chij Diosé rihaan chumii nihánj a.

⁴ Ne gaa vaj so' ga nij apóstol, ne cataj xna'anj so' rihaan nij so' se vaa:

—Yo'o cumán soj chuman' Jerusalén nihánj, ne se cavii soj ca'anj soj ma'. Maan se na'vij soj ca'na'

se vaa cata' tu'va Réj Diose se vaa rque so' man soj, ndaa vaa cataj xna'anj ma'anj rihaan soj a.

⁵ O se Juan ro', me sí cuta' ne man yuvi na uun, ne xa' soj, tzaj ne ma'an Nimán Diose catuu nimán soj rque doj güii adonj —taj Jesucristó rihaan nij apóstol cune' so' man nata' se nana so' rihaan yuvi a.

⁶ Ne dan me se cunuu chre' nij apóstol rihaan Jesucristó, ne xná'anj nij so' man Jesucristó a:

—Ne yaj me se guun chij úun ní' sij israelitá rihaan chiháan ní', qui'yáa so' na'. Cataj so' rihaan núj, Señor —taj nij so' rihaan Jesucristó a.

⁷ Tzaj ne cataj Jesucristó rihaan nij so' a:

—Diose ro', me sí no xcúun cachron güii qui'yaj so' se vaa qui'yaj so' ei. Nuveé se suun soj me suun yo' ma'.

⁸ Tzaj ne asa' catúj Nimán Diose nimán soj, ne quirí' ndo'o soj rej nucuaj, gaa ne guun soj sí nata' se nanaj rihaan yuvi adonj. Dan me se nu' chuman' Jerusalén do', nu' estadó Judea do', ndaa chuman' Samaria do', ca'vee se ndaa chuman' gan' doj naj rihaan chumij nihánj, tzaj ne ca'anj soj nata' soj se nanaj adonj —taj Jesucristó rihaan nij so' a.

⁹ Dan me se quisíj ca'mii Jesucristó danj rihaan nij so', gaa ne ni'yaj nij so' man so', ne dan me se cavii so' xta', qui'yaj Diose, ne catúj so' rque ngaa, ne ne ca'vee quene'en nij so' man so' a ma'.

¹⁰ Dan me se ni'yaj uxrá nij apóstol rej xta' rej vaj Jesucristó, tzaj ne ne ne'en nij so' daj guun, ne aj nicun' vij sí nuu yatzíj catzii x'núú nij so' nanj ei.

¹¹ Gaa ne cataj roj snó'o yo' a:

—Me che'é yo'ō nicun' soj sij cavii estadó Galilea ni'yaj soj xta' ga. Jesucristó me se ne'en soj se vaa cavii so' quinan' so' xta', qui'yaj Diose, ne ase vaa cavii so' xta' ro', danj qui'yaj uún so' nanij so' ca'na' so' rihaan chumiñ nihánj adonj —taj roj sí nuu yatzíj catziñ rihaan nij apóstol yo' a.

Nana nihánj taj xna'anj daj qui'yaj nii gaa narii nii 'o sí nayon rihaan sí cu'naj Judas a

¹² Dan me se tanáj nij apóstol quij cu'naj Quij man Chruun Olivó, ne ca'anj nij so', ne namán uún nij so' chuman' Jerusalén a. Dan me se 'o kilómetro ca'anj nij so',

¹³ ne gaa catúj nij so' chuman', ne cavii nij so' xta' ve' tucúa nij so' ve' nata' a. Ne nij so' ro', me Pedró do', Juan do', Jacobo do', Andrés do', Felipe do', Tomás do', Bartolomé do', Mateo do', Jacobo ta'núí Alfeo do', Simón sí guun tuvi' ga nij sí me rá cunu' ga gobiernó man Romá do', Judas tinúú Jacobo do' a.

¹⁴ Dan me se yo'ō vaa rá taran' nij so', ne yo'ō achíín ni'yaj nij so' rihaan Diose a. Danj qui'yaj nij so' ga nij chana do', ga Mariá nii Jesucristó do', ga nij tinúú Jesucristó do' a.

¹⁵ Ne güii dan me se canicun' Pedró tanuu nij tinuj nij so', ne ca'mii so' rihaan nij so' a. Dan me se cientó táá 'ó ico yuviñ me nij yuviñ cunuu chre' rej man nij so' a.

¹⁶ Dan me se cataj Pedró rihaan nij so' a:

—Aj quisíj ya nu' nana no rihaan danj Diose nana rqué Nimán Diose ca'mii sí cu'naj David nana a'mii che'é sí cu'naj Judas, tinuj, nocoj. Ne dan me se ya ya guun so' sí racuíj man nij sí

quita'aa man Jesucristó se vaa ca'vee nari' nij so' man Jesucristó, qui'yaj Judas a.

17 Ne yo'o tuvi' núj apóstol guun so', ne cata so' se suun núj a.

18 "Dan me se nicaj so' sa'anj cacun' qui'yaj canaán ma'an so', ne quiri' so' 'o yo'óo, qui'yaj yo' a. Gaa ne dan me se naxru' so' rihaan yo'óo, ne canuu rque so', ne cavii xri' so' cayuu yo' rihaan yo'óo a.

19 Ne nihánj me nana cachén nu' rque chuman' Jerusalén, ne che'é dan tucu'náj nij síj man Jerusalén Acéldama man yo'óo yo' a —taj Pedró rihaan nij so', ne nana Acéldama ro', me se xna'anj nij so', ne nana yo' taj Yo'óo Ton a. Dan me se cataj uún Pedró—

20 'O se rihaan yanj chra' nó nana taj se vaa: "Cunuu tacaan rej cane so', ne se cayáán a doj yuviij rej yo' ma'", taj yanj chra' yo', ne taj uún yo': "Se suun so' ro', nacaj yo'ó so' á", taj uún yanj yo' a.

21-22 "Che'é dan vaa che'é cata yo'ó tinúú ní suun ga núj se vaa nata' so' rihaan yuviij se vaa ya cunuu i'na' uún Jesucristó, ndaa vaa 'yaj núj a. Tzaj ne inanj síj chéé ga núj sij apóstol gaa vaj Jesucristó ga núj me síj no xcúún cata suun yo' a. Dan me se síj quene'en asij cuta' ne Juan man Jesucristó ndaa se cavii Jesucristó xta' qui'yaj Diose do', me síj no xcúún guun tuvi' núj sij apóstol adonj —taj Pedró rihaan cunudanj nij síj cunuu chre' a.

23 Gaa ne dan me se narii nij so' man vij snó'o, ne yo'o so' ro', me síj cu'naj José, ne Barsabás cu'naj

uún so', ne Justo tucu'náj nii man so' a. Ne yo'ó so' ro', me sí cu'naj Matías a.

²⁴ Gaa ne cachín ni'yaj taran' nij so' rihaan Diose, cataj nij so':

—Ne'én so' daj vaa nimán cunudanj yuvij, Señor. Che'é dan tijaán so' me roj tuvi' sí nihánj narii so'

²⁵ se vaa cata so' suun nihánj ne guun so' apóstol nata' se nana Jesucristó rihaan yuvij a. 'O se ca'anj yaníj sí cu'naj Judas, tanáj xco so' suun nihánj, ne ca'anj so' ndaa rej no xcúún so' ca'anj so' a —taj nij yuvij, cachín ni'yaj nij yuvij rihaan Diose a.

²⁶ Gaa ne tico tixaj nij so' me roj so' qui'yaj canaán, ne sí cu'naj Matías me sí qui'yaj canaán, ne che'é dan guun tuvi' so' ga yo'ó xaan nij apóstol cune' Jesucristó man nata' se nana so' rihaan cunudanj nij yuvij man rihaan chumij a.

2

Nana nihánj taj xna'anj se vaa ca'na' Nimán Diose rihaan nij sí noco' man Jesucristó a

¹ Dan me se cachén cha'anj pascuá, ne cachén yavíj chihaa chij güii, ne quisíj cha'anj Pentecostés a. Ne güii dan me se cunuu chre' cunudanj nij sí noco' man Jesucristó rá 'o ve',

² ne taj ni'yón cuno taran' nij sí ne rá ve' se vaa nayuu rá ve', ne daj se uun rá' unó' nana yuvaa avii rej xta' ro', danj guun rá nij so' gaa nayuu rá ve' a.

³ Gaa ne quene'en nij so' rasuun, ne ase vaa yaa ya'an cuxra' ta'aj vaa rasuun quene'en nij so', ne quitáa rasuun yo' raa 'o 'o nij so' a.

⁴ Gaa ne dan me se caraa Nimán Diose nimán taran' nij so', gaa ne guun che'e nij so' nucuaj

ca'mii nij so' xna'ánj ino vaa, ne ndaa vaa xna'ánj ca'vee ca'mii 'o 'o nij so' qui'yaj Nimán Diose, danj inanj ca'mii nij so' a.

⁵ Dan me se güii dan cumán ndo'o yuvii israelitá chuman' Jerusalén, ne síi me ya rá canoco' man Diose me nij yuvii israelitá yo', ne síi cavii nu' chuman' naj rihaan chumii me uún nij so' a.

⁶ Dan me se cuno nij yuvii israelitá yo' se vaa cuno nij síi noco' man Jesucristó ne rá ve' yo', ne che'é dan cunuu chre' nij yuvii israelitá rihaan ve' yo', ne ca'anj ndo'o rá nij so' se vaa guun a. 'O se 'o 'o nij yuvii israelitá yo' ro', cuno se vaa ca'mii nij síi noco' man Jesucristó xna'ánj a'mii 'o 'o nij yuvii israelitá yo' a.

⁷ Dan me se caráya'anj uxrá nij yuvii, ne cataj nij yuvii yo':

—Ni'yaj soj ei. Xa' nij síi nicun' a'mii nihánj, tzaj ne sij cavii estadó Galilea me cunudanj nij so' á.

⁸ Ne asa' a'vee uno 'o 'o ní' se vaa a'mii nij so' xna'ánj a'mii ma'an nii ní' rihaan ní' ga.

⁹ Dan me se ma'an ní' me síi cavii Partia do', Media do', Elam do', Mesopotamia do', Judea do', Capadocia do', Ponto do', Asia do',

¹⁰ Frigia do', Panfilia do', Egiptó do', rej Libia naj nichrun' Cirene do', ne ta'aj ní' me síi ne chuman' Romá uún a. 'O se ta'aj ní' me yuvii israelitá, ne yo'ó ta'aj ní' me nij síi yaníj guun tuvi' ga nij síi israelitá a.

¹¹ Ne vaa síi cavii Creta do', Arabia do', uún a. Ne nihánj me se ndaa uno 'o 'o ní' se xna'anj ní', 'yaj nij so' a'mii nij so', ne nata' ndo'o nij so' se vaa sa' uxrá vaa Diose á —taj cunudanj nij yuvii yo' a.

12 Dan me se caráya'anj uxrá cunudanj nij yuvij israelitá yo', ne ne ca'vee xcaj nij so' cuentá daj me che'é guun danj a. Ne ta'aj nij so' xná'anj man tuvi', cataj nij so':

—Me che'é guun nu' danj ga —taj ta'aj nij so' a.

13 Ne yo'ó ta'aj nij so' ca'nga' nacoo, ne cataj nij so':

—Cachén ndo'o co'o nij síi nihánj na vinó naca nanj chuguanj —taj nij síi ca'nga' nacoo yo' a.

Nihánj me nana nata' Pedró rihaan nij yuvij a

14 Gaa ne dan me se canicun' síi cu'naj Pedró ga yo'ó xaan nij apóstol cune' Jesucristó man nata' se nana so' rihaan yuvij, ne nucuaj ndo'o ca'mii Pedró ne nata' so' nana nihánj a:

—Soj sij israelitá do', cunudanj soj sij ne chuman' Jerusalén nihánj do', nana xrej soj nana ca'mij rihaan soj, ne xcaj soj cuentá che'é rasuun nihánj ei.

15 Ne guun xnó núj ndaa vaa guun rá ta'aj soj ma'. 'O se xcaj soj cuentá, ne tihaj aga' uun rej na'yaan me nihánj ei.

16 Tzaj ne nu' nihánj ro', me se vaa cataj síi cu'naj Joel síi nata' se nana Diose gaa naá qui'yaj Diose a. Dan me se cataj síi cu'naj Joel:

17 “Nihánj me a'mii ma'an Diose rihaan soj, ne taj Diose se vaa asa' nichrun' ca'anj ni'ya chumii nihánj, ne ca'nej ndo'o 'unj Nimán 'unj nimán yuvij man rihaan nu' chumii, ne ta'níi soj ro', nata' nana rque 'unj man ma'an nij so' a. Ne nij síi tachruu ro', naqui'yaa ndo'o rasuun rihaan nij so', qui'yáj, ne nij chii nga ro', ca'mii ndo'o nej rihaan nij so', qui'yáj adonj.

18 Dan me se güii yo' caraj Nimanj nimán nij síi nuu rihanj do', nimán nij chana nuu rihanj do', ne nata' nij so' se nanaj adonj.

19 Dan me se gaa ndo'o rasuun nocoo quene'en soj rej xta', qui'yáj, ne gaa ndo'o rasuun nocoo quene'en soj rihaan yo'óó, qui'yáj, ne quene'en soj ton do', ya'an do', catze' do' a.

20 Ne guun rmi' rihaan güii, ne rihaan yavii ro', guun ton, asa' nichrun' quisij güii sa' güii ca'ne' 'unj sij 'nij ra'a man soj cacun' che'é yuvii a.

21 Ne me ma'an síi cachinj ni'yaj rihaan 'unj, ne quinani so' rihaan sayuun adonj". Nihánj me se nana Diose nana ca'mii síi cu'naj Joel gaa naá ei.

22 "Ne cuano nihánj me se cunoo soj sij israelitá nana nihánj ei. Dan me se aj ne'en nij soj daj qui'yaj Jesucristó síi cavii chuman' Nazaret, se vaa guun nucaj so' qui'yaj ndo'o so' suun sa' nocoo quene'en soj, qui'yaj Diose adonj. Ne dan me se xcaj soj cuentá daj sij me so', qui'yaj Diose á.

23 Dan me se tucuachén nii man so' rihaan nij síi taj ri'yunj man so', gaa ne dan me se cachrón nij síi ne noco' man Diose man so' rihaan rcutze, ne cavi' so', qui'yaj ma'an soj a. Ne nu' nihánj me se vaa 'o guun rá Diose quiran' so', ne aj quene'en Diose se vaa quiran' so' danj ei.

24 Tzaj ne qui'yaj Diose se vaa ne ca'vee yuun che'e cavi' so', ma'. Tzaj ne cunuu i'na' uún so', qui'yaj Diose, che'é se ne ca'vee yuun che'e cavi' so' daj chihaa mij a man adonj.

25 "Q se nihánj me nana ca'mii síi cu'naj David che'é Jesucristó a: "Quene'én 'unj daj quiranj rej rihanj, ne xcaj 'unj cuentá se vaa yo'o canicun' síi

'nij ra'a manj rihanj nanj á. 'O se nicun' so' rej x'nuj, ne se ca'vee naxruj, qui'yaj so' ma'.

26 Che'é dan guun niha' ndo'o nimanj, ne ca'mij nana niha' cavii nimanj a. 'O se yo'o guun ya raj se vaa ya cavii sa' 'unj nanj adonj.

27 'O se se tanáj so' nimanj rej man nij sí cavi' ma'. Ne se quiri'yuj nee man sí vaa sa' rihaan so', qui'yáá so' ma'.

28 Dan me se tijaán so' rihanj tucuáán canocoj ne ca'vee gaa i'na' 'unj a. Ne guun niha' ndo'o raj, qui'yáá so', asa' canicún' 'unj rihaan so' adonj". Nihánj me se nana sí cu'naj David yo' a.

29 "Nuveé nana naca me nana nihánj nana cataj 'unj rihaan nij soj cuano, man tinuj. Dan me se xii ní' sí cu'naj David me se cavi' so', gaa ne cachin' nii man so', ne yaj me se ne'en ní' me rej cachin' nii man so' nanj á.

30 Tzaj ne sí nata' se nana Diose me so' gaa cayáán so', ne quene'en so' se vaa cata' tu'va Diose rihaan so' se vaa guun chij yo'o ta'nú' ta'nij si'no so', ndaa vaa guun chij ma'an so' a.

31 Ne che'é dan cataj so' se vaa se quináj Jesucristó rej man nij sí cavi', ne se quixtun' nu' nee man so' ma'. Danj ca'mii so' ni'yaj so' güii cunuu i'na' uún Jesucristó a.

32 "Gaa ne dan me se ya ya cunuu i'na' uún Jesucristó, qui'yaj Diose, ne taran' núj me sí quene'en se vaa cunuu i'na' uún so' adonj.

33 Gaa ne cavii Jesucristó ndaa x'núú Diose rej nuva' Diose, ya gaa nacaj Jesucristó Nimán Diose gaa narqué Diose Nimán so' man Jesucristó, danj vaa cata' tu'va so' a. Ne qui'yaj Jesucristó ga núj sij

apóstol ndaa vaa ne'en soj se vaa ran' núj, ne dan me se qui'yaj Jesucristó ca'mii núj sij apóstol nu' xna'ánj a'mii soj ndaa vaa cuno soj ca'mii núj ei.

³⁴ Dan me se ne cavii ma'an síi cu'naj David rej xta' ma'. Tzaj ne cataj so': "Ca'mii Diose síi 'nij ra'a man ní' rihaan síi 'nij ra'a manj, cataj so' se vaa cayáán síi 'nij ra'a manj x'núú Diose rej nuva' Diose

³⁵ ndaa se quisij qui'yaj canaán Diose rihaan taran' nij síi taj ri'yunj man síi 'nij ra'a manj ne quirii ta'nga' síi 'nij ra'a manj rihaan nij so' adonj", taj síi cu'naj David yo' a.

³⁶ Che'é dan vaa che'é ndo'o xcaj ya taran' soj sij israelitá cuentá se vaa xa' Jesucristó síi cachrón ma'an soj rihaan rcutze, tzaj ne síi 'nij ra'a man ní' me so', ne síi ca'née Diose tinanii man ní' rihaan sayuun me uún so', qui'yaj Diose adonj —taj Pedró rihaan nij yuvii cunuu chre' yo' a.

³⁷ Dan me se gaa cuno nij yuvii nana yo', ne quinano' ndo'o rá nij so', ne xná'anj nij so' man Pedró ga yo'ó nij apóstol cune' Jesucristó man nata' se nana so' rihaan yuvii, cataj nij so' a:

—Ne daj qui'yaj núj, ga tinu' —taj nij so', xná'anj nij so' man nij tuvii' Pedró a.

³⁸ Gaa ne cataj Pedró rihaan nij so' a:

—Canicaj nimán soj canoco' soj chrej sa', ne cata' ne cunudanj soj che'é yan quene'en yuvii se vaa noco' soj man Jesucristó, gaa ne tinavij Diose cacun' tumé soj, ne rque Diose Nimán Diose catuu yo' nimán soj ei.

³⁹ Dan me se cata' tu'va Diose se vaa qui'yaj so' danj che'é nij soj do', che'é ta'níi soj do', che'é nij síi ne gan' do' a. Dan me se me ma'an síi nacunj Diose

síi 'nij ra'a man ní' canoco' man so' me se qui'yaj Diose danj che'é so' adonj —taj Pedró rihaan nij yuviij israelitá yo' a.

⁴⁰ Gaa ne nata' so' que'ee doj nana rihaan nij so', gaa ne nago' so' chrej nucuj man nij so', cataj so': —Curihanj soj sca'núj tuvi' ní' síi noco' tucuáán chi'ij, gaa ne quinaniij soj rihaan sayuun ei —taj Pedró rihaan nij yuviij israelitá a.

⁴¹ Che'é dan me nij síi cuchumán rá se nana so' ro', cata' ne nij so', ne güii yo' me se canoco' naca va'nuj míj yuviij man Jesucristó ta' asuun a.

Nana nihánj taj xna'anj daj qui'yaj nij síi noco' man Jesucristó a

⁴² Dan me se yo'o canoco' raan nij síi noco' man Jesucristó nana tucu'yón nij apóstol rihaan nij so', ne yo'o guun tuvi' cunudanj nij so' a. Ne yo'o cuxra' ta'aj nij so' rachrúún chá nij so', ne yo'o chre' cachíin ni'yaj nij so' rihaan Diose a.

⁴³ Ne cunudanj nij yuviij ro', kuchu'vi' ndo'o nij so' ni'yaj nij so' nij suun sa' noco' qui'yaj nij apóstol yo' a.

⁴⁴ Tzaj ne nij síi cuchumán rá ni'yaj man Jesucristó me se 'o rej man chre' cunudanj nij so', ne naqui'yaj rcua'aan nij so' nu' si'yaj nij so', ne si'yaj taran' nij so' me cunudanj nij rasuun yo' a.

⁴⁵ Ne tu'vej nij so' to'óo nij so' do', si'yaj nij so' do', ne rqué nij so' se sa'anj nij so' rihaan tuvi' nij so' síi achiin rasuun man a.

⁴⁶ Dan me se daj a güii 'anj nij so' nuvií noco' cachinj ni'yaj nij so' rihaan Diose, ndaa vaa guun rá taran' nij so' a. Ne 'o nuu chre' nij so' 'o ve', ne uxra' ta'aj nij so' rachrúún chá nij so' a. Ne dan me

se ndaa niha' ndaa cochroj rá taran' nij so' chá nij so' chraa a.

⁴⁷ Ne cataj nij so' se vaa sa' uxrá qui'yaj Diose che'é nij so', ne ca'mii sa' cunudanj nij yuviij ne chuman' Jerusalén ni'yaj nij yuviij man nij so' gaa ve'é mán chre' nij so' a. Ne daj a güii cunuu chre' doj síi vaj naniij rihaan sayuun ga' nij so', qui'yaj Diose a.

3

Nana nihánj taj xna'anj se vaa nahuun sa' 'o síi rengo, qui'yaj Pedró ga' Juan a

¹ Dan me se aga' va'núj rej anoco' güii me se cuchí' síi cu'naj Pedró do', síi cu'naj Juan do', nuvií nocoo, che'é se orá achíin ni'yaj nii rihaan Diose me yo' a.

² Ne maan orá dan nicaj nii man 'o síi rengo cuchí' nii rihaan nuvií nocoo yo', ne síi rengo me so' asij ca'ngaa so' a. Ne dan me se daj a güii uchruj nii man so' rihaan yo'óó rej x'núj ta'yaa cu'naj Ta'yaa Ve'é Ndo'o Vaa a. Ne yo' me rej achíin so' caridad man nij yuviij atúj nuvií yo' a.

³ Dan me se quene'en so' man Pedró do', man Juan do', se vaa catuuj roj so' rá nuvií nocoo, gaa ne cachíin so' caridad man roj so' a.

⁴ Gaa ne ni'yaj uxrá Pedró do', Juan do', man so', ne cataj Pedró rihaan so' a:

—Ni'yaj so' man rój á —taj so' rihaan síi rengo yo' a.

⁵ Gaa ne ni'yaj síi rengo man roj so', che'é se guun rá so' se vaa rque roj so' sa'anj man so' a.

⁶ Gaa ne cataj Pedró rihaan so' a:

—Taj vaj a doj sa'anj rihaan 'unj ma'. Tzaj ne rque 'unj se vaa rihaan 'unj mán so' ei. Dan me se che'é ma'an Jesucristó síi cavii chuman' Nazaret taj xna'anj 'unj rihaan so' se vaa naxumaan so' ne cachee so' á —taj Pedró rihaan so' a.

⁷ Gaa ne quita'aa Pedró ra'a so' rej nuva' so', ne cachrón caya Pedró man so', ne nu' nari' nucuaj tacóo so' do', xtucua' so' do' a.

⁸ Gaa ne dan me se güéj so', ne canicun' caya so', ne cachéé so', ne dan me se catúj so' rá nuvíi nocoo ga roj so', ne cachéé ndo'o so', ne güéj so', ne cataj so' se vaa sa' uxrá qui'yaj Diose che'é so' a.

⁹ Gaa ne quene'en cunudanj nij yuvii se vaa cachéé so' ne cataj so' se vaa sa' uxrá qui'yaj Diose a.

¹⁰ Ne quene'en nij yuvii se vaa ma'an so' me síi yáán rihaan ta'yaa nuvíi nocoo cu'naj Ta'yaa Ve'é Ndo'o Vaa ne achíin so' caridad, ne ca'anj ndo'o rá nij yuvii che'é se vaa nahuun sa' síi rengo yo' a.

Nihánj me nana nata' Pedró rihaan nij yuvii a

¹¹ Dan me se quita'aa síi nahuun sa' yo' man síi cu'naj Pedró do', man síi cu'naj Juan do', ne che'é se ca'anj ndo'o rá nij yuvii, che'é dan cunanj nij yuvii cunuu chre' nij yuvii rihaan roj so' rque chingá cu'naj Corredor Salomón a.

¹² Ne gaa quene'en Pedró man nij yuvii, ne cataj so' rihaan nij yuvii a:

—Cunoj soj sij israelitá ca'mij á. Me che'é ca'anj ndo'o rá soj se vaa chéé síi nihánj ga. Me che'é ni'yaj ndo'o soj man rój ga. Nuveé ma'an rój me síi guun nucuaj qui'yaj cachéé so' ma'. Nuveé che'e

se sij noco' sa' ndo'o man Diose me rój, ne cachéé so' qui'yaj rój ma'.

13 Dan me se Diose síi noco' xii ní' síi cu'naj Abraham do', síi cu'naj Isaac do', síi cu'naj Jacob do', me síi qui'yaj cavii sa' ndo'o ta'núí ma'an so' Jesucristó nanj adonj. Tzaj ne nij soj me nij síi tucuachén man Jesucristó rihaan nij síi taj ri'yunj man Jesucristó, ne nda' se guun ya rá síi cu'naj Pilato se vaa ca'anj uun Jesucristó, tzaj ne cataj soj rihaan síi cu'naj Pilato se vaa guun rá soj cavi' Jesucristó adonj.

14 "Dan me se cataj soj se vaa ne guun rá soj ni'yaj soj man síi sa' nimán yo' ma'. Maan se cachíin ni'yaj soj rihaan síi cu'naj Pilato se vaa quirii so' taga' man 'o síi ticavi' man yuvií a.

15 Ne ticavi' soj man Jesucristó síi guun nucuaj qui'yaj gaa i'na' nimán ní' a. Ne Diose ro', qui'yaj cunuu i'na' uún Jesucristó, ne ma'an núj me síi quene'en se vaa cunuu i'na' uún so' nanj adonj.

16 Ne che'é se cuchumán rá síi nihánj ni'yaj so' man Jesucristó ro', che'é dan nari' nucuaj so', qui'yaj Jesucristó adonj. Ne dan me se nahuun sa' nu' so', ne aj ne'en taran' soj daj quiran' so', ne aj cuno soj daj taj ma'an so' nanj á.

17 "Ne nihánj me se ne'én 'unj se vaa che'é se ne quene'en soj daj sij me Jesucristó, ne che'é dan cavi' so' qui'yaj soj ga' nij síi uun chij rihaan soj nanj ei.

18 Tzaj ne Diose ro', me síi cataj xna'anj asij naá ndo'o gaa rqué so' nana nata' nij síi nata' se nana so', ne dan me se cataj xna'anj Diose se vaa síi ca'nej so' tinanii man yuvií rihaan sayuun me se

quiran' ndo'o so' sayuun a. Ne nihánj me se quisíj ya nu' ndaa vaa cataj Diose se vaa qui'yaj ma'an Diose nanj ei.

¹⁹”Che'é dan canicaj nimán soj canoco' soj chrej sa', gaa ne ca'vee tinavij Diose cacun' tumé soj á.

²⁰ Gaa ne ca'vee quisij güii cunu cuuj rá taran' ní' sij israelitá, qui'yaj sí' 'nij ra'a man ní', ne dan me se Jesucristó sí' cune' Diose man tinanii man ní' rihaan sayuun me se ca'nej Diose man so' ca'na' uún so' rihaan ní' a.

²¹ Cuanó nihánj me se me rá Diose cayáán so' rej xta' ndaa se quisij güii naqui'yaj sa' Diose nu' nij rasuun ndaa rá se vaa nij rasuun asij naá ndo'o ndaa vaa cataj xna'anj nij sí' sa' sí' nata' se nana Diose gaa naá a.

²² Dan me se sí' cu'naj Moisés cataj rihaan xii ní': “Diose sij 'nij ra'a man ní' me se cavii yo'o tinúú nij soj, qui'yaj Diose, ne guun so' sí' nata' se nana Diose ndaa vaa 'yaj ma'anj a. Ne cunó soj nu' nana nata' so' rihaan soj á.

²³ Ne dan me se a me ma'an sí' na'vej rá cunó se nana sí' nata' se nana Diose yo', ne nu' quirii yaníj nii man so' sca'núj ní' sij israelitá, ne quirí' nu' so' nanj adonj”, taj sí' cu'naj Moisés gaa naá a.

²⁴ Ne dan me se sí' cu'naj Samuel do', cunudanj yo'ó nij sí' nata' se nana Diose do', cataj xna'anj taran' uún nij so' uún che'é güii yaj ei.

²⁵”Ne rihaan ma'an nij soj ca'mii nij sí' nata' se nana Diose, ne ma'an nij soj me nij sí' cavii sa' qui'yaj Diose, ndaa vaa cata' tu'va Diose rihaan xii ní' gaa naá ei. Dan me se rihaan xii ní' sí' cu'naj Abraham cataj Diose: “Dan me se cavii sa'

nij yuvii man cunudanj nij chuman' naj rihaan chumii, qui'yaj ta'níí ta'nij si'no so' a", taj Diose rihaan Abraham a.

²⁶ Gaa ne aj ca'née Diose man ta'níí Diose rihaan chumii, ne cuchi' ta'níí Diose asino yaan rihaan ma'an soj, qui'yaj Diose, che'é rej canicaj nimán 'o 'o nij soj, ne tanáj xco nij soj tucuáán chi'ii, ne ca'vee qui'yaj ndo'o Diose se luj che'é taran' nij soj ei —taj Pedró rihaan nij yuvii cunuu chre' rá nuvíí nocoo yo' a.

4

Nana nihánj taj xna'anj daj ca'mii síí cu'naj Pedró ga Juan rihaan nij síí uun chij rihaan nij yuvii israelitá a

¹ Dan me se gaa ca'mii síí cu'naj Pedró ga Juan rihaan nij yuvii, ne cuchi' nij xrej do', tanuu uun chij rihaan nij tanuu 'yaj suun rá nuvíí nocoo do', nij síí saduceo do', rihaan roj so' a.

² 'O se ne guun niha' rá nij so' gaa cuno nij so' nana tucu'yón Pedró ga Juan man nij yuvii nana se vaa Jesucristó me 'o síí cunuu i'na' uún gaa cavi' so' a.

³ Ne dan me se quita'aa nij so' man roj so', ne caxríj nij so' taga' man roj so' 'o yan' a. 'O se aj ti'nuu me orá yo' a.

⁴ Ne que'ee nij síí cuno se nana roj so' ro', cuchumán rá nana yo', ne veé danj quisíj 'un' míj snó'o canoco' man Jesucristó ta' asuun a.

⁵ Ne yo'ó güii me se cunuu chre' nij síí nicaj suun do', nij síí uun chij do', nij síí naqui'yaj cuu se tucuanj Moisés rihaan nij yuvii do', chuman' Jerusalén ga

⁶ sí cu'naj Anás sí guun xrej atā suun nocōo doj dō', sí cu'naj Caifás dō', sí cu'naj Juan dō', sí cu'naj Alejandro dō', taran' nij tuvī' nij xrej atā suun nocōo doj dō' a.

⁷ Dan me se canicun' caya sí cu'naj Pedró ga Juan tanuū ve' man nij xrej, qui'yaj nij xrej, ne xná'anj nij xrej man roj so', cataj nij xrej a:

—Me rej quiri' roj soj rej nucuaaj dō', me sí ca'ne' suun rihaan roj soj dō', ne qui'yaj roj soj danj ga —taj nij so', xná'anj nij so' man roj so' a.

⁸ Gaa ne caraa ndo'o Nimán Diose nimán Pedró, ne cataj Pedró rihaan nij so' a:

—Cuno nij soj sij nicaj suun rii ta'nga' rihaan nij yuviī dō', cuno soj sij uun chij cuno nana cataj xna'anj 'unj rihaan nij soj á.

⁹ Nihánj me se naqui'yaj cuu nij soj man rój che'é se cunuu 'ee rá rój ni'yaj rój 'o sí rengo, ne me rá nij soj quene'en soj asa' ca'vee nahuun sa' sí rengo nihánj a.

¹⁰ Che'é dan xcaj nij soj dō', taran' nij yuviī israelitá dō', cuentá se vaa Jesucristó sí cavii chuman' Nazaret me sí qui'yaj ca'vee naxcaj rój man sí rengo nihánj, ne 'o vaa nucuaaj so' a. Ne nij soj ro', me nij sí qui'yaj cachrón nii man Jesucristó rihaan rcutze, tzaj ne cunuu i'na' uún so', qui'yaj Diose a.

¹¹ Ne xa' Jesús, tzaj ne so' me yuvej quiri'íj nij soj sij cune' ve', ne yaj me se guun so' yuvej sa' doj rihaan taran' nij yuvej man tacóo ve' yaj nanj adonj.

¹² Ne taj vaj a doj yo'ó sí guun nucuaaj qui'yaj cavii sa' ní' a ma'. Orún' so' me sí vaa rihaan chumiī nihánj sí ca'née Diose, ne orún' so' me sí

ca'vee t̄inani man ní' rihaan sayuun nanj adonj
—taj Pedró rihaan nij sí' uun chij yo' a.

¹³ Dan me se quene'en nij so' se vaa ne cuchu'vi'
Pedró ga Juan ne sca' uxrá ca'mii roj so', ne xcaj nij
so' cuentá se vaa nuveé sij tucu'yón yanj me roj so',
tzaj ne sa' uxrá nari' roj so' a. Che'é dan caráya'anj
nij so' a. Ne quene'en nij so' se vaa roj so' me sí'
cachéé ga Jesucristó a.

¹⁴ Ne quene'en nij so' man sí' nahuun sa' yo'
nicun' ga roj so' a. Gaa ne ne quirí' nij so' nana
ca'mii nij so' ma'.

¹⁵ Gaa ne ca'ne' nij sí' uun chij suun rihaan
Pedró ga Juan ga sí' nahuun sa' yo' se vaa curihanj
va'núj nij so' xe', gaa ne ca'vee nuchruj raá nij tuvi'
nij sí' uun chij daj qui'yaj nij so' ga sí' cu'naj Pedró
ga Juan yo', rá nij so' a.

¹⁶ Dan me se cataj nij so':

—Daj qui'yaj ní' ga roj sí' nihánj ga. 'O se xcaj
taran' nij sí' ne chuman' Jerusalén nihánj cuentá
se vaa ranga' qui'yaj suun roj so' suun sa' nocoo,
ne se ca'vee cataj ní' se vaa ne qui'yaj roj so' danj
ma'.

¹⁷ Tzaj ne tuchu'vi' ní' man roj so' ne ca'ne' ní'
suun rihaan roj so' se vaa se ca'mii roj so' che'é
Jesucristó rihaan a 'ó yuvii a. Gaa ne se cha'nuu
doj nana nihánj sca'núj nij yuvii a —taj taran' nij
so' a.

¹⁸ Gaa ne canacúun nij so' catuu uún Pedró ga
Juan rej nuu nij so', gaa ne nago' nij so' chrej
nucuj man roj so' se vaa se ca'mii roj so' che'é
Jesucristó ne se tucu'yón roj so' se nana Jesucristó
a.

19 Gaa ne canicaj síi cu'naj Pedró ga Juan cataj roj so' rihaan nij so' a:

—Nuchruj raá nij soj sese guun rá Diose cuno núj rihaan soj ne tanáj xcó núj se nana Diose ei.

20 Se ca'vee ca'ne' rá núj ga suun a'mii che'é rasuun quene'en núj do', che'é nana cuno núj do' a ma' —taj roj so' rihaan nij so' a.

21 Gaa ne doj a ca'mii yuvaa nij síi uun chij yo' rihaan roj so', tzaj ne ne quirí' nij síi uun chij yo' daj qui'yaj nij so' sayuun man roj so' a ma'. Che'é dan na'née nij so' chrej man roj so' a. 'O se nij yuvii me se cunudanj nij so' cataj se vaa sa' uxrá qui'yaj Diose che'é síi nahuun sa' yo' a.

22 Ne síi nahuun sa' qui'yaj suun sa' nocoo yo' me se vaj so' vij chihaa yo' táa doj a.

Nana nihánj taj xna'anj daj ca'mii nij síi nocoo man Jesucristó gaa cachín ni'yaj nij so' rihaan Diose a

23 Dan me se na'née nii man Pedró ga Juan, ne cuchí' roj so' rihaan tinúú roj so', gaa ne nata' roj so' nu' nana cataj nij xrej ata suun nocoo doj do', nij síi uun chij do', se vaa cataj nij so' rihaan roj so' a.

24 Gaa ne dan me se gaa cuno nij so' se nana roj so', gaa ne nu' guun rá taran' nij so' cachinj ni'yaj nij so' rihaan Diose, ne che'é dan nucuaj ca'mii nij so', cataj nij so' a:

—Ma'án so' me síi qui'yaj nu' rej xta' nu' chumii nu' na ya'anj nu' rasuun nu' a.

25 Ne so' ro', ca'née Nimán so' rihaan xii núj síi cu'naj David síi qui'yaj suun che'é so', ne Nimán so' ro', rqué nana rihaan so' ca'mii so', ne dan me

se cataj so': "Me che'é ca'maan ndo'o rá nij síi yaníj, ne me che'é guun nij rma'an rá nij yuvií ga.

26 Dan me se cavii nij síi nicaj suun rey uun chij rihaan chumii nihánj, gaa ne cunuu chre' nij so', che'é rej qui'yaj nij so' sayuun man síi 'nij ra'a man ní do', man síi ca'née so' tinanii man yuvií rihaan sayuun do' a", taj síi cu'naj David yo' gaa naá a.

27 Dan me se ya ya cunuu chre' síi cu'naj Herodes do', síi cu'naj Poncio Pilato do', nij síi yaníj do', nij yuvií israelitá do', rque chuman' nihánj, che'é rej qui'yaj nij so' sayuun man ta'níi so' síi cu'naj Jesucristó síi cuné' so' man tinanii man núj rihaan sayuun a.

28 Tzaj ne qui'yaj nij so' inanj se vaa guun rá ma'an so' asij naá se vaa qui'yaj nij so', ne ma'an so' me síi qui'yaj guun nu' nihánj a.

29 "Ne nihánj me se xcaj so' sij 'nij ra'a man núj cuentá se vaa ca'mii yuvaá ndo'o nij so' rihaan núj a. Ne racuíj so' man núj sij 'yaj suun che'é so' se vaa guun nucuaj núj nata' sca' núj se nana so' rihaan yuvií a.

30 Dan me se racuíj so' man núj qui'yaj núj suun sa' nocoo, ne nahuun sa' yuvií, qui'yáa so', che'é rej xcaj yuvií cuentá se vaa sij nucuaj ndo'o mé so' che'é ta'níi so' Jesucristó síi guee á —taj taran' nij so', cachíin ni'yaj nij so' rihaan Diose a.

31 Dan me se quisíj cachíin ni'yaj nij so' rihaan Diose, gaa ne quinaan nu' rej man nij so', ne caraa ndo'o Nimán Diose nimán cunudanj nij so', gaa ne sca' ndo'o ca'mii nij so' se nana Diose a.

Nana nihánj taj xna'anj che'é yan yo'o chre' man nij síi noco' man Jesucristó a

³² Dan me se yo'ò cyaan vaa rá cunudanj nij síi cuchumán rá ni'yaj man Jesucristó, ne a 'ó nij síi noco' man Jesucristó ne taj se vaa se si'yaj orún' me rasuun ma'. Tananj nu' rasuun man rihaan 'ò 'ò nij so' ro', me si'yaj taran' nij so', taj nij so', ne 'ò chre' mán nij so', ne 'ò chre' a'mii nij so', ne orún' rasuun si'yaj cunudanj nij so' a.

³³ Ne nij apóstol cune' Jesucristó man nata' se nana so' rihaan yuvii me se nucuaj ndo'o nata' nij so' se vaa cunuu i'na' uún Jesucristó sij 'nij ra'a man ní' a. Ne qui'yaj ndo'o Diosé se luj che'é cunudanj nij so' a.

³⁴ Ne taj vaj a 'ó síi achiin rasuun man 'nij sca'núj nij so' ma'. 'Ò se cunudanj tinúú nij so' síi vaa to'óo do', síi vaa ve' tucúa do', cutu'véj nij so' si'yaj nij so', ne nicaj nij so' sa'anj quirí' nij so',

³⁵ ne caxrjij nij so' sa'anj yo' ston nij apóstol cune' Jesucristó man nata' se nana so' rihaan yuvii a. Ne sese cachiin rasuun rihaan 'ò tinúú nij so', ne nij apóstol me nij síi rqué nu' se vaa cachiin rihaan so' a.

³⁶ Ne yo'ò so' ro', me síi cu'naj José, ne tucu'náj nij apóstol Bernabé man so' a. Ne nana Bernabé taj se vaa síi 'yaj nari' nucuaj ní' me so' a. Ne 'ò ta'núí ta'nij si'no síi cu'naj Leví síi cane gaa naá me so', ne cavii so' rej cu'naj Chipre a.

³⁷ Dan me se vaa 'ò to'óo so', ne cutu'véj so' man yo', ne nicaj so' sa'anj quirí' so' che'é yo'óo yo', ne caxrjij so' ston nij apóstol yo' a.

5

Nana nihánj taj xna'anj che'é cacun' qui'yaj síi cu'naj Ananías do', nica so' chana cu'naj Safira do'

a

¹ Dan me se vaa yo'o s^í cu'naj Ananías, ne vaa nica so' chana cu'naj Safira, ne cutu'véj roj nica roj so' 'o yo'óo,

² ne quiri' roj so' sa'anj, gaa ne quita'aa s^í cu'naj Ananías ta'aj sa'anj yo', ne ca'vej rá nica so' quita'aa so' sa'anj yo' a. Gaa ne daj 'ó ta'aj sa'anj ca'anj nica so', caxr^íj so' ston nij apóstol cune' Jesucristó man a. Ne ca'mii ne so' rihaan nij apóstol se vaa nu' sa'anj quiri' so' che'é yo'óo cutu'véj so' me yo', cataj so' a.

³ Gaa ne ca'mii Pedró rihaan s^í cu'naj Ananías, cataj so', ne:

—Me che'é catúj s^í chree nimán so', ne ca'mii ne so' ndaa rihaan Nimán Diose, ne quita'aa so' ta'aj sa'anj quiri' so' gaa cutu'véj so' yo'óo yo' ga.

⁴ Dan me se daj guun rá so', ne ca'mii ne so' ga. Nuveé to'oj ma'an so' cutu'véj so' ne gaa cutu'véj so' man yo' ne ne nó xcúun so' qui'yáá so' ndaa vaa me rá ma'an so' qui'yáá so' ga se sa'anj so' na'. Me che'é cavii raá so' qui'yáá so' se vaa qui'yáá so' nihánj ga. Nuveé rihaan yuvii uun ca'mii ne so' ma'. Ndaa rihaan ma'an ya Diose ca'mii ne so' nanj adonj —taj Pedró rihaan Ananías yo' a.

⁵ Gaa cuno Ananías nana ca'mii Pedró rihaan so', ne naxru' so', ne cavi' so' a. Gaa ne cuchu'vi' ndo'o cunudanj nij s^í cuno ndaa vaa quiran' so' a.

⁶ Gaa ne canicun' nij s^í tachruu, ne caráan nij so' yatzíj xráá s^í cavi', gaa ne ca'anj nica so' man so' xe', gaa ne cachin' nij so' man so' a.

⁷ Dan me se cachén va'núj orá ta' asuun, gaa ne catúj nica s^í cavi' yo' rá ve', ne ne quene'en no' daj quiran' nica no' ma'.

⁸ Gaa ne cataj Pedró rihaan no' a:

—Cataj xna'anj so' rihanj sese nu' sa'anj quita'aa roj soj che'é yo'óo cutu'vej roj soj me nihánj á —taj Pedró rihaan no' a.

—Veé cunudanj ya sa'anj quita'aa rój che'é yo'óo me yo' ei —taj no' a.

⁹ Gaa ne cataj Pedró rihaan no' a:

—Me che'é cyaan guun rá roj soj tiha' yu'unj roj soj man Nimán sí' n'ij ra'a man ní' ga. Ni'yaj so' ei. Nij sí' cachin' man nica so' ro', nicun' ta'yaa, ne nihánj me se cataj nij so' man so', ca'anj n'icaj nij so' man so' xe' cuano ei —taj Pedró rihaan no' a.

¹⁰ Gaa ne taj ni'yón naxru' no' rihaan yo'óo rej nicun' Pedró, ne nu' cavi' no' a. Gaa ne dan me se catúj uún nij sí' tachruu rá ve', ne quene'en nij so' se vaa aj cavi' no', gaa ne ca'anj n'icaj nij so' man no' xe', gaa ne cachin' nij so' man no' uún x'núu nica no' a.

¹¹ Gaa ne cuchu'vi' ndo'o cunudanj nij sí' cuchumán rá ni'yaj man Jesucristó do', cunudanj nij sí' cuno nana daj quiran' roj nica roj so' a.

Nana nihánj taj xna'anj che'é suun sa' nocoo qui'yaj nij apóstol cune' Jesucristó man nata' se nana so' a

¹² Gaa ne qui'yaj ndo'o nij apóstol cune' Jesucristó man suun sa' nocoo ni'yaj nij yuvii ne chuman' Jerusalén a. Ne yo'o vaa rá nij sí' nocoo' man Jesucristó, ne cunuu chre' nij so' rá nuvíi nocoo rá chingá cu'naj Corredor Salomón a.

¹³ Tzaj ne yo'óo nij yuvii ro', ne quisij rá nij so' cunuu chre' nij so' ga nij sí' nocoo' man Jesucristó

ma'. Tzaj ne cunudanj nij yuvii cataj se vaa sa' qui'yaj nij síi noco' man Jesucristó a.

14 Tzaj ne cuchumán rá que'ee nij snó'o do', nij chana do', ni'yaj nij so' man síi 'nij ra'a man ní', ne che'é dan guun rii doj nij yuvii noco' man so' a.

15 Ne dan me se rihaan chruun do', rihaan yuvéé do', táá nij síi ran', rii nij yuvii man nij síi ran' yo' xe' a. Cuchruj nii man nij síi ran' rá callé rej cachén Pedró, che'é se sese se cachun' Pedró cano xráá nij síi ran' ne nahuun so', rá nij yuvii a.

16 Gaa ne ca'na'ndo'o yuvii cavii nij chuman' naj nichrun' chuman' Jerusalén, ne nuu chre' nij so' a. Dan me se ata' nij so' síi ran' do', síi nuu nana chree nimán do', ne nahuun sa' cunudanj nij so' a.

Nana nihánj taj xna'anj che'é sayuun qui'yaj nii man nij apóstol cune' Jesucristó man nata' se nana so' rihaan yuvii a

17 Dan me se guun xcoj ruvaa rá nij tuvii' xrej ata' suun noco' doj ni'yaj nij so' man nij apóstol cune' Jesucristó man nata' se nana so' rihaan yuvii a. Dan me se nij tuvii' xrej me se síi saduceo me nij so' a.

18 Dan me se ca'née nij so' tanuu quita'aa man nij apóstol, gaa ne caxríj nij so' taga' man nij so' a.

19 Tzaj ne rej nii me se ca'na' yo'o se mozó síi 'nij ra'a man ní', ne ca'núj so' ta'yaa taga' yo', ne ca'anj nicaj so' man nij apóstol xe' a. Gaa ne cataj se mozó Diose yo' rihaan nij apóstol:

20 —Cavii soj, ne ca'anj soj canicun' soj rá nuvií noco', ne nata' soj rihaan nij yuvii nu' nana nihánj nana taj xna'anj daj qui'yaj nij yuvii ne ca'vee gaa

i'na' nimán nij yuvī rihaan Diose á —taj se mozó Diose yo' rihaan nij so' a.

21 Sij cuno nij so' nana vaa danj, gaa ne rej sij güii catúj nij so' rá nuvíi nocoo, ne tucu'yón nij so' se nana Jesucristó rihaan nij yuvī a. Maan orá dan canacúun nij tuvi' xrej atá suun nocoo doj, ne cunu chre' cunudanj nij sí uun chij rihaan nij yuvī israelitá, qui'yaj nij so' juntá a. Gaa ne ca'neé nij so' sí ca'anj taga', ne ca'na' nıcaj nij so' man nij apóstol rihaan nij so', rá nij so' a.

22 Dan me se cuhi' nij mozó ca'neé nij sí uun chij yo' taga', gaa ne ne nari' mozó man nij apóstol rque taga' a ma'. Che'é dan me canicaj nij mozó yo' rej mán nij sí uun chij yo', ne nata' nij mozó yo' se vaa guun taga' a.

23 Dan me se cataj nij mozó yo' a:

—Dan me se gaa cuhi' núj taga', ne vaa raan taga', ne nicun' nij tanuu rihaan ta'yaa, tumé nij tanuu ta'yaa a. Tzaj ne gaa ca'núj núj ta'yaa, ne ne nari' núj a 'ó yuvī rá taga' a ma' —taj nij mozó rihaan nij sí uun chij yo' a.

24 Dan me se gaa cuno tanuu uun chij rihaan nij tanuu tumé nuvíi nocoo do', gaa cuno nij xrej atá suun nocoo doj do', nana vaa danj, gaa ne dan me se cuhu'vi' nij so', ne ne quene'en nij so' daj guun rej rihaan nij so' qui'yaj nij sí noco' man Jesucristó a.

25 Gaa ne dan me se cuhi' yo'o so' rihaan nij sí uun chij, gaa ne nata' so' rihaan nij so', cataj so':

—Xa' nij sí caxríj nij soj taga' man, tzaj ne cuano nihánj me se nicun' nij so' rá nuvíi nocoo, tucu'yón

uxrá nij so' rihaan nij yuvii nanj á —taj síi ca'na' rihaan nij so' a.

²⁶ Gaa ne cavii tanuu uun chij rihaan nij tanuu tumé nuvií nocoo cavii nij mozó cavii, ca'anj nij so' nuvií nocoo, ne ca'anj nacaj nij so' man nij apóstol cune' Jesucristó man rihaan nij síi uun chij yo' a. Tzaj ne ne qui'yaj nij so' fuerzá man nij síi cune' Jesucristó man ma'. 'O se cuchu'vi' tanuu do', nij mozó do', ni'yaj nij so' man nij yuvii se vaa go' nij yuvii yahij xráá ma'an nij so' a.

²⁷ Dan me se ca'na' nicaj nij so' man nij apóstol rej cunuu chre' cunudanj nij síi uun chij rihaan nij yuvii israelitá a. Gaa ne xná'anj xrej ata suun nocoo doj man nij so',

²⁸ cataj so' a:

—Né se aj cataj xna'anj núj rihaan nij soj se vaa ca'ne' rá soj ga suun tucu'yón rihaan nij yuvii che'é síi nata' soj che'é a. Tzaj ne cuano nihánj me se aj cuchí' se nana soj rihaan cunudanj nij síi man chuman' Jerusalén nihánj, qui'yaj soj, ne me rá soj caraa soj cacun' xráá núj se vaa cavi' snó'o noco' soj qui'yaj núj á —taj so' rihaan nij apóstol a.

²⁹ Gaa ne cataj Pedró do', yo'ó nij apóstol cune' Jesucristó man do' a:

—Tzaj ne 'o se no xcuún ní' cunó ní' asino yaan nana a'mii Diose rihaan nana a'mii yuvii a.

³⁰ 'O se nij soj me síi toco' man Jesucristó rihaan rcutze, ne cavi' so', qui'yaj soj, ne Diose noco' xii ní' asij naá ro', me síi qui'yaj cunuu i'na' uún so' adonj.

³¹ Gaa ne ma'an Diose qui'yaj cavii Jesucristó xta', ne nicun' Jesucristó rej x'nuj Diose rej nuva'

Diose, ne guun Jesucristó sí uun chij ndo'o, ne sí tinanii man ní' rihaan sayuun guun so', che'é rej ca'vee canicaj nimán ní' sij israelitá gaa ne quinavij cacun' tumé ní' adonj.

³² Ne núj me sí nata' nana nihánj rihaan yuvij ei. Ne ne'en Nimán Diöse uún se vaa ya ya vaa nana nihánj, ne rqué Diöse Nimán Diöse rihaan núj sij uno rihaan Diöse a —taj nij so' rihaan nij sí uun chij rihaan nij yuvij israelitá a.

³³ Dan me se gaa cuno nij sí uun chij nana nihánj, gaa ne ca'maan uxrá rá nij so', gaa ne guun rá nij so' ticavi' nij so' man nij apóstol yo' a.

³⁴ Tzaj ne canicun' caya yo'o tuvi' nij so' 'o sí fariseo sí cu'naj Gamaliel, ne sí naquiyaj cuu se tucuanj Moisés me so', ne caráj cochroj cunudanj nij yuvij ni'yaj nij yuvij man so' a. Gaa ne ca'ne' so' suun se vaa curihanj nij apóstol doj 'o orá nii xe' a.

³⁵ Gaa ne cataj Gamaliel rihaan yo'ó nij sí uun chij yo' a:

—Cuno soj sij israelitá nana ca'mij rihaan nij soj cuano á. Dan me se tadó soj daj qui'yaj soj ga nij snó'o ca'na' rihaan ní' nihánj á.

³⁶ 'O se asij rqué doj me se nachumaan 'o sí cu'naj Teudas, ne so' ro', me sí cataj se vaa sij sa' uxrá me ma'an so', ne canoco' 'o ca'anj cientó yuvij xcó so' ta' asuun a. Gaa ne ticavi' nii man so', ne cha'nuu cunudanj nij sí cuno se nana so', ne navij nu' se nana so' nanj adonj.

³⁷ Gaa ne dan me se cachén doj, gaa ne cavii yo'ó sí cu'naj Judas sí cavii estadó Galilea, ne nachumaan so' gaa güii cachrón gobiernó se chuvii cunudanj nij yuvij rihaan yanj a. Gaa ne

tihá' yu'unj so' man yuvií, ne canoco' nij yuvií xcó so' a. Gaa ne cavi' so' uún, gaa ne cunudanj nij yuvií cuno se nana so' cha'nuu uún a.

³⁸ "Ne cuano nihánj me se cataj xna'anj 'unj rihaan nij soj se vaa se qui'yaj nij soj a doj sayuun man nij sí ca'na' rihaan ní' cuan' ma'. 'O se sese tucuaán cuchruj yuvií uun me se tucuanj nij so', ne sese 'yaj nij so' ndaa vaa avii raa ma'an nij so', ne quirí' nu' se vaa 'yaj nij so' nanj adonj.

³⁹ Tzaj ne sese Diose me sí rqué se nana nij so', ne sese 'yaj suun nij so' se suun Diose, ne daj chihaa mij se ca'anj ni'ya se nana nij so' qui'yaj soj ma'. Sese danj guun qui'yaj nij soj, ne sí unu' ga ma'an Diose me nij soj adonj —taj sí cu'naj Gamaliel cuno yo'ó nij sí uun chij rihaan nij yuvií israelitá a.

Dan me se cuchumán rá nij so' se nana sí cu'naj Gamaliel yo',

⁴⁰ gaa ne canacúun nij so' man nij apóstol, ne catúj nij so' rej mán nij so', gaa ne go' nii rutzii xraá nij apóstol, qui'yaj nij sí uun chij, ne ca'ne' nij so' suun rihaan nij apóstol se vaa se ca'mii nij so' a 'ó nana che'é Jesucristó rihaan nij yuvií, gaa ne na'neé nij sí uun chij yo' chrej man nij apóstol a.

⁴¹ Dan me se curihanj nij apóstol rej mán nij sí uun chij rihaan nij yuvií israelitá, ne guun niha' rá nij apóstol che'é se sij vaa sa' me nij so' ni'yaj Diose ne che'é dan ca'vee quiran' nij so' sayuun che'é Jesucristó qui'yaj Diose a.

⁴² Ne daj a güii me se cunuu chre' nij apóstol rá nuví nocoo do', rá ve' tucua' nij so' do', ne yo'ó

tucu'yón nij so' man nij yuvij, ne nata' nij so' se nana Jesucristó nana sa' rihaan nij yuvij a.

6

Nana nihánj taj xna'anj daj cune' nii man chij sí' yaj suun che'é nij sí' cuchumán rá ni'yaj man Jesucristó a

¹ Ne güii dan me se guun rij doj nij sí' tucu'yón se nana Jesucristó, ne dan me se ta'aj nij so' me sí' a'mii xna'ánj griego, ne yo'ó ta'aj nij so' me sí' a'mii xna'ánj hebreo a. Ne dan me se nij ca'mii nij sí' a'mii xna'ánj griego ni'yaj nij so' man nij sí' a'mii xna'ánj hebreo, che'é se chá go' nij sí' a'mii xna'ánj hebreo yo' rihaan nij chana nique cavi' nica daj a güii a. Ne rihaan nij chana nique cavi' nica ní' a'mii xna'ánj griego me se ne cuyaan go' nij so' se chá chá nij no' a ma'. Ne che'é dan a'maan rá nij sí' a'mii xna'ánj griego a.

² Che'é dan chujij nij apóstol cune' Jesucristó man ro', canacúun nij so' man nij sí' tucu'yón se nana Jesucristó cunu chre' nij so', ne cataj chujij nij so' a:

—Nij uxrá vaa sese tanáj xco núj suun nata' se nana Diose rihaan yuvij che'é rej qui'yaj chujij núj co'oo rihaan nij chana cavi' nica adonj.

³ Che'é dan narij nij soj chij tinúú ní' sí' ve'é a'mii nii ni'yaj nii man, tinuj. Dan me se nano' soj sí' nuu ndo'o Nimán Diose nimán, ne sí' cuu raá nano' soj, ne cune' ní' man nij so' se vaa qui'yaj suun nij so' suun nihánj á.

⁴ Ne xa' núj, tzaj ne inanj suun yo'ó cachinj ni'yaj rihaan Diose qui'yaj suun núj, ne nata' núj

se nana Diose nanj á —taj chuvij nij apóstol cune' Jesucristó man nata' se nana so' a.

⁵ Dan me se guun niha' rá cunudanj nij yuvij gaa cuno nij yuvij nana yo', ne narii nij yuvij man chij tinúú nij so', ne yo'o so' me sí cu'naj Esteban, ne so' ro', me sí nucuaj uxrá rá ni'yaj man Diose, ne nuu ndo'o Nimán Diose nimán so' a. Ne narii uún nij so' man sí cu'naj Felipe do', Prócoro do', Nicanor do', Timón do', Parmenas do', Nicolás do' a. Ne nuveé sij israelitá me Nicolás, maan ne sí guun rá canoco' se tucuanj nij sí israelitá guun so', ne sí cavii chuman' Antioquía me so' uún a.

⁶ Ne dan me se nicaj nij yuvij man chij nij so' ca'anj nij so' rihaan chuvij nij apóstol cune' Jesucristó man, ne nij apóstol me se cachín ni'yaj nij so' rihaan Diose, gaa ne cuta' nij so' ra'a nij so' raá chij nij so' che'é yan go' nij so' se chá rihaan nij chana nique cavi' nica a.

⁷ Dan me se cha'nuu uxrá se nana Diose, ne guun rij ndo'o doj nij sí tucu'yón se nana Jesucristó chuman' Jerusalén yo', ne ndaa que'ee uxrá nij xrej israelitá cuchumán rá se nana Jesucristó ne cuno rihaan Jesucristó a.

Nana nihánj taj xna'anj daj qui'yaj nii gaa quita'aa nii man sí cu'naj Esteban a

⁸ Dan me se sí cu'naj Esteban me se racuíj ndo'o Diose man so', ne guun nucuaj ndo'o so', ne dan me se qui'yaj ndo'o so' suun sa' nocoo ni'yaj nij sí man rej chuman' Jerusalén a.

⁹ Tzaj ne canicun' que'ee yuvij, ne ta'aj nij so' me sí 'anj ve' tucu'yón rej nuu chre' nij sí qui'yaj canaán curihanj rihaan se ru'vee nij so', ne yo'ó

ta'aj nij so' me síi cavii chuman' Cirene, ne yo'ó ta'aj nij so' me síi cavii chuman' Alejandría, ne yo'ó ta'aj nij so' me síi cavii rej cu'naj Cilicia do', rej cu'naj Asia do' a. Dan me se canó tuvi' taran' nij so' ga síi cu'naj Esteban,

¹⁰ tzaj ne ne ca'vee qui'yaj canaán se nana nij so' rihaan se nana Esteban a ma'. 'O se racuj ndo'o Nimán Diosé man síi cu'naj Esteban, ne cavii ndo'o nana cuu raá so', qui'yaj Nimán Diosé a.

¹¹ Gaa ne caxrij nij so' chrej rque yo'ó ta'aj snó'o uún, ne snó'o yo' cataj:

—Cuno núj se vaa ca'mii síi cu'naj Esteban yo' nana nij che'é síi cu'naj Moisés ga ma'an Diosé á —taj nij snó'o yo', ca'mii ne nij so' a.

¹² Gaa ne ca'maan rá nij yuvii do', nij síi uun chij rihaan nij yuvii israelitá do', nij síi naqui'yaj cuu se tucuanj Moisés rihaan yuvii do', gaa cuno nij so' se nana nij síi ne yo' a. Gaa ne cavii nij so', quita'aa cunudanj nij so' man Esteban, ne ca'anj nicaj nij so' man so' rá ve' nuu chre' nij so', qui'yaj nij so' juntá a.

¹³ Gaa ne canicun' doj síi ca'mii ne síi caraa cacun' xráa Esteban, ne cataj nij so' a:

—Síi nihánj ro', ne a'ne' rá so' ga suun a'mii quij che'é rej guee nihánj do', che'é tucuaán noco' ní do', a ma'.

¹⁴ 'O se cuno núj se vaa cataj so' se vaa Jesucristó síi cavii chuman' Nazaret me síi tiri' nu' nuvií noco' nihánj, ne natuna so' tucuaán cuchruj síi cu'naj Moisés che'é ní adonj —taj nij so', ca'mii ne nij so' ni'yaj nij so' man Esteban yo' a.

¹⁵ Gaa ne ni'yaj uxrá cunudanj nij síi yanj rá ve' yo' man Esteban yo', ne ase vaa rihaan se mozó

Diose ro', danj vaa rihaan so', ni'yaj nij so' a.

7

¹ Gaa ne xná'anj xrej atã suun nocoo doj man sí cu'naj Esteban, cataj xrej:

—Ya uxrá danj ca'mii so' dan tu'va nij so' danj che'é so' na' —taj so', xná'anj so' man Esteban a.

Nana nihánj taj xna'anj daj ca'mii natáj sí cu'naj Esteban rihaan nij sí uun chij rihaan nij yuvi israelitá a

² Gaa ne cataj sí cu'naj Esteban yo':

—Cunõ soj ca'mij rihaan soj, tinuj, ta'nuj. Dan me se gaa ataa cayáán xii ní' sí cu'naj Abraham chuman' Harán, ne ni'ndaj ya ve'é vaa Diõ cu-ruvi' rihaan so' rej vaj so' rej cu'naj Mesopotamia,

³ ne cataj Diõ rihaan so': “Curihanj so' chiháán so' rej ne nij tuví' so', ne cavii so' ca'anj so' 'õ rej tiháán 'unj mán so' á”, taj Diõ rihaan Abraham a.

⁴ Gaa ne dan me se curihanj so' rej ne nij sí caldeo, ne ca'anj so' cayáán so' chuman' Harán a. Gaa ne quisíj cavi' rej so', ne cavii uún so', ca'anj so' cayáán so' yo'óó nihánj rej ne ma'an nij soj cuano a.

⁵ Tzaj ne a doj yo'óó ne rque Diõ rihaan sí cu'naj Abraham ma'. Ne a 'ó ta'níí Abraham ne ca'ngaa gaa cata' tu'va Diõ rihaan so' se vaa guun si'yaj nij ta'níí ta'nij si'no Abraham man yo'óó nihánj nanj á.

⁶ Gaa ne cataj uún Diõ rihaan so' se vaa ca'anj cayáán nij ta'níí ta'nij si'no so' to'óó yo'ó yuvi, ne guun nij so' mozó cunuû rihaan yo'ó nij yuvi yo',

ne tucuxru' yo'ó nij yuvī man nij so' cunu' ca'an̄j cientó yo' a.

⁷ Ne xa' nij yuvī guun nij so' mozó rihaan, tzaj ne ma'an̄ Diose qui'yaj sayuun man nij yuvī yo', gaa ne curihan̄j nij ta'níi ta'nij si'no Abraham rej yo', ne naman̄ nij so' cayáán nij so' rej nihánj, ne canoco' nij so' man Diose, ne qui'yaj suun nij so' che'é Diose, taj Diose rihaan Abraham gaa naá a.

⁸ "Dan me se cata' tu'va Diose se vaa qui'yaj Diose dan̄j che'é nij tuvi' Abraham, gaa ne ca'ne' Diose suun se vaa cuta' taran' nij tuvi' Abraham ta'nga' man nij so', che'é se yuvī 'nij ra'a Diose man me nij so' a. Ne dan me se ca'ngaa ta'níi Abraham síi cu'naj Isaac, ne cuta' Abraham ta'nga' man so' gaa vaj so' tunj güii a. Ne dan̄j qui'yaj Isaac uún che'é ta'níi so' síi cu'naj Jacob, ne dan̄j qui'yaj uún Jacob che'é nij ta'níi so' chuvij̄ nij xii ní' nij síi cayáán gaa naá a.

⁹ "Gaa ne dan me se guun xcoj ruvaa rá nij xii ní' ni'yaj̄ nij so' man tinúú nij so' José, gaa ne cutu'vej̄ nij so' man so' rihaan síi ca'an̄j nicaj̄ man so' ndaa rej yo'óo cu'naj̄ Egiptó a. Ne Diose vaj̄ ga so',

¹⁰ ne tinanii Diose man so' rihaan nu' sayuun quiran' so' a. Gaa ne guun rá síi nicaj̄ suun rey síi cu'naj̄ Faraón ni'yaj̄ so' man José, ne síi sa' ndo'o avii raá guun José rihaan Faraón, qui'yaj̄ Diose a. Gaa ne cune' Faraón man José se vaa guun chij̄ José rihaan rej Egiptó, ne ndaa rihaan nu' ve' tucua' Faraón guun chij̄ José a.

¹¹ "Gaa ne cachén ndo'o x'naa nu' rej Egiptó do', rej yo'óo cu'naj̄ Canaán do', ne quiran' ndo'o nij yuvī sayuun, ne xii ní' ro', ne guun nucuāj̄ nij so'

quiri' nij so' se cha nij so' ma'.

¹² Gaa ne cuno Jacob nana se vaa vaa 'núú trigó ane' rej Egiptó, ne che'é dan tihaj yuun ca'née so' man nij ta'níi so' ca'anj nij so' nano' nij so' 'núú trigó a.

¹³ Dan me se quisij vij ca'anj nij so' rej Egiptó, gaa ne cataj xna'anj José rihaan nij so' se vaa tinúú nij so' me so', gaa ne dan me se xcaj Faraón cuentá me rej cavii José a.

¹⁴ "Gaa ne ca'née José nana rihaan rej so' Jacob se vaa ca'anj nij tuvi' Jacob cayáan nij so' rej Egiptó, ne dan me se va'nuj chihaa xnu' yuvii me nij tuvi' Jacob yo' a.

¹⁵ Gaa ne dan me se ca'anj Jacob rej Egiptó a. Cachén doj, gaa ne cavi' so', ne cavi' nij ta'níi so' xii ní',

¹⁶ gaa ne ca'anj nicaj nii man cúú man nij so' ndaa chuman' cu'naj Siquem, ne dan me se cachin' nii man cúú man nij so' rque yu'uj yuvej aj quiránj Abraham rihaan nij ta'níi síi cu'naj Hamor rej chuman' Siquem yo' a.

¹⁷ "Dan me se gaa quinichrun' güii quisij ya nu' nana aj cata' tu'va Diosé rihaan Abraham gaa naá, ne dan me se xna'anj nij yuvii israelitá yo' rej Egiptó, ne guun rij ndo'o doj nij so' a.

¹⁸ Danj qui'yaj nij so' ndaa se catúj yo'ó síi nicaj suun rey yo'óó Egiptó, ne ne ne'en so' a doj che'é síi cu'naj José a ma'.

¹⁹ Ne so' me síi tiha' yu'unj man tuvi' ní' nij yuvii israelitá, ne tucuxru' so' man xii ní' nij yuvii israelitá yo' a. Dan me se ca'ne' so' suun se vaa quiri'ij nii man ta'níi nij yuvii israelitá ne'ej leé no

xe', che'é rej cavì' ta'níi nij so' a.

20 Ne maan tió dan me se ca'ngaa síi cu'naj Moisés, ne caran' rá Diose ni'yaj so' man Moisés, ne rque va'nuj yavii tucuachij rej so' ga nii so' man so' tucua' rej so' a.

21 Gaa ne caxrij yuve roj so' man ne'ej cu'naj Moisés xe' yo'ó rej yanij, gaa ne dan me se nacaj ma'an ta'nij chana Faraón man ne'ej cu'naj Moisés yo', ne tucuachij no' man so' ase 'yá' ga ta'níi ma'an' qui'yaj no' a.

22 Gaa ne tucu'yón nii nu' se nana nij síi man Egiptó nana çu man síi cu'naj Moisés, ne sca' a'mii so' ne sca' 'yaj suun so' a.

23 "Dan me se quisij síi cu'naj Moisés vij chihaa yo', gaa ne guun rá so' ca'anj ni'yaj so' daj ran' nij tuvi' so' nij yuvii israelitá a.

24 Ne dan me se quene'en so' se vaa tucuxru' yo'ó síi man yo'óo Egiptó man 'o síi israelitá a. Che'é dan guun rá síi cu'naj Moisés yo' nayon cuentá che'é tuvi' so' síi israelitá, ne che'é dan go' so' man síi man yo'óo Egiptó yo' a.

25 Gaa ne guun rá síi cu'naj Moisés se vaa xcaj nij tuvi' so' síi israelitá cuentá se vaa Diose racuj man so' tinanii so' man nij so' rihaan nij síi man Egiptó, tzaj ne ne xcaj nij so' cuentá ma'.

26 "Dan me se yo'ó güii me se cuchi' so' rej man nij yuvii israelitá, ne dan me se vij tuvi' nij so' cunu', ne guun rá so' na'mii sa' uún roj so', ne che'é dan cataj so': "Tinuj. Me che'é unu' roj tinuj roj soj ga", taj so' rihaan roj so' a.

27 Ne síi tucuxru' man tuvi' ro', tiguíj ra'a so' man Moisés, ne cataj so': "Taj vaj síi cune' mán so' guun

chij so' rihaan núj ne ca'ne' so' cacun' che'é núj ma'.

²⁸ Ne nihánj me se guun rá so' ticaví' so' manj, ndaa vaa ticaví' so' man síi man yo'óo Egiptó quii na'", taj síi tucuxru' man tuvi' rihaan síi cu'naj Moisés yo' a.

²⁹ Gaa ne che'é se xcaj síi cu'naj Moisés cuentá se vaa cha'nuu ndo'o nana se vaa ticavi' so' man 'o síi man yo'óo Egiptó, gaa ne che'é dan cunanj so', ne ca'anj so' cayáan so' rej cu'naj Madián a. Ne xcaj so' chana, ne ca'ngaa vij ta'níi so' snó'o cunii a.

³⁰ "Dan me se cachén vij chihaa yo', gaa ne rej tacaan nichrun' quij cu'naj Sinaí me se quene'en so' 'o coj aco' ya'an raá, ne curuvi' yo'o se mozó Diose rque ya'an yo' quene'en so' a.

³¹ Ne ca'anj rá Moisés gaa quene'en so' rasuun ya'anj yo', ne guun rá so' quinichrun' so' rihaan coj yo' ni'yaj so' man yo', tzaj ne cuno so' ca'mii síi 'nij ra'a man ní',

³² ne dan me se cataj síi 'nij ra'a man ní': "Unj ro', me Diose noco' nij xii so' gaa naá a. Dan me se Diose noco' síi cu'naj Abraham do', síi cu'naj Isaac do', síi cu'naj Jacob do', mé 'unj á", taj Diose síi 'nij ra'a man ní' cuno Moisés a. Gaa ne kuchu'vi' Moisés ne quiriríj man so', ne ne quisij rá so' ni'yaj so' coj aco' ya'an raá yo' a.

³³ Gaa ne cataj síi 'nij ra'a man ní' rihaan so' a: "Quirií so' canj 'nij tacóo so' á. 'O se yo'óo nicun' so' cuano ro', me yo'óo guee ndo'o adonj.

³⁴ Dan me se ni'yaj 'unj, ne quene'én 'unj sayuun ran' nij yuvij noco' manj rej Egiptó, ne cunoj daj rnúj nij so' che'é sayuun ran' nij so', ne nihánj me se nanij 'unj che'é se me raj tinanii 'unj man nij so'

rihaan sayuun ran' nij so' a. Che'é dan cuva' so', ne ca'nej 'unj mán so' rej Egiptó á”, taj síi 'nij ra'a man ní' rihaan Moisés a.

³⁵”Dan me se xa' Moisés, tzaj ne so' me síi quiri'íj yaníj nij yuvii israelitá man gaa cataj nij so' se vaa taj vaj síi cune' man so' guun chij so' rihaan nij so' ne ca'ne' so' cacun' che'é nij so' ma'. Tzaj ne so' me síi ca'néé ma'an Diose se vaa guun chij so' rihaan nij yuvii israelitá ne quiri'ij so' man nij yuvii israelitá rej guun nij so' mozó rihaan yo'ó yuvii a. Danj qui'yaj Diose ga Moisés gaa quene'en Moisés se mozó Diose yo' rque coj aco' ya'an raq yo' a.

³⁶ Dan me se curihanj nij yuvii israelitá rej cu'naj Egiptó, qui'yaj Moisés, ne qui'yaj ndo'o so' suun sa' nocoo Egiptó do', rej naj na ya'anj cu'naj Na Ya'anj Maree do', rej tacaan vaj nij so' vij chihaa yo' do' a.

³⁷ Ne ma'an Moisés yo' me síi cataj rihaan nij síi israelitá: “Vaa güii, ne yo'o tuvi' soj ro', guun síi nata' se nana Diose, qui'yaj Diose, ne ase vaa 'yáá 'unj ro', danj qui'yaj so' uún a”, taj Moisés rihaan nij yuvii israelitá a.

³⁸”Ne Moisés me síi vaj ga cunudanj nij yuvii israelitá rej tacaan, ne cachéé so' ga se mozó Diose síi ca'mii rihaan so' rej tacaan nichrun' quij cu'naj Sinaí, ne cachéé so' ga nij xii ní' uún, ne so' me síi nata' Diose se nana Diose nana nucuaj rihaan, che'é rej tacuachén so' nana yo' ndaa rihaan ní' a.

³⁹ Tzaj ne ne ca'vej rá nij xii ní' cunq nij so' rihaan Moisés ma'. 'Q se tanáj xco nij so' se nana so', ne guun inanj rá nij so' qui'yaj nij so' ndaa vaa 'yaj nij so' rej Egiptó a.

40 Dan me se cataj nij xii ní' rihaan síi cu'naj Aarón, ne: “Qui'yáá so' ya'anj canoco' ní', gaa ne quitaj yaan ya'anj yo' rihaan ní' cachee ní' á. 'O se xa' Moisés síi qui'yaj curihanj ní' rej cu'naj Egiptó, tzaj ne ne ne'en uxrá núj daj quiran' so' a ma'”, taj nij yuvij rihaan Aarón a.

41 Ne güii dan me se qui'yaj nij yuvij israelitá 'o scúj le'ej, ne guun yo' ya'anj noco' nij so', ne rqué ndo'o nij so' rasuun rihaan ya'anj yo', gaa ne guun niha' rá nij so' ni'yaj nij so' ya'anj qui'yaj ma'an nij so' a.

42 ”Che'é dan guun yanj Diose rihaan nij yuvij israelitá, ne ca'née ra'a Diose man nij so' na'vij nij so' rihaan nij rasuun vaa rej xta', ne dan me se na'vij nij so' rihaan güii do', rihaan yavii do', rihaan nij yati' do' a. Dan me se danj inanj taj nana no rihaan yanj qui'yaj nij síi nata' se nana Diose gaa naá, ne nana yo' taj: “Taj vaj rasuun rqué nij soj sij israelitá rihanj gaa vaj soj rej tacaan vij chihaa yo' ma'. Taj vaj xcuu cacaa rihanj, qui'yaj soj ma'.

43 Tananj cataj soj ve' mantá nuu ya'anj cu'naj Moloc, ne cataj soj yati' chraan, ne guun yo' ya'anj cu'naj Renfán rihaan soj nanj adonj. Dan me se ya'anj qui'yaj ma'an soj na'vij soj rihaan me roj ya'anj yo', ne che'é dan nonaj rej canej soj, ne rej xco chuman' Babilonia cayáán soj, qui'yaj adonj”, taj Diose rihaan nij xii ní' a.

44 ”Dan me se nicaj xii ní' nuvií mantá, ne ve' nata' ma'an Diose nana rihaan nij xii ní' gaa vaj nij so' rej tacaan me ve' yo' a. Ne nuvií mantá yo' ro', qui'yaj Moisés man yo' ndaa vaa cataj xna'anj

Diose rihaan so' a. Dan me se ase vaa nuvií mantá tihaan Diose rihaan Moisés, danj vaa qui'yaj so' a.

45 Ne ca'anj nicaj nij xii ní' ga síi cu'naj Josué man nuvií mantá yo' ndaa to'óo yuvii yaníj, ne dan me se quirii yaníj Diose man nij yuvii yaníj rihaan to'óo nij so', ne catúj nij xii ní', qui'yaj Diose a. Ne nuvií mantá yo' me rej quina'víj nij xii ní' rihaan Diose ndaa se cayáán síi cu'naj David síi nicaj suun rey a.

46 "Ne David ro', guun niha' rá Diose ni'yaj Diose man so', ne cachíin ni'yaj so' rihaan Diose se vaa ca'vej rá Diose cune' so' nuvií nocoo rej na'víj nii rihaan ta'anj síi cu'naj Jacob a.

47 Ne síi cu'naj Salomón me síi cune' nuvií yo' a.

48 Tzaj ne nuveé sijn ne rá ve' une' yuvii me Diose síi 'nij ra'a nu' chumii ma'. 'Q se cataj xna'anj síi nata' se nana Diose se vaa ma'an Diose cataj:

49 "Rej xtá' ro', me chruun xlá sa' táa 'unj, ne yo'óo ro', me rej taj tacój adonj. Che'é dan taj che'é cune' nij soj ve' cané 'unj ma', taj síi 'nij ra'a man ní', ne taj uún so': Taj rej qui'yaj soj naraan rá 'unj ma'.

50 'Q se ma'anj ra'aj qui'yáj nu' nij rasuun nihánj adonj", taj ma'an Diose a.

51 "Dan me se nichraj ndo'o rá soj, ne nuveé sijn niha' rá xcaj cuentá che'é tucuáán sa' me soj ma'. Tananj niganj anó tuvi' soj ga Nimán Diose adonj. Ase vaa qui'yaj xii soj ro', danj 'yaj guee ma'an soj uún nanj á.

52 Dan me se canoco' xii soj man cunudanj nij síi nata' se nana Diose, ne guun rá nij so' qui'yaj nij so' sayuun man nij so', ne ndaa ticavi' nij so' man nij síi nata' che'é síi sa' ca'nej Diose rihaan

chumiĭ nihánĭj tĭnanii man yuviĭ rihaan sayuun ei. Ne sĭí sa' yo' me se guun nij soĭ sĭí tacuachén man so' rihaan nij sĭí taj ri'yunj man ní', ne ndaa ticavi' nij soĭ man so' vaa ei.

⁵³ Dan me se soĭ me sĭí guun rá se vaa se tucuānj Diose ro', me nana cataj xna'anj nij se mozó Diose rihaan soĭ, tzaj ne ne uno soĭ nana yo' ma' —taj sĭí cu'naj Esteban rihaan nij sĭí uun chij rihaan nij yuviĭ israelitá a.

Nana nihánĭj taj xna'anj daj qui'yaj nii gaa ticavi' nii man sĭí cu'naj Esteban a

⁵⁴ Dan me se gaa cuno nij sĭí uun chij rihaan nij yuviĭ israelitá nana vaa danĭj, gaa ne cuyanj rá nij so', ne ndaa chá ruj ma'an nij so' tu'va nij so' ni'yaj nij so' man Esteban a.

⁵⁵ Tzaj ne Esteban ro', caraa ndo'o Nimán Diose nimán so', ne dan me se ni'yaj so' rej xta', ne quene'en so' rej ve'é ndo'o vaa rej nicun' Diose, ne quene'en so' se vaa nicun' Jesucristó rej x'núú Diose rej nuva' Diose a.

⁵⁶ Gaa ne cataj sĭí cu'naj Esteban a:

—Nihánĭj me se nax'núĭj rej xta' ni'yaj 'unj, ne ne'éen 'unj man sĭí ca'née Diose nĭcaj yu'unĭj man yuviĭ se vaa nicun' so' rej x'núú Diose rej nuva' Diose á —taj so' no nij sĭí uun chij a.

⁵⁷ Gaa ne nucuaj ndo'o caguáj nij so', ne caráán ra'a nij so' xrée nij so', che'é rej ne ca'veĭj daj chihaa mĭj rá nij so' cunō nij so' a doĭ se nana Esteban a ma'. Gaa ne cunánĭj cunudanĭj nij so' ndaa rej nicun' Esteban, ne quita'aa cunudanĭj nij so' man so',

⁵⁸ ne quirii nij so' man Esteban rque chuman' Jerusalén yo', ne guun che'e nij so' go' nij so' yahij man Esteban a. Dan me se nij síi caraa cacun' xráá Esteban me se cuchruj nij so' sagan' nij so' rihaan yo'óó rej nicun' 'o síi tachruu cu'naj Saulo a.

⁵⁹ Gaa ne go' ndo'o nij so' yahij man Esteban, ne cachín ni'yaj so' rihaan Jesucristó, ne cataj so':

—Nihánj me se nacaj so' nimanj, Jesucristó Síi Chij —taj so', cachín ni'yaj so' rihaan Jesucristó a.

⁶⁰ Gaa ne canicun' ruj so', ne nucuaj ndo'o caguáj so', cataj so':

—Se caraa so' cacun' nihánj xráá nij so', man Síi Chij —taj so', gaa ne cavi' so' a.

8

¹ Ne síi cu'naj Saulo yo' ro', cunaj quiran' Esteban rá so' a.

Nana nihánj taj xna'anj che'é sayuun qui'yaj síi cu'naj Saulo man nij yuviü cuchumán rá ni'yaj man Jesucristó a

Ne güii dan me se guun che'e nii qui'yaj ndo'o nii sayuun man nij síi cuchumán rá ni'yaj man Jesucristó síi ne chuman' Jerusalén a. Dan me se cunánj nij so' chuman' Jerusalén, ne ca'anj nij so' ndaa nu' estadó Judea do', estadó cu'naj Samaria do' a. Tzaj ne orún' ma'an nij apóstol cune' Jesucristó man nata' se nana so' ro', me nij síi yo'o quináj chuman' Jerusalén a.

² Ne dan me se ta'aj nij síi sa' nimán cachin' man Esteban, ne ta'vee uxrá nij so' che'é se vaa cavi' so' a.

³ Tzaj ne síi cu'naj Saulo me se síi taj ri'yunj man nij síi cuchumán rá ni'yaj man Jesucristó me so',

ne ticavi' so' man nij sí noco' man Jesucristó a. Dan me se cuحي' so' ve' ne 'o 'o nij sí noco' man Jesucristó, ne quita'aa so' man nij so', ne dan me se nu' snó'o nu' chana nu' quita'aa so', ne caxrj so' taga' man nij so' a.

Nana nihanj taj xna'anj se vaa cuحي' se nana Diose chuman' cu'naj Samaria a

⁴ Dan me se nij sí cunanj me se chée ndo'o nij so' nata' nij so' se nana Diose nana sa' rihaan yuvij a.

⁵ Ne sí cu'naj Felipé ca'anj chuman' Samaria, ne ca'mii natáj so' se nana Jesucristó rihaan nij yuvij man chuman' yo' a.

⁶ Gaa ne cuno nij sí man chuman' Samaria se nana Felipé, ne quene'en nij so' nij suun sa' noco qui'yaj so', ne che'é dan guun niha' ndo'o rá cunudanj nij so' cuno nij so' se nana Felipé a.

⁷ Dan me se que'ee nij nana chree curihanj nimán yuvij, qui'yaj so', ne nucuaj caguáj nij nana chree yo' gaa curihanj nij yo' a. Ne quinahuun que'ee nij sí ran' do', que'ee nij sí rengo do',

⁸ ne che'é dan guun niha' uxrá rá nij sí ne chuman' Samaria yo' a.

⁹ Ne dan me se gaa ataa cuحي' Felipé chuman' Samaria, ne vaa 'o snó'o cu'naj Simón chuman' yo', ne Simón me se qui'yaj chruun ndo'o so', ne ca'anj rá nij sí ne Samaria, qui'yaj so' a. Ne cataj so' rihaan nij yuvij se vaa sí sa' uxrá me ma'an so',

¹⁰ ne cunudanj nij yuvij caráya'anj uxrá se vaa qui'yaj so', ne dan me se nu' nij sí noco' do', nu' nij sí uun chij do', cataj se vaa me so' sí ata ndo'o rej nucuaj, qui'yaj ma'an Diose, taj nij so', ni'yaj nij so' man Simón a.

11 Dan me se sa' ndo'o nanó xrej nij yuviij daj taj so', che'é se sa' ndo'o qui'yaj chruun so', ne ca'anj rá nij so', qui'yaj Simón a.

12 Dan me se gaa nata' Felipé se nana Diose nana sa' che'é suun uun chij Diose rihaan chumiij nihánj do', nana che'é Jesucristó do', ne cuchumán rá nij yuviij nana yo', ne cata' ne snó'o do', chana do', che'é Jesucristó a.

13 Ne ndaa ma'an Simón cuchumán rá nana yo', ne cata' ne so', ne canoco' so' xcó Felipé, ne ca'anj rá ma'an so' uun gaa quene'en so' nij suun sa' nocoo qui'yaj suun Felipé a.

14 Dan me se cuhi' nana rihaan nij apóstol síi cune' Jesucristó man nata' se nana so' síi ne chuman' Jerusalén se vaa cuchumán rá nij síi man chuman' Samaria se nana Diose, ne che'é dan ca'née nij so' man Pedró do', man Juan do', se vaa cuhi' roj so' rihaan nij síi ne chuman' Samaria,

15 ne dan me se cuhi' roj so', gaa ne cachíin ni'yaj roj so' rihaan Diose che'é nij síi cuchumán rá ni'yaj man Jesucristó yanj chuman' Samaria se vaa catuu Nimán Diose nimán nij so' qui'yaj Diose a.

16 'O se ataa catuu Nimán Diose nimán nij so' a. Maan se tihaj cata' ne uun nij so' che'é Jesucristó sij 'nij ra'a man ní' a.

17 Dan me se cuta' ra'a Pedró ga Juan raaj nij síi cuchumán rá ni'yaj man Jesucristó yanj chuman' Samaria, gaa ne catúj Nimán Diose nimán nij so' a.

18 Dan me se quene'en síi chruun cu'naj Simón se vaa gaa cuta' ra'a Pedró ga Juan raaj yuviij, ne catúj Nimán Diose nimán nij yuviij yo', ne che'é dan rquee so' sa'anj rihaan roj so',

19 ne cataj so':

—Rque 'unj sa'anj man roj soj, ne rque roj soj rej nucuj nicaj roj soj mán 'unj, ne me ma'an 'o sí cuta' 'unj ra'aj raá, ne ca'vee catuú Nimán Diose nimán nij so', qui'yaj roj soj á —taj so' rihaan roj so' a.

20 Gaa ne cataj Pedró rihaan so' a:

—Tadó so' se cacaa so' rihaan ya'an ga se sa'anj so' á. Me che'é guun rá so' se vaa ane' se rqué uun Diose ga.

21 Daj chihaa mój se ca'vee qui'yáá so' danj ma'. Ne vaa nica a doj nimán so' rihaan Diose a man adonj.

22 Vaa che'é canicaj nimán so' tanáj so' tucuáán chi'ij noco' so' nihánj, gaa ne cachinj ni'yáá so' rihaan Diose sí 'nij ra'a man ní' sese ca'vee caraa x'naa so' ndaa vaa guun rá so' á.

23 'O se cuano nihánj me se xcaj 'unj cuentá se vaa vaa chi'ij nu' nimán so' ei —taj Pedró rihaan Simón yo' a.

24 Gaa ne cataj Simón:

—Cachinj ni'yaj roj soj rihaan Diose sí 'nij ra'a man ní' che'é 'unj se gaa nanj quirán' 'unj a doj se vaa cataj roj soj ruguanj —taj so' rihaan roj so' a.

25 Dan me se nata' ndo'o roj so' se nana Diose sí 'nij ra'a man ní', gaa ne quinan' roj so' chuman' Jerusalén, ne nata' roj so' se nana Diose nana sa' rque que'ee chuman' naj estadó cu'naj Samaria a.

Nana nihánj taj xna'anj se vaa cuchumán rá 'o sí eunuco cavii rej cu'naj Etiopía ni'yaj so' man Jesucristó a

26 Gaa ne ca'mii yo'o se mozó Diose rihaan síi cu'naj Felipé, cataj so':

—Cavii so', ca'anj so' rej sur ndaa chrej avii chuman' Jerusalén 'anj ndaa chuman' Gaza á —taj se mozó Diose rihaan Felipé a.

Dan me se chrej vaj rej tacaan inanj me chrej yo' a.

27 Dan me se cavii Felipé, ca'anj so', ne gaa vaj so' chrej yo', ne quene'en so' 'o síi eunuco cavii yo'óo cu'naj Etiopía, ne síi nuu rihaan chana reiná cu'naj Candace uun chij rihaan nu' yo'óo Etiopía me síi eunuco yo' a. Ne síi tumé nu' se sa'anj chana reiná yo' me so' a. Dan me se aj ca'anj so' chuman' Jerusalén na'vij so' rihaan Diose,

28 ne nihánj me se nan' so' chiháán so', ne táá so' cuchri' nucuaj cuayó, ne nayaa so' nana cachrón síi cu'naj Isaías síi nata' se nana Diose gaa naá rihaan yanj a.

29 Gaa ne dan me se cataj Nimán Diose rihaan Felipé a:

—Cuchi' so' rihaan cuchri' nucuaj cuayó 'na' nihánj, ne cachee so' rej x'núú cuchri' yo' á —taj Nimán Diose rihaan Felipé a.

30 Dan me se cunanj Felipé rej x'núú cuchri', gaa ne cuno so' se vaa nayaa síi taj cuchri' se nana síi cu'naj Isaías síi nata' se nana Diose gaa naá a. Ne xná'anj Felipé man so', cataj Felipé:

—Ne ya uxrá unó so' nana nayaa so' na' —taj Felipé, xná'anj so' man síi eunuco yo' a.

31 —'O se asa' ca'vee cunoj nana nihánj rá so', ne nuvi' síi tucu'yón nana nihánj manj ga —taj síi eunuco yo' rihaan Felipé, gaa ne canacúún síi

eunuco man Felipé se vaa cavii Felipé cuchri' ne quitaj so' rej x'núú sí eunuco yo' a.

³² Dan me se nana nayaa sí eunuco yo' ro', me nana nihánj a: “Ase vaa dínj tu'va matzinj gaa uchi' xo' rihaan sí ticavj' man xo' do', ase vaa dínj tu'va matzinj le'ej gaa uchi' xo' rihaan sí caca cachij xráá xo' do', danj qui'yaj so', ne a doj nana ne ca'mii so' ma'.

³³ Dan me se caxrij na'aj ndo'o nii man so', ne maan che'é se naqui'yaj nica' so' nimán so', ne taj ca'ne' sa' cacun' che'é so' ma'. Tzaj ne a doj yuvii se guun nucuaj cataj xna'anj che'é cunudanj nij sí noco' xna'anj tuvi' ga so', che'é se ne xna'anj so' a ma'. 'O se ne vaj so' rihaan chumii nihánj cuano ma'”, taj se nana sí cu'naj Isaías nana nayaa sí eunuco yo' a.

³⁴ Dan me se xná'anj sí eunuco yo' man Felipé, cataj so':

—Me sí me sí quiran' nu' ndaa vaa taj xna'anj sí nata' se nana Diosé nihánj ga. Ma'an sí nata' se nana Diosé quiran' danj na'. Yo'ó so' xa' —taj sí eunuco, xná'anj so' man Felipé a.

³⁵ Gaa ne guun che'e Felipé cataj xna'anj so' daj taj ma'an nana yo' nana nayaa sí eunuco yo', gaa ne nata' so' nu' se nana Jesucristó nana sa' rihaan sí eunuco yo' a.

³⁶ Dan me se gaa vaj roj so' chrej, ne cuchí roj so' rej nuu doj na, gaa ne cataj sí eunuco:

—Ni'yaj so' ei. Nihánj me nuu na á. Ne ca'vee cata' ne 'unj na' —taj so', xná'anj so' man Felipé a.

³⁷ Gaa ne cataj Felipé rihaan so' a:

—Sese ya ya amán rá so' ni'yaj so' man Jesucristó, ne ca'vee a —taj Felipé rihaan so' a.

Gaa ne cataj síi eunuco rihaan Felipé a:

—Amán rá 'un̄j se vaa ta'níi Diose me Jesucristó ei —taj so' rihaan Felipé a.

³⁸ Gaa ne ca'ne' síi eunuco suun se vaa canicun' cuchri', gaa ne nanij roj so' rihaan yo'óó, gaa ne ca'an̄j roj so' rej nuu na, gaa ne cuta' ne Felipé man síi eunuco yo' a.

³⁹ Dan me se gaa curihan̄j roj so' rá na, gaa ne naxcaj Nimán Diose man Felipé, ne ne quene'en uún síi eunuco yo' man Felipé a ma'. 'Q se cavii síi eunuco yo', quinan' so', ne guun niha' rá so' a.

⁴⁰ Ne Felipé me se aj nuû so' chuman' Azoto a. Gaa ne nu' nij chuman' naj rej vaj so' ro', nata' so' se nana Diose nana sa' rihaan nij síi ne nu' nij chuman' yo', ne dan̄j qui'yaj so' ndaa se cuchí' so' chuman' Cesarea a.

9

Nana nihánj taj xna'an̄j daj quiran' síi cu'naj Saulo gaa canicaj nimán so' qui'yaj Jesucristó a

¹ Dan me se síi cu'naj Saulo me se 'o guun rá so' qui'yaj so' sayuun man nij síi noco' se nana Diose sij 'nij ra'a man ní' ne ndaa guun rá so' cavi' nij so', ne che'é dan canoco' uxrá so' man nij síi noco' man Jesucristó a. Ne ca'an̄j so' rej ne xrej ata suun noco doj,

² ne naxcaj so' yanj actá rihaan xrej, ne yanj actá yo' ro', ca'an̄j chuman' Damasco rihaan nij síi 'nij ra'a ve' tucu'yón nij yuvīj israelitá se tucuan̄j Moisés a. Ne taj xna'an̄j yanj yo' rihaan nij so' se vaa sese narí' Saulo man nij síi noco' man Jesucristó, ne se snó'o se chana se n̄o xcúún so' numíj so' man nij so' ne ca'an̄j n̄icaj so' man nij so'

ndāa chuman' Jerusalén caxrii so' man nij so' taga' a.

³ Dan me se nicaj Saulo yanj, ne vaj so' chrej, ne quinichrun' so' chuman' Damasco yo', ne taj ni'yón cuchuguun nu' xta' nu' anicaj rej nicun' so' a.

⁴ Gaa ne quiniy so' rihaan yo'óó, ne dan me se cuno Saulo se vaa cataj yo'ó so' rihaan so':

—Cunó so' ca'mij, Saulo. Me che'é 'yáá so' sayuun manj ga —taj nana cuno Saulo a.

⁵ Gaa ne xná'anj Saulo man síi ca'mii rihaan so', cataj so':

—Síi Chij, me síi mé so' ga —taj so', xná'anj so' a.

Gaa ne síi ca'mii rihaan so' cataj:

—'Uñj ro', me Jesús, ne 'yaj ndo'o so' sayuun manj adonj.

⁶ Tzaj ne naxagaa so' ca'anj so' ndaa chuman' Damasco, gaa ne cataj nii rihaan so' daj qui'yáá so' á —taj Jesucristó rihaan Saulo a.

⁷ Ne nij snó'lo vaj chrej ga Saulo me se canicun' nij so', ne a doj nana ne ca'mii nij so' a ma'. Ne cuno nij so' nana yo', tzaj ne taj a 'ó rasuun ne quene'en nij so' a ma'.

⁸ Ne Saulo me se naxumaan so', ne nuxra' so' rihaan so', tzaj ne taj se qui'yá' quene'en so' ma'. Yuun che'e caráán rihaan so' nanj adonj. Gaa ne quita'aa yo'ó nij so' ra'a so', ne racuíj nij so' man Saulo chéé Saulo, ne ca'anj nij so' chuman' Damasco a.

⁹ Ne quisij va'nuy güii ne ca'vee quene'en so' ma'. Ne ne cha so' ne ne co'ó so' na a ma'.

¹⁰ Dan me se chuman' Damasco ro', yáán 'ó síi tucu'yón se nana Jesucristó, ne Ananías cu'naj so'

a. Ne naqui'yaa Diose sij 'nij ra'a man ní' rihaan so', ne cataj so' a:

—Cunó so' ca'mij, Ananías —taj Diose sij 'nij ra'a man ní' no so' a.

—Nihánj né 'unj unó 'unj a'mii so' á —taj Ananías rihaan Diose sij 'nij ra'a man ní' a.

¹¹ Gaa ne cataj Diose sij 'nij ra'a man ní' rihaan Ananías a:

—Canicun' cayá so' ca'anj so' callé cu'naj Callé Nica, ne cuchí' so' ve' tucúa sítí cu'naj Judas, ne nano' so' 'o sítí cu'naj Saulo sítí cavii chuman' Tarso á. 'O se cuano nihánj me se achíin ni'yaj so' rihanj,

¹² ne dan me se gaa cachíin ni'yaj so' ne naqui'yaa 'o sítí cu'naj Ananías rihaan so', qui'yáj adonj. Ne catúj Ananías yo' rihaan so', ne cuta' ra'a so' raá Saulo, che'é rej ca'vee curuvi' uún rihaan so' qui'yáj a —taj Diose sij 'nij ra'a man ní' rihaan Ananías a.

¹³ Gaa ne cataj Ananías rihaan Diose sij 'nij ra'a man ní' a:

—Tzaj ne aj cataj xna'anj ndo'o nii rihanj che'é sítí nihánj, Sítí Chij. 'O se aj qui'yaj chi'ii ndo'o so' man nij sítí sa' nocó' mán so' nij sítí yanj chuman' Jerusalén,

¹⁴ ne nihánj me se veé danj nicaj so' yanj actá che'é rej numíj so' man cunudanj núj sij achíin ni'yaj rihaan so', qui'yaj nij xrej ata' suun nocoo doj adonj —taj Ananías a.

¹⁵ Gaa ne cataj Diose sij 'nij ra'a man ní' rihaan so' a:

—Ca'anj so' cuaj ei. 'O se aj narii 'unj man so' qui'yaj suun so' rihanj, ne xcaj nij sítí yaníj do', nij

sí nicaj suun rey do', ma'an nij sí israelitá do', cuentá che'é 'unj, qui'yaj so' adonj.

¹⁶ 'O se 'unj me sí cataj xna'anj rihaan so' che'é nu' sayuun no xcuún so' quiran' so', che'é yan nata' so' rihaan yuvij che'ej adonj —taj Diose sij 'nij ra'a man ní' rihaan Ananías a.

¹⁷ Dan me se ca'anj Ananías, ne catúj so' rá ve' yo', ne cuta' ra'a so' raá Saulo, ne cataj so':

—Diose sij 'nij ra'a man ní' ca'née manj ca'naj rihaan so' nihánj, tinuj. Ne so' ro', me Jesucristó sí quene'én so' gaa vaj so' chrej gaa ca'ná' so' nihánj ei. Ne me rá so' curuvi' uún rihaan so' ne catuú ndo'o Nimán Diose nimán so' ei —taj Ananías rihaan so' a.

¹⁸ Nu' ca'mii so' danj, ne nu' cayuu 'o rasuun rihaan Saulo, ne ase vaa 'o nuj catun' ro', danj vaa se cayuu rihaan so', ne curuvi' rihaan Saulo, ne canicun' caya so', ne cata' ne so' a.

¹⁹ Ne chá so' chraa, ne nari' nucuj rá so' a.

Nana nihánj taj xna'anj se vaa ca'mii natáj Saulo se nana Jesucristó chuman' Damasco a

Dan me se cayáan Saulo doj güii ga nij sí tucu'yón se nana Jesucristó yanj chuman' Damasco,

²⁰ ne nu' ca'anj so' nij ve' tucu'yón nij yuvij israelitá se tucuanj Moisés, ne ca'mii natáj so' rihaan nij so' se vaa Jesucristó ro', ta'níi ya Diose me so' a.

²¹ Ne cunudanj nij sí cuno se nana Saulo ro', caráya'anj ndo'o nij so' se nana so', ne cataj nij so':

—Tzaj ne nuveé sij nihánj me sí taj ri'yunj man nij sí yanj chuman' Jerusalén achíin ni'yaj rihaan Jesucristó, ne ca'na' so' ndaa nihánj che'é rej me

rá so' numíj so' man nij so' ne ca'anj nıcaj so' man nij so' rihaan nij xrej ata suun nocoo doj, rá so' na' —taj nij síi cuno se nana Saulo rihaan tuvi' nij so' a.

²² Tzaj ne doj a nucuaj nata' so' se nana Jesucristó rihaan nij yuviı israelitá yanj chuman' Damasco, ne ve'é tihaan so' rihaan nij so' se vaa Jesucristó me síi ca'née Dioso tinanii man yuviı rihaan sayuun, ne ndaa cunuu dınj tu'va nij so', qui'yaj so' a.

Nana nihánj taj xna'anj se vaa quinanii Saulo rihaan nij yuviı israelitá guun rá ticavi' man so' a

²³ Dan me se cachén que'ee güii, gaa ne cavii raaj nij yuviı israelitá daj qui'yaj nij so' ne ca'vee ticavi' nij so' man Saulo a.

²⁴ Tzaj ne xcaj Saulo cuentá daj guun rá nij so' qui'yaj nij so' man so', ne dan me se nuviı nigan' tumé ndo'o nij yuviı israelitá ta'yaa chingá yahij taj rej atúj yuviı chuman' yo', che'é rej me rá nij so' nari' nij so' man Saulo ne ticavi' nij so' man Saulo, rá nij so' a.

²⁵ Che'é dan nij síi tucu'yón se nana Saulo ro', ca'née nij so' man Saulo rá 'o scaa xij, ne rej niı tacuachén nij so' man Saulo rque ta'yaa le'ej taj chingá yahij aráan tu'va chuman', ne tananij nij so' man Saulo rihaan yo'óó xe', ne dan me se quinanii so' a.

Nana nihánj taj xna'anj se vaa ve'é ca'mii nij síi tucu'yón se nana Jesucristó yanj chuman' Jerusalén ga Saulo a

²⁶ Dan me se cuchi' Saulo chuman' Jerusalén, ne guun rá so' cunuu chre' so' ga nij síi tucu'yón se

nana Jesucristó, tzaj ne cuchu'vi' cunudanj nij so' ni'yaj nij so' man Saulo a. 'O se ne cuchuman rá nij so' ni'yaj nij so' se nana Saulo se vaa sij tucu'yón se nana Jesucristó me so' a.

27 Che'é dan nicaj síi cu'naj Bernabé man so', ca'anj so' rihaan ma'an nij apóstol cune' Jesucristó man nata' se nana so', ne nata' Bernabé rihaan nij so' daj guun gaa quene'en Saulo man Jesucristó sij 'nij ra'a man ní' gaa vaj so' chrej ne ca'mii so' ga Jesucristó sij 'nij ra'a man ní', ne nata' uún Bernabé daj qui'yaj Saulo chuman' Damasco gaa ca'mii natáj so', ne ne cuchu'vi' so' a doj ca'mii natáj so' rihaan nij yuvií che'é Jesucristó, taj Bernabé a.

28 Dan me se guun che'e nij so' ve'é ca'mii nij so' ga Saulo, ne 'o vaj so' ga nij so' a. Ne ca'mii natáj so' se nana Jesucristó síi 'nij ra'a man ní' rihaan nij síi man chuman' Jerusalén, ne a doj ne cuchu'vi' so', ne nucuaj ca'mii natáj so' rihaan nij yuvií a.

29 Dan me se ca'mii so' ga nij síi israelitá a'mii xna'ánj griego, ne canó tuvi' nij so' ga so' a. Tzaj ne nij so' ro', guun rá ticavi' man so' a.

30 Dan me se xcaj nij tinuj nij síi noco' man Jesucristó cuentá se vaa guun rá yo'ó nij síi israelitá ticavi' nij so' man Saulo, ne che'é dan ca'anj nicaj nij so' man Saulo ndaa chuman' Cesarea, gaa ne ca'néé nij so' man so' ndaa chuman' Tarso a.

31 Veé dan me se dínj yáán cunudanj nij síi cuchumán rá ni'yaj man Jesucristó yanj nu' estadó Judea do', Galilea do', Samaria do' a. Dan me se caráj cochroj ndo'o nij so' rihaan Diose sij 'nij ra'a man ní', ne che'é dan ve'é doj nari' nij so' canoco' nij so' se tucuaj so' a. Ne Nimán Diose tucu'yón

man nij so' daj qui'yaj nij so', ne che'é dan guun rii ndo'o nij so' doj a.

Nana nihánj taj xna'anj se vaa quinahuun sa' sí cu'naj Eneas, qui'yaj Jesucristó, gaa ca'mii Pedró ga so' a

³² Dan me se chéé sí cu'naj Pedró nu' rej ne nij sí sa' noco' man Diose, ne dan me se cuchí' so' ndaa rihaan tinúú nij so' ne chuman' Lida,

³³ ne chuman' Lida ro', nari' so' 'o sí cu'naj Eneas, ne so' me se aj quisíj tunj ya yo' yo'o naj so' rihaan yuvéé, ne 'o sí taj se 'yá' cachee me so',

³⁴ ne dan me se cataj Pedró rihaan so':

—Cuanó nihánj me se nahuun sa' so', 'yaj Jesucristó, Eneas. Naxagaa so' cuaj, ne nacue so' tuvéé so' cuaj ei —taj Pedró rihaan so', ne nu' ca'mii Pedró danj, ne nu' naxumaan caya so' canicun' so' a.

³⁵ Gaa ne quene'en cunudanj nij sí yanj chuman' Lida do', nij sí yanj taa cu'naj Sarón do', ndaa vaa nahuun sa' sí cu'naj Eneas yo', gaa ne che'é dan canicaj nimán nij so' canoco' nij so' man Diose sij 'nij ra'a man ní' a.

Nana nihánj taj xna'anj se vaa cunuu i'na' uún chana cu'naj Dorcas, qui'yaj Pedró a

³⁶ Dan me se chuman' Jope yáán 'o chana tucu'yón se nana Jesucristó, ne Tabita cu'naj no' xna'ánj hebreo, ne Dorcas me se chuvii no' xna'ánj griego a. Ne chana qui'yaj inanj se sa' me no', ne rque ndo'o no' rasuun man nij sí nique,

³⁷ ne güii dan me se canó chi'ii man no', ne quiran' ndo'o no', ne cavi' no' a. Ne tucuanee nii man no', ne cuchruj nii man no' rque ve' nata',

38 ne dan me se nichrun' naj chuman' Lida ga chuman' Jope, ne cuchí' nana rihaan nij sí tucuyón se nana Jesucristó yanj chuman' Jope se vaa vaj Pedró chuman' Lida yo', ne che'é dan ca'née nij so' man vij snó'o cuchí' roj so' rihaan Pedró a. Dan me se cuchí' roj so' rihaan Pedró, ne cataj roj so':

—Se guun raan so' cuchí' so' rihaan núj sij yanj chuman' Jope ma' —taj roj so' rihaan Pedró a.

39 Gaa ne naxumaan Pedró, ne ca'anj so' cuaj ga roj so' a. Ne gaa cuchí' nij so' chuman' Jope, ne ca'anj nicaj nij so' man Pedró rá ve' nata' naj chana cavi' cu'naj Dorcas, ne ca'na' cunudanj nij chana cavi' nicá rihaan Pedró, ne ta'vee nij no', ne tihaan nij chana rihaan Pedró cunudanj nij yatzíj qui'yaj Dorcas gaa vaa i'na' no' a.

40 Dan me se quirii Pedró man cunudanj nij no' xe', gaa ne canicun' ruj so', ne cachín ni'yaj ndo'o so' rihaan Diose a. Gaa ne canicaj so', cataj so' rihaan cúu man chana a:

—Naxagaa so', Tabita —taj so' rihaan no' a.

Gaa ne naxra' rihaan no', ne gaa quene'en no' man Pedró, ne ca'anj cane caya no',

41 ne quita'aa Pedró ra'a no', ne naxumaan no', qui'yaj so' a. Gaa ne canacúun so' ca'na' nij chana cavi' nicá do', yo'ó nij sí sa' noco' man Diose do', ne tihaan so' man ní cu'naj Dorcas rihaan nij so' se vaa cunuu i'na' uún no' a.

42 Dan me se cuchí' nana che'é Dorcas rihaan cunudanj nij sí ne chuman' Jope, ne che'é dan que'ee nij sí man Jope cuchumán rá ni'yaj man Diose sij 'nij ra'a man ní' a.

⁴³ Dan me se guun raan Pedró que'ee güii chuman' Jope, ne dan me se tucúa 'o síí cu'naj Simón caran' so' que'ee güii, ne síí naqui'yaj larūu nuj xcuu me Simón yo' a.

10

Nana nihánj taj xna'anj se vaa cuchi' se nana Jesucristó rihaan nij tuvī' síí yanj cu'naj Cornelio a

¹ Dan me se yáán 'o síí cu'naj Cornelió chuman' Cesarea, ne síí 'nij ra'a 'o ta'aj x'ne' tanuu cu'naj italiano me so' a. Dan me se nuveé sij israelitá me so', maan se sij yanj me so',

² ne sij ve'é ndo'o noco' man Diose me so', ne aráj cochroj ndo'o so' rihaan Diose, ne ase vaa 'yaj so' ro', danj 'yaj nij tucua so' uún a. Ne rqué ndo'o so' caridad rihaan nij yuvij, ne niganj cachíín ni'yaj so' rihaan Diose a.

³ Dan me se aga' va'nuj rej ca'anj güii ta' asuun me se naqui'yaa ranga' yo'o se mozó Diose rihaan so', ne catúj se mozó Diose yo' rej nicun' so', ne cataj se mozó Diose:

—Cornelio —taj se mozó Diose no so' a.

⁴ Gaa ne ni'yaj uxrá Cornelió man se mozó Diose yo', ne cucu'vi' ndo'o so', ne cataj so':

—Me che'é nacúún so' manj, ga —taj so', xná'anj so' man se mozó Diose yo' a.

Gaa ne cataj se mozó Diose rihaan so' a:

—Aj xcaj Diose cuentá che'é nana achíín ni'yáá so' rihaan Diose, ne aj xcaj Diose cuentá che'é caridad 'yáá so' a. Che'é dan nuu rá Diose mán so' a.

⁵ Ne nihánj me se ca'nej so' snó'o ca'anj chuman' Jope, ne nacunj nij so' ca'na' 'o síí cu'naj Simón Pedró nihánj á.

⁶ Ne so' me se aran' so' ve' tucúa yo'ó síí cu'naj Simón síí naqui'yaj laruu nuj xcuu síí ne tu'va na ya'anj a —taj se mozó Diose rihaan Cornelió a.

⁷ Dan me se ca'anj uún se mozó Diose yo', gaa ne canacúún Cornelió ca'na' vj se mozó ma'an so' do', yo'o tanuu nocó' man Diose ga so' do',

⁸ ne ca'na' va'nuj nij so', ne cataj xna'anj so' rihaan nij so' se vaa cataj se mozó Diose rihaan so', gaa ne ca'néé so' man nij so' ca'anj nij so' chuman' Jope nano' nij so' man síí cu'naj Simón Pedró a.

⁹ Ne yo'ó güii me se vaj va'nuj nij so' chrej, ne maan orá quinichrun' nij so' chuman' Jope me se cavii Pedró xráá ve' caran' so', cachinj ni'yaj so' rihaan Diose, ne caxuj me yo',

¹⁰ ne dan me se quina'aan rque so', ne guun rá so' chá so' chraa a. Ne tihaj 'yaj chuvii nij síí man rá ve' chá so', ne maan orá dan naqui'yaa 'o rasuun rihaan Pedró a.

¹¹ Dan me se quene'en so' se vaa naxra' rej xta', ne nanij yo'o rasuun rihaan yo'óó, ne ase vaa 'o yatzíj mantá caxra' ndo'o vaa yo', ne vaa ca'anj scúj yatzíj mantá yo' a.

¹² Ne nuu cunudanj nij xcuu vaa ca'anj tacóó do', nij xcuu nucuj rij man do', nij xtâj do', yo'ó nij xcuu vaa tachrij xráá do', nuu rque yatzíj mantá yo' a.

¹³ Gaa ne cuno Pedró nana ca'mii yo'o so' rihaan so' a:

—Naxumaan so', Pedró. Ticaví' so' man nij xcuu yo', ne chá so' nee á —taj nana yo' cuno Pedró a.

14 Gaa ne cataj Pedró:

—Se guun ma'. Daj chihaa míj se guun qui'yáj danj, man SÍ Chij. 'O se nuveé xcuu chá me yo' rihaan núj sij israelitá ma'. Maan se xcuu vaa chi'ii me nij xo' rihaan núj nanj á. 'O se nu' ca'na' a doj ne chá 'unj nee xcuu vaa danj a ma' —taj Pedró a.

15 Gaa ne ca'mii uún sí ca'mii rihaan Pedró, cataj so':

—Ne sese Diose me sí cataj se vaa cunuu sa' 'o rasuun, ne se guun cataj so' se vaa chi'ii vaa rasuun yo' rihaan so' ma' —taj uún so' rihaan Pedró a.

16 Gaa ne dan me se quisíj va'núj cuno Pedró nana vaa danj nana ca'mii Diose rihaan so', gaa ne nu' cavii uún nu' yatzíj mantá man xcuu yo' rej xta' a.

17 Dan me se quinanó ndo'o rá Pedró che'é rasuun naqui'yaa rihaan so', ne maan orá dan nari' nij snó'o ca'née sí cu'naj Cornelió ve' tucúa Simón, ne dan me se canicun' nij so' ta'yaa rihaan ve' yo',

18 ne canacúun nij so', xná'anj nij so' sese aran' 'o sí cu'naj Simón Pedró ve' yo' a.

19 Dan me se Pedró ro', nuchruj raá che'é nij rasuun naqui'yaa rihaan so', ne dan me se cataj Nimán Diose rihaan so':

—Nihánj me se ca'na' va'núj snó'o nano' mán so',

20 ne cuaj naxumaan so', nanij so', ne ca'anj so' ga nij so' á. Ne se guun vij rá so', ne se cataj so' se vaa ne nó xcúun so' ca'anj so' ga nij so' ma'. 'O se 'unj nihánj me sí ca'née man nij so' ca'na' nij so' adonj —taj Nimán Diose rihaan Pedró a.

21 Gaa ne nanij Pedró ndaa rej nicun' va'nuj nij snó'o, ne cataj so' rihaan nij so':

—'Unj nihánj me síí nano' nij soj ei. Ne me che'é ca'na' soj nihánj ga —taj Pedró, xná'anj so' man nij so' a.

22 Gaa ne cataj nij so':

—Ca'mii 'o se mozó Diose mozó guee rihaan 'o síí cu'naj Cornelió, ne so' ro', me síí 'nij ra'a 'o ta'aj x'ne' tanuu, ne cunudanj nij yuvij israelitá taj se vaa síí vaa nicá nimán me so' ne síí aráj cochroj ndo'o rihaan Diose me uún so', ne dan me se cataj xna'anj se mozó Diose rihaan so' se vaa nacunj so' mán so' cuchí' so' ve' tucúa so' ne cunó so' nana nata' so' rihaan so' a —taj nij so' rihaan Pedró a.

23 Che'é dan cataj Pedró se vaa catuu nij so' rá ve', ne ve'é ca'mii so' ga nij so' a. Ne ranga' yo'ó güii me se naxagaá nij so', ne ca'anj Pedró ga ya'núj nij so', ne ca'anj doj nij tinuj nij síí cuchumán rá ní'yaj man Jesucristó yanj chuman' Jope do', ga Pedró a.

24 Ne yo'ó güii uún me se catúj nij so' chuman' Cesarea, ne síí cu'naj Cornelió me se na'vij ndo'o so' ca'na' nij so', ne aj canacúún so' man nij tuvi' so' do', man nij síí ca'mii sa' ga so' do', se vaa cunu chre' nij so' rá ve' tucúa so' a.

25 Dan me se gaa guun rá Pedró catuu Pedró rá ve', ne nari' tuvi' Cornelió ga so', ne canicun' ruj Cornelio rihaan Pedró, ne caráj guee Cornelio rihaan so' a.

26 Tzaj ne cataj Pedró rihaan Cornelió:

—Naxumaan so' ei. Taj che'é caraá guee so' rihanj ma'. 'O cuyaan yuvij uun me ní' nanj á —taj Pedró rihaan Cornelió a.

²⁷ Dan me se nanó Pedró cuentó gā Cornelió, ne catúj Pedró rá ve', gāa ne quene'en so' se vaa aj nuu chre' que'ee yuvij rá ve' yo' a.

²⁸ Gāa ne cataj Pedró rihaan nij yuvij:

—Aj ne'en nij soj se tucuanj núj sij israelitá se vaa ne nó xcúún núj catuu núj rej man soj sij yaníj, ne ne nó xcúún núj cunuu chre' núj gā soj ma'. Tzaj ne Diose tihaan rihaan ma'anj se vaa se ca'vee cataj 'unj se vaa nij vaa ta'aj yuvij rihaan so' ma'.

²⁹ Che'é dan gāa canacúún Cornelió nihánj manj, ne ne cataj 'unj se vaa se ca'anj 'unj ma'. Tananj ca'ná' 'unj cuaj nanj ei. Ne nihánj me se cataj xna'anj nij soj rihanj daj me che'é canacúún nij soj manj ca'naj ei —taj Pedró rihaan nij tuvij' Cornelió a.

³⁰ Gāa ne cataj Cornelió rihaan so':

—Cachén ca'anj güii ne maan orá nihánj me ta' asuun, ne aga' va'núj me yo', ne cachíin ni'yáá 'unj rihaan Diose rá ve' tucuj, ne taj ni'yón naqui'yaa 'o snó'o nicun' rihanj, ne yatzij catzij chuguun ma'an nuú so',

³¹ ne cataj so' rihanj a: “Cunó so' ca'mij, Cornelio. Aj cuno Diose nana achíin ni'yáá so' rihaan so', ne Diose me sí nuu rá se vaa rqué ndo'o so' caridad rihaan nij sí nique,

³² ne dan me se ca'nej so' nana ndaa chuman' Jope, ne canacunj so' ca'na' 'o sí cu'naj Simón Pedró nihánj á. Ne so' ro', aran' ve' tucúa 'o sí cu'naj Simón sí naqui'yaj laruu nuj xcuu sí ne tu'va na ya'anj a”, taj snó'o yo' rihanj adonj.

³³ Che'é dan me ra'yanj ca'née 'unj nana rihaan so', ne so' ro', qui'yaj ndo'o se luj che'é núj se vaa ca'ná' so' rihaan núj nihánj ne che'é dan me mán

taran' núj rihaan Diose nihánj cuano, che'é rej me rá núj cuno núj nu' nana cataj xna'anj Diose sí 'nij ra'a man ní' rihaan so' ei —taj Cornelió rihaan Pedró a.

³⁴ Gaa ne guun che'e Pedró ca'mii so' rihaan nij so' a:

—Ndaa yaj me se xcaj 'unj cuentá se vaa ya 'o cuyaan vaa cunudanj yuvij rihaan Diose á.

³⁵ Ne sí yanj me ma'an chuman' sí aráj cochroj rihaan Diose ne noco' tucuáan sa' ro', ca'vee nacaj Diose man so' adonj.

³⁶ Aj ne'en nij soj nana sa' ca'neé Diose rihaan núj sij israelitá se vaa ve'é nacaj Diose man núj che'é se vaa qui'yaj Jesucristó che'é núj, ne Jesucristó ro', me sí 'nij ra'a man cunudanj yuvij adonj.

³⁷ Dan me se nana yo' ro', me nana cuchi' nu' chuman' chiháan núj sij israelitá, ne dan me se gaa quisij ca'mii natáj sí cu'naj Juan se vaa no xcúun yuvij cata' ne yuvij, ne guun che'e Jesucristó nata' so' se nana so' rihaan núj sij man estadó Galilea,

³⁸ ne nana yo' ro', me se nana Jesucristó sí cavii chuman' Nazaret ei. Ne nana yo' taj se vaa cune' Diose man so' qui'yaj suun so' rihaan Diose, ne rqué ndo'o Diose Nimán Diose man so', ne rqué ndo'o Diose rej nucuj man so', ne dan me se cachéé Jesucristó, ne qui'yaj suun ndo'o so' suun sa', ne cunudanj nij sí ran' sayuun 'yaj sí chree che'é se quirii ta'nga' sí chree rihaan nij so' ro', quinahuun sa' nij so', qui'yaj Jesucristó a. 'O se Diose ro', racuj ndo'o man Jesucristó 'yaj so' danj adonj.

39 "Ñe ma'an núj me sí quene'en nu' se vaa qui'yaj so' gaa vaj so' nu' rej ne núj sij israelitá do', ndaa ma'an chuman' Jerusalén do' ei. Ñe dan me se cachrón nii man so' rihaan rcutze, ne cavi' so', qui'yaj nii ei.

40 Gaa ne quisij va'núj güii cavi' so', gaa ne cunuu i'na' uún so', qui'yaj Diose, ne curuvi' so' rihaan núj, qui'yaj uún Diose adonj.

41 Dan me se ne curuvi' so' rihaan cunudanj nij yuvii ma'. Tananj curuvi' so' rihaan núj sij aj narii Diose nata' rihaan yuvii daj vaa so', ne núj me sí chá chraa ne co'o na ga so' gaa cunuu i'na' uún so' gaa cavi' so' adonj.

42 Gaa ne ca'ne' so' suun rihaan núj ca'mii natáj núj rihaan nij yuvii ne nata' núj nana se vaa ma'an so' me sí cune' Diose ca'ne' cacun' che'é nij yuvii vaa i'na' do', che'é nij yuvii cavi' do' adonj.

43 Ñe cunudanj nij sí nata' se nana Diose gaa naá ro', cataj xna'anj nij so' che'é so', ne cataj nij so' se vaa caraa x'naa Diose ni'yaj Diose cunudanj nij sí amán rá ni'yaj man Jesucristó a —taj Pedró rihaan nij tuví' Cornelió a.

44 Dan me se ataa a doj quisij ca'mii Pedró nu' se nana so', gaa ne catúj ndo'o Nimán Diose nimán cunudanj nij sí cuno nana yo' a.

45 Gaa ne nij sí israelitá cuchumán rá ni'yaj man Jesucristó ca'na' ga Pedró ro', caraya'anj nij so' se vaa qui'yaj Diose se luj che'é nij yuvii yaníj ne ndaa nimán nij yuvii yaníj catúj Nimán Diose, qui'yaj Diose a.

46 'O se cuno nij so' se vaa ca'mii nij tuví' Cornelió xna'anj naca, cataj nij so' se vaa sa' uxrá vaa

Diose á. Gaa ne cataj Pedró rihaan tuvi' ma'an so':

⁴⁷ —Nihánj me se ve'é nacaj Nimán Diose man síi nihánj ndaa vaa nacaj so' man ma'an ní' adonj. Se ca'vee caráán ní' chrej rihaan nij so' cata' ne nij so' ma' —taj Pedró rihaan nij tuvi' so' a.

⁴⁸ Gaa ne ca'ne' Pedró suun rihaan nij so' se vaa cata' ne nij so', che'é se sij noco' man Jesucristó me nij so' a. Danj qui'yaj nij so', gaa ne cachíin ni'yaj nij so' rihaan Pedró se vaa guun raan so' que'ee doj güii ga nij so' a.

11

Nana nihánj taj xna'anj daj guun rá nij síi israelitá cuchumán rá ni'yaj man Jesucristó ga cuno nij so' nana se vaa cuchumán rá nij síi yaníj ni'yaj nij so' man Jesucristó a

¹ Dan me se cuno nij síi cune' Jesucristó man nata' se nana so' cuno yo'ó nij tinuj nij síi cuchumán rá ni'yaj man Jesucristó yanj estadó Judea cuno nana se vaa ndaa nij síi yaníj canoco' se nana Diose a.

² Ne gaa cavii Pedró ca'anj so' chuman' Jerusalén, ne nij síi israelitá cuchumán rá ni'yaj man Jesucristó ro', cuta' cacun' xraá so',

³ cataj nij so':

—Me che'é catúj so' rá ve' tucua' síi yaníj ga. Me che'é chá so' chraa ga nij so' ga —taj nij so' rihaan Pedró a.

⁴ Gaa ne guun che'e Pedró cataj xna'anj nica so' rihaan nij so' daj me che'é qui'yaj so' danj a. Dan me se cataj so':

⁵ —Chuman' Jope vaj 'unj, ne cachíin ni'yáa 'unj rihaan Diose, ne dan me se naqui'yaa 'o rasuun

rihanj, qui'yaj Diose a. Ne dan me se nanij 'o rasuun, ne ase vaa 'o yatzij mantá caxra' vaa rasuun yo', ne vaa ca'anj scúj yatzij yo' a. Ne cavii yatzij yo' rej xta', ne quinaniy yo' rej nicun' 'unj a.

⁶ Dan me se ni'yaj uxraj yatzij yo', ne quene'enj se vaa man cunudanj nij xcuu vaa ca'anj tacóo do', ndaa xcuu quij do', xcuu nucuaj rii man do', xtâj do', nu' xcuu vaa tachrii xráá do', man rque yatzij yo' a.

⁷ Gaa ne cunó 'unj se vaa ca'mii yo'o so' rihanj, cataj so': “Naxumaan so', Pedró. Ticavi' so' man nij xcuu yo', cha so' á”, taj so' cunoj a.

⁸ Gaa ne cataj 'unj: “Daj chihaa míj se guun qui'yáj danj, man Síí Chij. 'O se nuveé xcuu chá me nij xo' rihaan núj sij israelitá ma'. Maan xcuu vaa chi'ii me nij xo' rihaan núj nanj á. Nu' ca'na' me se ne catuú nee xcuu vaa danj tu'vaj ma'”, cataj 'unj rihaan síí ca'mii rihanj a.

⁹ Gaa ne ca'mii uún so' rihanj, cataj so': “Ne sese Diose me síí cataj se vaa cunuu sa' 'o rasuun, ne se guun cataj so' se vaa chi'ii vaa rasuun yo' rihaan so' ma'”, cataj so' rihanj a.

¹⁰ Dan me se quisij va'núj ca'mii so' nana vaa danj rihanj, gaa ne cavii uún nu' rasuun yo' rej xta', ca'anj yo' a.

¹¹ Ne nu' cavii rasuun yo' rej xta', ne nu' cuchí va'núj snó'o rihaan ve' carán' 'unj, ne nij síí ca'née 'o síí ne chuman' Cesarea me va'núj nij so', nano' nij so' manj a.

¹² Gaa ne cataj xna'anj Nimán Diose rihanj se vaa ca'anj 'unj ga nij so', ne se guun rá 'unj se vaa yuviij nij doj rihaan ní' sij israelitá me nij so', taj

Nimán Diose rihanj a. Che'é dan ca'anj 'unj ga va'nuj nij so', ne vatan' tinúú ní' síí nihánj ro', me síí ca'anj ga 'unj a. Gaa ne catúj núj rá ve' tucúa síí canacúún manj,

13 gaa ne nata' síí ne ve' yo' rihaan 'unj se vaa aj quene'en so' 'o se mozó Diose rá ve' tucúa so', ne dan me se curuvi' se mozó Diose yo' rihaan so', ne cataj se mozó Diose yo' rihaan so': “Ca'nej so' nana chuman' Jope rihaan 'o síí cu'naj Simón Pedró, ne nacunj so' man so' ca'na' so' nihánj rihaan so' á.

14 Ne so' me síí nata' nana rihaan so', ne sese cuno nu' nij tucua soj nana yo', ne ca'vee quinanii taran' soj rihaan sayuun adonj”, taj se mozó Diose rihaan síí ne ve' yo', taj so' rihanj nanj á.

15 ”Dan me se guun che'ej nataj se nana Jesucristó rihaan nij so', gaa ne catúj Nimán Diose nimán nij so' ndaa vaa catúj Nimán Diose nimán ma'an ní' gaa asino yaan nanj ei.

16 Gaa ne ninuj rá 'unj se nana Diose sij 'nij ra'a man ní' gaa cataj so': “Juan ro', na uun cata' ne so' man yuvij, tzaj ne xa' soj, tzaj ne Diose cuta' ne nimán soj ga ma'an Nimán Diose nanj adonj”, taj síí 'nij ra'a man ní' a.

17 Dan me se cyaan vaa se luj qui'yaj Diose che'é ma'an ní' sij amán rá ni'yaj man Jesucristó sij 'nij ra'a man ní' nanj adonj. Ne sese Diose me síí guun rá qui'yaj danj, ne asa' ca'vee caráán 'unj chrej rihaan Diose se vaa se qui'yaj so' se vaa me rá so' qui'yaj so', rá soj ga —taj Pedró rihaan nij síí israelitá cuchumán rá ni'yaj man Jesucristó a.

18 Dan me se qui'yaj canaán se nana Pedró rihaan se nana yo'ó nij so', gaa ne cataj nij so' se vaa sa' uxrá qui'yaj Diose a. Ne cataj uún nij so':

—Che'é dan me ndaa nij sí yaníj canicaj nimán canoco' chrej sa', qui'yaj Diose, ne che'é dan cayáán nij sí yaníj rihaan Diose nu' cavii nu' ca'anj adonj —taj cunudanj nij sí israelitá a.

Nana nihánj taj xna'anj che'é nij sí cuchumán rá ni'yaj man Jesucristó yanj chuman' Antioquía a

¹⁹ Dan me se che'é se nana sí cu'naj Esteban me se qui'yaj ndo'o nii sayuun man nij sí israelitá cuchumán rá ni'yaj man Jesucristó a. Che'é dan tanáj nij so' chuman' Jerusalén, ne cunánj nij so' ca'anj nij so' ndaa estadó cu'naj Fenicia do', ndaa yo'óo taj rihaan na ya'anj cu'naj Chipre do', ndaa chuman' Antioquía do' a. Tzaj ne inanj rihaan nij yuvi israelitá nata' nij so' se nana Jesucristó, ne ne ca'mij nij so' ga nij sí yaníj ma'.

²⁰ Tzaj ne doj tuvi' nij so' me sí cavii Chipre do', estadó Cirene do', ne nij so' ro', ca'anj chuman' Antioquía, ne ndaa rihaan nij sí yaníj sí a'mii xna'anj griego nata' nij so' nana sa' se nana Jesucristó sij 'nij ra'a man ní' a.

²¹ Ne racuj ndo'o Diose sij 'nij ra'a man ní' man nij sí nata' se nana so', ne que'ee nij sí yaníj yo' cuchumán rá cuno nana sa' yo', ne canoco' nij so' man Jesucristó sij 'nij ra'a man ní' a.

²² Dan me se cuchi' nana rihaan nij sí cuchumán rá ni'yaj man Jesucristó yanj chuman' Jerusalén se vaa cuchumán rá nij sí yaníj yanj chuman' Antioquía ni'yaj nij so' man Jesucristó a. Che'é dan ca'née nij so' man sí cu'naj Bernabé cuhi' so' chuman' Antioquía a.

²³ Dan me se cuhi' so', ga ne quene'en so' se vaa qui'yaj ndo'o Diose se luj ga nij sí yaníj yo',

ne guun niha' uxrá rá so', ne narqué so' chrej sa' rihaan nij sí yaníj yo' se vaa ca'nej nimán nij so' yo'o canoco' raan nij so' man Diose sij 'nij ra'a man ní' a.

²⁴ 'O se sí vaa sa' nimán me sí cu'naj Bernabé yo', ne nuu ndo'o Nimán Diose nimán so', ne sí nucuaj ndo'o rá man Diose me uún so' a. Gaa ne dan me se guun rij doj yuvij canoco' man sí 'nij ra'a man ní',

²⁵ ne ca'anj Bernabé chuman' Tarso, nano' so' man sí cu'naj Saulo,

²⁶ ne nari' Bernabé man Saulo, gaa ne nicaj Bernabé man Saulo ca'na' so' chuman' Antioquía a. Ne dan me se 'o yo' ro', yáán roj so' ga nij sí cuchumán rá ni'yaj man Jesucristó yanj chuman' Antioquía, ne tucu'yón roj so' se nana Diose man que'ee ndo'o nij yuvij man yo' a. Ne nij sí man chuman' Antioquía me nij sí guun che'e tucu'náj “cristiano” man nij sí tucu'yón se nana Jesucristó a. 'O se nana “cristiano” me rá cataj nij sí chéé stucuajj Cristo a.

²⁷ Ne güii yo' me se cavii doj sí nata' se nana Diose chuman' Jerusalén, ne ca'anj nij so' chuman' Antioquía a.

²⁸ Ne canicun' yo'o tuvi' nij sí nata' se nana Diose yo', ne sí cu'naj Agabo me so' a. Ne nata' so' nana rqué Nimán Diose rihaan so' se vaa vaa güii, ne cachén x'naa nu' chuman' naj rihaan chumii a. Ne gaa cayáán sí cu'naj Claudio sí nicaj suun emperador, ne cachén ya x'naa ndaa vaa cataj sí cu'naj Agabo a.

²⁹ Dan me se nij sí tucu'yón se nana Jesucristó ro', gaa cuno nij so' se nana sí cu'naj Agabo, ne

nuchruj raa 'o 'o nij so' se vaa me daj sa'anj rque so' man tinúú nij so' sí yanj estadó Judea ne racuúj man nij so' a. Ne sí ru'vee doj rque nocoo doj sa'anj, ne sí nique doj ro', rque doj sa'anj a.

³⁰ Gaa ne go' nij so' sa'anj yo' man Bernabé ga Saulo, caxrii roj so' ston nij sí uun chij rihaan nij sí cuchumán rá ni'yaj man Jesucristó yanj chuman' Jerusalén a.

12

*Nana nihánj taj xna'anj daj guun gaa tinanii
Diose man Pedró rihaan sí cu'naj Herodes a*

¹ Dan me se güii dan me se guun rá sí nicaj suun rey cu'naj Herodes qui'yaj chi'ii so' man nij sí cuchumán rá ni'yaj man Jesucristó a. Che'é dan ca'ne' so' suun rihaan tanuu quita'aa nij tanuu man ta'aj nij so' a.

² Ne raa neê espadá ticavi' tanuu man sí cu'naj Jacobo tinúú sí cu'naj Juan, qui'yaj Herodes a.

³ Dan me se xcaj Herodes cuentá se vaa guun niha' rá nij yuvií israelitá se vaa cavi' Jacobo, ne che'é dan quita'aa nij tanuu man Pedró, qui'yaj uún so' a. Gaa canuú cha'anj nanuj rá nij sí israelitá güii nu' curihañj xii nij so' yo'óo Egipto gaa naá me qui'yaj Herodes danj a.

⁴ Dan me se caxrij nij tanuu taga' man Pedró, ne ca'ne' Herodes suun rihaan xnu' yaan tanuu se vaa cutumé nij tanuu man Pedró, ne ca'anj ya x'ne' me nij tanuu yo' a. 'Q se guun rá Herodes se vaa ndaa cachén cha'anj pascuá, gaa ne quirii so' man Pedró ne tihaañ so' man Pedró rihaan nij yuvií israelitá, rá so' a.

⁵ Dan me se Pedró ro', 'nij so' taga' rej cutumé nij tanuu man so', tzaj ne nucuaj ndo'o cachín ni'yaj nij síi cuchumán rá ni'yaj man Jesucristó rihaan Diose che'é so' a.

⁶ Dan me se rej nij me yo', ne a'yuj me güii quirii Herodes man Pedró taga' rihaan nij yuvii a. Dan me se otoj Pedró naj so' rá taga', ne naj so' sca'núj vij tanuu, ne vij aga' ne' numii so' naj so' a. Ne nicun' yavij tanuu tumé ta'yaa taga' a.

⁷ Ne dan me se curuvi' yo'o se mozó Diose rá ve' naj Pedró, ne chuguun ndo'o rá ve' yo' a. Gaa ne go' se mozó Diose x'núú Pedró, ne cataj so':

—'Q naxagaa so' cuaj, Pedró —taj so' rihaan Pedró a.

Dan me se naxagaa Pedró, ne aga' ne' numii ra'a so' ro', naxra' yo', ne quiniy yo' rihaan yo'óo a.

⁸ Gaa ne cataj se mozó Diose rihaan Pedró a:

—Naqui'yaj raan so' catuún so', ne caxrii so' canj tacóo so' á —taj se mozó Diose rihaan so', ne qui'yaj Pedró ndaa vaa cataj se mozó Diose rihaan so' a.

Gaa ne cataj uún se mozó Diose a:

—Niquee so' roto so', ne canocó' so' manj á —taj uún se mozó Diose rihaan so' a.

⁹ Dan me se canoco' Pedró man se mozó Diose, ne curihanj so' taga', tzaj ne ne quene'en so' sese ya curihanj so' taga' qui'yaj se mozó Diose yo' ma'. 'Q se maan se qui'yaj ma'an rihaan so' qui'yaj Diose nu' se vaa qui'yaj se mozó Diose yo', rá so' a.

¹⁰ Dan me se cachén roj so' vij rej nicun' tanuu tumé ta'yaa, gaa ne cuchí' roj so' ta'yaa aga' taga' yo', ne rej xcó ta'yaa yo' ro', naj ma'an chuman'

a. Gaa ne quix'núj ma'an ta'yaa yo', ne curihanj roj so', ne cachén roj so' 'o scúj callé, gaa ne ca'anj ni'ya se mozó Diose yo' rihaan Pedró a.

¹¹ Dan me se caxrij rá Pedró se vaa ya curihanj so' taga', gaa ne cataj so':

—Ndāa yaj guun ya ya raj se vaa Diose sij 'nij ra'a mán 'unj ro', ya ca'née so' man se mozó so', ne tinanii so' mán 'unj rihaan síi cu'naj Herodes, ne nihánj me se se quirán' 'unj ndāa vaa me rá nij yuvij israelitá quirán' 'unj yaj a ma' —taj Pedró a.

¹² Dan me se quisij guun ya ya rá so', gaa ne ca'anj so' ve' tucuá chana cu'naj Mariá nii síi cu'naj Juan Marcos a. Ne ve' yo' me rej aj nuu chre' que'ee nij síi cuchumán rá ni'yaj man Jesucristó, ne achíin ni'yaj nij so' rihaan Diose a.

¹³ Dan me se cuchi' Pedró tica'mii so' ta'yaa chingá nuu rihaan ve', gaa ne ca'na' 'o mozó chana cu'naj Rode ta'yaa xcaj no' cuentá me síi ca'na' a.

¹⁴ Gaa ne cunuu yaan Rode se nana Pedró a. Tzaj ne che'é se guun niha' ndo'o rá no', gaa ne che'é dan ne ca'nuu no' ta'yaa ma'. Maan se cunánj no' catúj no' rá ve', ne nata' no' rihaan yo'ó nij yuvij se vaa nicun' Pedró ta'yaa a.

¹⁵ Tzaj ne nij síi man rá ve' taj rihaan no':

—Snúu so' á —taj ta'aj nij so' rihaan no' a.

Tzaj ne taj se qui'yá' ca'ne' rá no' a. 'O se yo'o cataj no' se vaa ya nicun' Pedró ta'yaa a. Gaa ne cataj yo'ó nij so' rihaan no':

—Nanj se mozó Diose tumé man Pedró me síi nicun' rihaan ta'yaa nanj á —taj yo'ó nij so' rihaan no' a.

¹⁶ Ne Pedró ro', yo'o nicun' so' xe' tica'mii so' ta'yaa a. Gaa ne ca'na' nij so', ne ca'núj nij so', ne

quene'en nij so' man Pedró, gaa ne ca'anj ndo'o rá nij so' ni'yaj nij so' man Pedró a.

¹⁷ Gaa ne naxcaj Pedró ra'a Pedró, che'é se guun rá so' gaa dínj tu'va nij so' a. Gaa ne cataj xna'anj so' rihaan nij so' nu' se vaa qui'yaj Diosé sij 'nij ra'a man ní' gaa tinanii so' man Pedro taga' a. Gaa ne cataj so':

—Cataj xna'anj nij soj rihaan tinú' Jacobo ga yo'ó nij tinúú ní' daj quiranj á —taj so' a.

Gaa ne cavii so' ca'anj so' yo'ó rej yaníj a.

¹⁸ Dan me se gaa quisíj güii, ne quinanó ndo'o rá nij tanuu nicun' taga', che'é se ne quene'en uxrá nij so' me rej vaj Pedró a ma'.

¹⁹ Gaa ne ca'ne' Herodes suun rihaan tanuu ca'na' Pedró rihaan so' qui'yaj tanuu, tzaj ne ne ca'vee nari' nij tanuu man Pedró ma'. Che'é dan xná'anj Herodes man nij tanuu tumé man Pedró me rej ca'anj Pedró, tzaj ne ne quene'en nij so' a ma'. Che'é dan ca'ne' Herodes suun se vaa ticavi' nii man nij tanuu tumé man Pedró, gaa ne curihañj Herodes estadó Judea, ca'anj so' chuman' Cesarea, cayáán so' a.

Nana nihánj taj xna'anj se vaa cavi' Herodes, qui'yaj xliúú chá nee man so' a

²⁰ Dan me se ca'maan rá síi cu'naj Herodes ni'yaj so' man nij síi man chuman' Tiro do', chuman' Sidón do', ne che'é dan ca'na' cunudanj nij so' rej ne Herodes, ne ca'mii nij so' ga síi cu'naj Blasto síi tumé nu' ve' tucua' Herodes, ne dan me se ca'vej rá síi cu'naj Blasto racuíj so' man nij so' cunu rcua'aan nij so' ga Herodes, che'é se caxríj yuve nij so' doj sa'anj ston Blasto a. 'Q se nucuaj rá nij so'

man Herodes se vaa cuchij' se chá avii rej uun chij so' ndaa chiháán nij so' chá nij so' a.

²¹ Ne güii cachrón Blasto ca'mii nij so' ga Herodes me se nanuû Herodes yatzíj nuu síi nicaj suun rey, ne táa so' chruun xlá sa', ne ca'mii natáj ndo'o so' rihaan nij síi man Tiro do', man Sidón do' a.

²² Gaa ne caguáj cunudanj nij so', cataj nij so':

—Nuveé se nana yuvii me nana avii raá síi nihánj a ma'. 'O se se nana ya'anj avii tu'va so' nanj á —taj nij yuvii, ni'yaj nij yuvii man Herodes a.

²³ Gaa ne cuaj caxrój 'o se mozó Diose chilij man Herodes, che'é se ne cataj so' se vaa orún' Diose me síi 'yaj avii raá so' a. Maan se ca'vej rá so' cataj nij yuvii se vaa ya'anj me ma'án so' a. Gaa ne dan me se cunu' nee man so' chá xluú, ne cavi' so', qui'yaj xluú a.

²⁴ Tzaj ne se nana Diose me se ra'yanj achij yo' ne naxna'anj yo' cuaj cuaj a. Ne uun rii ndo'o doj nij yuvii canoco' nana yo' a.

²⁵ Ne Bernabé ga Saulo me se quisíj roj so', ne caxrój roj so' sa'anj ston nij síi uun chij rihaan nij síi cuchumán rá ni'yaj man Jesucristó yanj chuman' Jerusalén, ne canicaj roj so', ca'anj roj so' chuman' Antioquía, ne ca'anj síi cu'naj Juan Marcos ga roj so', qui'yaj roj so' a.

13

Nana nihánj taj xna'anj se vaa cune' nii man síi cu'naj Bernabé do', man síi cu'naj Saulo do', ca'anj nata' roj so' se nana Diose rihaan yuvii a

¹ Dan me se chuman' Antioquía ro', ta'aj nij síi cuchumán rá ni'yaj man Jesucristó me síi nata' se

nana Diose, ne yo'ó ta'aj nij so' me sí tucu'yón se nana Diose rihaan yuvii a. Ne sí cu'naj Bernabé do', sí cu'naj Simón Negro do', sí cu'naj Lucio sí cavii estadó Cirene do', sí cu'naj Manaén sí cachij tucúa sí cu'naj Herodes do', sí cu'naj Saulo do', me nij sí cata roj suun sa' yo' a.

² Dan me se na'víj nij so' rihaan Diose sij 'nij ra'a man ní', ne toco' nij so' x'naa man ma'an nij so' che'é se aráj guee nij so' rihaan Diose, ne dan me se cataj Nimán Diose rihaan nij so' a:

—Cune' nij soj man sí cu'naj Bernabé ga sí cu'naj Saulo se vaa qui'yaj suun roj so' rihanj ndaa vaa cataj xna'anj 'unj rihaan roj so' á —taj Nimán Diose rihaan nij so' a.

³ Gaa ne toco' nij so' x'naa man ma'an nij so', ne cachín ni'yaj ndo'o nij so' rihaan Diose, gaa ne cuta' nij so' ra'a nij so' ra roj so', gaa ne dan me se ca'née nij so' man roj so' ca'anj nata' roj so' se nana Jesucristó rihaan yuvii a.

Nana nihánj taj xna'anj daj quiran' 'o sí guun rá caráán chrej rihaan se nana Diose estadó Chipre a

⁴ Dan me se gaa ca'née Nimán Diose man roj so' ca'anj roj so', ne ca'anj roj so' chuman' Seleucia, gaa ne cavii roj so' rihoo chée rihaan na ca'anj roj so' ndaa estadó cu'naj Chipre a.

⁵ Gaa ne gaa cuchi' roj so' chuman' Salamina, ne nata' roj so' se nana Diose rá nij ve' nuu chre' nij yuvii israelitá tucu'yón nij so' se tucuanj Moisés, ne sí cu'naj Juan Marcos me sí vaj raçuíj man roj so' a.

⁶ Dan me se yo'óo taj rihaan na ya'anj me estadó Chipre yo', ne va'núj nij so' chée nu' yo'óo

yo' ndaa se cuchi' nij so' chuman' Pafos a. Ne chuman' Pafos nari' nij so' man 'o sí chruun sí tu'va rma'an se vaa sij nata' se nana Diose me so', ne sí israelitá me so', ne Barjesús cu'naj so' a.

⁷ Ne so' me sí u'yón inanj chée ga sí nicaj suun gobernador cu'naj Sergio Paulo, ne sí cavii ndo'o raá me sí cu'naj Sergio Paulo yo' a. Ne sí cu'naj Sergio Paulo canacúun man roj sí cu'naj Bernabé ga Saulo se vaa ca'na' roj so' rihaan so', ne guun ndo'o rá so' cunō so' se nana Diose, ne danj qui'yaj roj so' a.

⁸ Dan me se sí chruun cu'naj Barjesús, tzaj ne yo'ó se chuvii so' me Elimas, ne nana “Elimas” taj se vaa sí chruun me so' a. Dan me se caráán Elimas chrej rihaan se nana Bernabé ga Saulo a. 'O se guun rá so' ca'anj yaníj sí cu'naj Sergio Paulo ne se cuchumán rá so' nana ya yo' a.

⁹ Ne xa' sí cu'naj Saulo, tzaj ne yo'ó se chuvii so' me Pabló, ne dan me se caraa ndo'o Nimán Diose nimán so', ne ni'yaj uxrá so' man sí cu'naj Elimas yo',

¹⁰ ne cataj so':

—So' ro', me sí nuu nana tiha' yu'unj nimán, ne sij snúú rma'an mé so' nanj ei. Ta'níi ya sí chree mé so' á. Sij nachri' ni'yaj cunudanj se sa' mé so' a. Vaa güii tanáj ti'ín so' suun tanachej nana ya a'mii Diose sij 'nij ra'a man ní' na'.

¹¹ Ne nihánj me se qui'yaj sí 'nij ra'a man ní' sayuun mán so', ne caráán rihaan so' doj güii, qui'yaj so', ne ndaa naán güii se curuvi' rihaan so' ma' —taj Pabló rihaan Elimas yo' a.

Ne taj ni'yón caráán rihaan Elimas, ne adí' se ran' sí chée rque ngaa rej rmi' ro', danj quiran'

so', chéé so', vaj so', nano' so' man síí coró' ra'a so' racuúj man so' cachee so' a.

¹² Ne gaa quene'en síí nicaj suun gobernador yo' daj quiran' síí chruun cu'naj Elimas yo', gaa ne caráya'anj ndo'o so' se tucuanj síí 'nij ra'a man ní', ne cuchumán rá so' ni'yaj so' man Jesucristó a.

Nana nihánj taj xna'anj se vaa cuchumán rá que'ee ndo'o yuvií yaníj yanj chuman' Antioquía naj estadó Pisidia cuno nij so' nana ca'mii natáj Pabló rihaan nij so' a

¹³ Dan me se cavii nij tuví' Pabló chuman' Pafos, ne cavii nij so' rque rihoo chéé rihaan na, ne ca'anj nij so' ndaa chuman' Perge chuman' naj estadó Panfilia a. Tzaj ne síí cu'naj Juan Marcos me se tanáj so' man yavíj roj so', ne canicaj so' nan' so' chuman' Jerusalén a.

¹⁴ Gaa ne yavíj roj so' me se curihanj roj so' chuman' Perge, ne ca'anj roj so' chuman' Antioquía naj estadó Pisidia a. Ne güii naránj rá nij yuvií israelitá me güii yo', ne catúj roj so' rá ve' tucu'yón nij yuvií israelitá se tucuanj Moisés, ne ca'anj cayáán roj so',

¹⁵ ne quisíj nayaa nii se tucuanj Moisés do', se nana nij síí nata' se nana Diosé gaa naá do', ne ca'née nij síí 'nij ra'a ve' yo' nana rihaan roj so', ne nana ca'née nij so' me nana nihánj a: “Sese vaa chrej nucuaj me rá roj soj nago' roj soj rihaan nij yuvií nuu chre' nihánj, ne ca'mii roj soj, tinuj”, taj síí 'nij ra'a ve' yo' rihaan síí cu'naj Pabló ga síí cu'naj Bernabé a.

¹⁶ Gaa ne canicun' caya Pabló, ne naxcaj so' ra'a so', ne cataj so' a:

—Cunō soj sij israelitá dō', soj sij aráj cochroj rihaan Diose dō', ca'mij rihaan soj á.

17 Dan me se Diose síi noco' ní' sij israelitá ro', me síi narii man xii ní', ne tinaxcaj Diose man nij xii ní' gaa cayáán nij so' rej cu'naj Egiptó, ne Diose me síi guun nucuaaj quirii uún man nij so' rej Egiptó a.

18 Gaa ne nda' se tucuáá ndo'o nij so' rihaan Diose, tzaj ne yo'o racuíj Diose man nij so' gaa vaj nij so' rej tacaan nacoō vij chihaa ya yo' a.

19 Gaa ne tinavij Diose man chij x'ne' yuvij yanj rej cu'naj Canaán, gaa ne cuxra' ta'aj Diose nu' rej yo' guun yo' to'óo nij xii ní', qui'yaj Diose a.

20 Ne rej yo' guun to'óo nij so' 'o ca'anj cientó táá vij chihaa chí' yo' a. Ne gaa quisij catúj nij so' rej cu'naj Canaán, gaa ne cune' Diose man nij síi raa rii ta'nga' rihaan nij so', ne danj inanj cayáán nij so' ndaa se cayáán síi cu'naj Samuel síi nata' se nana Diose rihaan yuvij a.

21 "Ne güii cayáán Samuel me se guun che'e nij xii ní' cachín nij so' 'o síi nicaj suun rey guun chij rihaan nij so', gaa ne cune' Diose man síi cu'naj Saúl ta'níi síi cu'naj Cis se vaa guun chij so' rihaan nij so' ndaa vaa guun rá ma'an nij so' a. So' ro', me ta'níi ta'nij si'no síi cu'naj Benjamín, ne vij chihaa ya yo' cayáán so' síi nicaj suun rey a.

22 Gaa ne quirii yaníj Diose man Saúl, gaa ne cune' Diose man síi cu'naj David se vaa guun David síi nicaj suun rey uun chij rihaan nij yuvij israelitá a. Ne ca'mii Diose che'é so', cataj Diose: "Nihánj me se narí' 'unj man David ta'níi Isaí, ne so' me síi qui'yaj nu' ndaa vaa me raj qui'yaj so'

nanj á”, taj Diose ni'yaj Diose man David a.

23 ”Ne sca'núj nij ta'núí ta'nij si'no David ro', rqué Diose 'o síí tinanii man ní' sij israelitá rihaan sayuun, ndaa vaa cata' tu'va Diose asij naá, ne Jesucristó me so' a.

24 Dan me se asino ca'mii natáj síí cu'naj Juan rihaan cunudanj nij yuvii israelitá se vaa canicaj nimán nij so' canoco' nij so' tucuaán sa', ne cata' ne nij so', gaa ne ca'na' Jesucristó a.

25 Dan me se gaa ataa doj tzín' quisij ca'mii natáj Juan nu' se vaa guun rá Diose cataj so', gaa ne cataj so': “Me síí mé 'unj, rá nij soj ga. 'O se nuveé sij nano' soj man mej ma'. Tzaj ne vaa síí noco' xcó 'unj, ne sij sa' uxrá doj me so' rihanj, ne ne nó xcúnj nahej canj 'nij tacóó so' ma’”, taj síí cu'naj Juan rihaan nij yuvii ni'yaj so' man Jesucristó a.

26 ”Cuno soj ta'nij ta'nij si'no Abraham do', soj sij aráj cochroj rihaan Diose do', ca'mij rihaan soj cuano, tinuj. Aj ca'na' nana nihánj rihaan ní', qui'yaj Diose, ne nana nihánj taj xna'anj daj qui'yaj ní' gaa ne ca'vee quinanii ní' rihaan sayuun ei.

27 'O se tuvi' ní' síí yanj chuman' Jerusalén do', nij síí uun chij rihaan nij so' do', ne xcaj nij so' cuentá che'é Jesucristó ma'. Ne cuta' nij so' cacun' xráá Jesucristó se vaa no xcúún so' ticavi' nii man so', ne dan me se quisij ya nu' se nana nij síí nata' se nana Diose gaa naá nana nayaa ní' daj a güii naránj rá ní', qui'yaj nij so' nanj á.

28 Dan me se taj vaj a doj cacun' tumé so', tzaj ne rquee nij so' rihaan Pilato se vaa cavi' so' qui'yaj Pilato a.

29 Dan me se gaa quisíj qui'yaj nij so' nu' ndaa vaa nó rihaan danj Diose che'é Jesucristó, gaa ne tananij nii man so' rihaan rcutze, ne cachin' nii man so' rque yu'uj yuvej a.

30 Tzaj ne Diose me síi qui'yaj cunuu i'na' uún so' adonj.

31 Gaa ne que'ee güii curuvi' so' rihaan nij síi cavii ga so' estadó Galilea ca'anj chuman' Jerusalén ga so' a. Ne yaj me se guun ma'an nij so' síi nata' che'é so' rihaan nij yuvi adonj.

32 "Ne nihánj me se nata' núj nana sa' rihaan nij soj se vaa aj qui'yaj Diose nu' ndaa vaa cata' tu'va so' rihaan xii ní' gaa naá a.

33 Dan me se cunuu i'na' uún Jesucristó, qui'yaj Diose che'é ní', ne dan me se quisíj ya nu' nana cata' tu'va so' gaa naá, ne cavii sa' ní' ta'nij nij síi cane gaa naá, qui'yaj so' adonj. Ne ase vaa nana nihánj nana natá' 'unj rihaan nij soj ro', danj vaa nana no rihaan chra' Salmo número vij, ne taj yo': "Ta'nij mé so' á. Cuanó nihánj me se quene'en yuvi se vaa ta'nij mé so', qui'yaj nanj á", taj se nana Diose no rihaan chra' Salmo yo' a.

34 Dan me se naxagaa so' ne cunuu i'na' uún so', ne se ri'yuj nee man so' daj chihaa míj ma'. Ne dan me se ma'an Diose ca'mii nana nihánj adonj: "Ase vaa rque 'unj nu' se luj rihaan David, ta'nga' danj gaa rque 'unj nu' se luj rihaan so', ne daj chihaa míj se navij se luj yo' rihaan so' ma'", taj uún Diose rihaan Jesucristó a.

35 Che'é se qui'yaj Diose danj che'é Jesucristó rá David ro', che'é dan cachrón David rihaan yo'ó salmo nana nihánj a: "Daj chihaa míj se ri'yuj nee

man sí vaa sa' rihaan so', qui'yáa so' ma'", taj David rihaan Diose ni'yaj David man Jesucristó a.

³⁶ Dan me se xa' ma'an David, tzaj ne gaa quisíj qui'yaj so' nu' ndaa vaa guun rá Diose qui'yaj so' che'é nij tuvi' so', gaa ne cavi' so', gaa ne cachin' nii man so' rej naj nij xii so', gaa ne ri'yuj nee man so' a.

³⁷ Ne xa' Jesucristó sí cunuu i'na' uún qui'yaj Diose, tzaj ne ne ri'yuj nee man so' ma'.

³⁸ "Xcaj nij soj cuentá se vaa cuano nihánj me se nata' núj nana rihaan soj se vaa che'é se vaa qui'yaj Jesucristó ro', che'é dan ca'vee caraa x'naa Diose ni'yaj Diose cacun' tumé ní', tinuj. Dan me se daj chihaa mij se navij nu' cacun' tumé soj, qui'yaj se tucuajj Moisés ma'.

³⁹ Tzaj ne cunudanj nij soj sij amán rá ni'yaj man Jesucristó me se x'néj uun cacun' yo' xraá soj, ne nuu sa' soj rihaan Diose adonj.

⁴⁰ Che'é dan tadó nij soj se quiran' soj ndaa vaa taj se nana Diose nana no rihaan danj nij sí nata' se nana Diose nana nihánj á:

⁴¹ "Ne soj sij a'nga' nacoo ni'yaj manj, tzaj ne ni'yaj soj ei. Ca'anj rá soj, ne quirí' nu' soj nanj ei. 'O se gaa vaa i'na' soj nihánj, ne qui'yáj suun nocoo, ne ca'vee se cataj xna'anj yo'o so' rihaan soj che'é se vaa qui'yáj, tzaj ne se ca'vee cuchuman rá soj se nana so' asuun ma'", taj Diose rihaan soj a —taj Pabló rihaan nij yuvij cunuu chre' rá ve' yo' a.

⁴² Dan me se gaa me rá roj so' ca'anj roj so', ne cachín ni'yaj nij yuvij rihaan roj so' se vaa cachén yo'o tunj güii, ne ca'na' uún roj so' ne ca'mii uún roj so' nana vaa danj rihaan nij so' a.

⁴³ Gaa ne gaa quisíj tucu'yón nij so' ne curihanj nij yuvií xe', ne que'ee nij síí israelitá do', nij síí yaníj noco' xraan se tucuanj nij síí israelitá do', canoco' man roj síí cu'naj Pabló ga Bernabé a. Gaa ne ca'mii ndo'o roj so' ga nij so', gaa ne guun ya rá nij so' se vaa yo'o nicaíj nij so' tucuáán sa' ga se luj 'yaj Diose che'é nij so' a.

⁴⁴ Dan me se cachén tunj güii ne nasíj yo'ó güii naránj rá nij yuvií israelitá, gaa ne cunuu chre' cunudanj nij yuvií yanj chuman' ta' asuun, che'é rej cunō nij so' se nana Diose sij 'nij ra'a man ní' a.

⁴⁵ Tzaj ne quene'en nij yuvií israelitá se vaa cuchí' ndo'o yuvií rihaan Pabló, gaa ne che'é dan guun xcoj ruvaa rá nij yuvií israelitá, ne nij ca'mii nij so' che'é Pabló, cataj nij so' se vaa inanj nana ne ca'mii Pabló a.

⁴⁶ Tzaj ne ne kuchu'vi' ya roj síí cu'naj Pabló ga Bernabé ni'yaj roj so' man nij yuvií israelitá a ma'. Ne cataj roj so':

—No xcúún núj nata' núj se nana Diose rihaan nij soj sij israelitá asino yaan adonj. Tzaj ne che'é se quiri'íj yaníj soj nana yo', ne che'é se nuveé sij no xcúún cayáán ga Diose nu' cavii nu' ca'anj me soj rá soj, ne che'é dan nihánj me se canicaj núj, ne nata' núj nana yo' rihaan nij síí yaníj ei.

⁴⁷ 'O se Diose sij 'nij ra'a man ní' me síí ca'ne' suun rihaan núj qui'yaj núj danj adonj. Dan me se cataj síí 'nij ra'a man ní': “Aj cuné' 'unj mán so' se vaa guún so' ya'an chuguun rihaan nij síí yaníj ne ca'vee xcaj nij so' cuentá, qui'yáá so', gaa ne quinanii yuvií yanj chuman' naj nu' rihaan chumii rihaan sayuun, qui'yáá so' á”. Nihánj me

se nana Diose nana cataj Diose rihaan nuj nanj á —taj roj so' rihaan nij yuvij israelitá yo' a.

⁴⁸ Dan me se gaa cuno nij sí yanij se nana Pabló, ne guun niha' uxrá rá nij so', ne ve'é ca'mii nij so' che'é se nana Diose sij 'nij ra'a man ní' a. Ne cunudanj nij sí cune' Diose cayáán rihaan Diose nu' cavii nu' ca'anj ro', cuchumán rá nij so' cuno nij so' nana yo' a.

⁴⁹ Gaa ne cuchil' se nana Diose sij 'nij ra'a man ní' daj a nij chuman' naj rihaan yo'óó rej yo' a.

⁵⁰ Tzaj ne caxrij nij sí israelitá chrej rque nij chana yanij nocó' xraan man Diose chana xna'anj do', rque nij sí nicaj suun uun chij rihaan chuman' yo' do', ne táá ri'yunj nij so' man Pabló ga Bernabé a. Gaa ne tucunanj nij so' man roj so' rej yo' a.

⁵¹ Gaa ne nacunan' roj so' tacóó roj so' tucuyuu roj so' yo'óó tachruu cavii chuman' yo' rihaan yo'óó, che'é rej xcaj nij sí man chuman' yo' cuentá se vaa ma'anj nij so' tumé cacun' se vaa ne cunó nij so' se nana Diose a. Gaa ne ca'anj roj so' chuman' Iconio a.

⁵² Ne nij sí cuchumán rá ni'yaj man Jesucristó yanj chuman' Antioquía yo' me se 'o guun niha' uxrá rá nij so', ne 'o cunuu Nimán Diose nimán nij so' a.

14

Nana nihanj taj xna'anj daj guun rá nij sí man chuman' Iconio gaa cuchil' se nana Diose chiháán nij so' a

¹ Dan me se gaa cuchil' sí cu'naj Pabló ga sí cu'naj Bernabé chuman' Iconio, ne catúj roj so' rá

ve' tucu'yón nij yuvii israelitá se tucuanj Moisés, ne che'é se ve'é ndo'o nata' roj so' se nana Diose, che'é dan cuchumán rá que'ee ndo'o yuvii israelitá do', yuvii yaníj a'mii xna'ánj griego do', ni'yaj nij so' man Jesucristó a.

² Tzaj ne nij yuvii israelitá na'vej rá cunō se nana Jesucristó me se caxríj nij so' chrej rque nij yuvii yaníj yanj chuman' yo' che'é rej nachrì' nij so' ni'yaj nij so' man nij tinuj nij síi cuchumán rá ni'yaj man Jesucristó, ne danj guun a.

³ Dan me se que'ee güii sca' nanj ca'mii natáj roj síi cu'naj Pabló ga Bernabé se nana Diose sij 'nij ra'a man ní', ne síi 'nij ra'a man ní' ro', racuíj man roj so' se vaa guun nucuaj roj so' qui'yaj suun roj so' suun sa' nocoo ni'yaj nij yuvii, che'é rej cuchuman rá nij yuvii se vaa ya ya vaa se nana roj so' nana che'é se luj qui'yaj síi 'nij ra'a man ní' che'é ní' a.

⁴ Gaa ne xra' ta'aj nij yuvii man chuman' yo', ne ta'aj nij so' ro', canoco' se nana nij síi israelitá síi na'vej rá cunō se nana Diose, ne yo'ó ta'aj nij so' ro', canoco' se nana roj síi cune' Jesucristó man nata' se nana so' a.

⁵ Gaa ne guun rá nij yuvii yaníj do', nij yuvii israelitá do', nij síi uun chij rihaan nij so' do', qui'yaj chi'ii nij so' man roj síi cu'naj Pabló ga Bernabé ne ndaa guun rá nij so' go' nij so' yahij man roj so' ndaa se cavi' roj so' a.

⁶ Tzaj ne xcax roj so' cuentá, gaa ne che'é dan cunanj roj so', ca'anj roj so' chuman' Listra chuman' naj estadó Licaonia do', chuman' Derbe yo'ó chuman' naj estadó Licaonia do', yo'ó nij chuman' ra'a naj nichrun' ga roj chuman' yo' do',

7 ne vaj roj so' nata' roj so' se nana Diose nana sa' rihaan nij yuvij yanj nij chuman' yo' a.

Nana nihánj taj xna'anj se vaa guun rá nij síi ne chuman' Listra se vaa ya'anj me síi cu'naj Pabló do', síi cu'naj Bernabé do' a

8 Dan me se chuman' Listra ro', ne 'o síi rengo ne síi rengo me so' asij ca'ngaa so', ne veé 'o danj vaa so', ne daj chihaa míj taj se qui'yá' cachee so' ma'.

9 Ne yáán so' cuno so' se nana Pabló a. Dan me se ni'yaj uxrá Pabló man so', ne xcaj Pabló cuentá se vaa síi rengo yo' nucuaj ndo'o rá se vaa ca'vee nahuun sa' so', qui'yaj Diose a.

10 Che'é dan nucuaj ca'mii Pabló, cataj Pabló rihaan so' a:

—Naxumaan so', canicun' cayá so' ei. —taj Pabló rihaan so' a.

Gaa ne güej síi rengo yo', ne cachée so' a.

11 Dan me se quene'en nij yuvij se vaa qui'yaj Pabló, ne che'é dan caguáj nij yuvij se xna'anj ma'an nij so', cataj nij so':

—Nahuun nij ya'anj yuvij, ne nanij nij so' rihaan yo'óo chuguanj —taj nij yuvij ni'yaj nij yuvij man Pabló ga Bernabé a.

12 Gaa ne cataj nij yuvij se vaa ya'anj cu'naj Júpiter me Bernabé, ne Pabló me se ya'anj cu'naj Mercurio me so', che'é se so' me síi ca'mii doj a.

13 Ne dan me se rihaan tu'va chuman' yo' ne 'o nuvií rej na'vij nij yuvij rihaan ya'anj Júpiter, ne xrej ne nuvií yo' ro', ca'ne' suun se vaa ca'na' scúj toró ca'na' cachriin yâj ca'na' ta'yaa rej atúj yuvij chuman' yo', ne guun rá so' ga nij yuvij ticavi' nij

so' scúj yo' rihaan Pabló gá Bernabé che'é se ya'anj me roj so' rá nij yuvií a.

14 Dan me se xcaj Bernabé gá Pabló cuentá daj guun rá nij yuvií, ne che'é dan cutzin' roj so' sagan' roj so', che'é se chi'íi ndo'o qui'yaj nij yuvií rá roj so' a. Gaa ne cunánj roj so' sca'núj nij yuvií, ne caguáj roj so',

15 cataj roj so':

—Se guun qui'yaj nij soj danj ma'. 'O se cyaan yuvií me ní', ne nihánj me se xa' núj, tzaj ne 'na' núj nata' núj se nana Diose nana sa' rihaan nij soj, che'é rej tanáj soj tucuáan ni'yon rma'an nocó' soj cuano nihánj ne canicaj soj canoco' soj Diose síi vaa i'na' ya ei. Ne so' ro', me síi qui'yaj nu' rej xta' do', nu' rihaan yo'óo do', nu' na ya'anj do', ne nu' rasuun qui'yaj so' adonj.

16 Ne asij rque me se ca'née ra'a Diose canoco' cunudanj nij x'ne' yuvií tucuáan cuchruj xii nij so' a.

17 Tzaj ne se guun cataj soj se vaa a doj ne ca'vee xcaj soj cuentá che'é Diose ma'. 'O se ve'é ndo'o qui'yaj Diose che'é soj adonj. Dan me se aman' maan avii rej xta', qui'yaj Diose che'é soj, ne síj dió avii naa, qui'yaj uún Diose, ne dan me se araa rque soj, ne uun niha' rá soj, qui'yaj Diose adonj —taj roj so' rihaan nij yuvií yo' a.

18 Dan me se daj doj se ticavi' nij yuvií scúj rihaan roj so', tzaj ne ca'ne' rá nij yuvií gá suun yo', qui'yaj se nana roj so' a.

Nana nihánj taj xna'anj che'é sayuun qui'yaj nij síi israelitá cavii chuman' Antioquía do', chuman' Iconio do', man síi cu'naj Pabló gá Bernabé a

19 Tzaj ne cavii sí israelitá chuman' Antioquía do', chuman' Iconio do', ca'na' nij so' chuman' Listra, ne caxrúj nij so' chrej rque nij yuvii man chuman' Listra, ne che'é dan go' ndo'o nij yuvii yahij man Pabló, ne cuxuun nij yuvii man so' ndaa tu'va chuman', ne ri'íj nij yuvii man so' a. Ne guun rá nij yuvii se vaa cavi' so' a.

20 Tzaj ne cunuu chre' nij síi cuchumán rá se nana Jesucristó ne chuman' yo', ne tucuachriin nij so' nu' anicaj rej naj Pabló rihaan yo'óó, ne naxagaa so', ne catúj uún so' chuman' ga nij so' a. Gaa ne yo'ó güii me se curihanj roj so' ga Bernabé ca'anj roj so' chuman' Derbe a.

Nana nihánj taj xna'anj se vaa canicaj síi cu'naj Pabló ga Bernabé chuman' Antioquía naj estadó Siria a

21 Dan me se nata' ndo'o síi cu'naj Pabló ga Bernabé se nana Diöse nana sa' rihaan nij yuvii man chuman' Derbe yo', ne cavii ndo'o síi tucu'yón se nana Jesucristó chuman' Derbe yo', qui'yaj roj so' a. Gaa ne canicaj roj so', ca'anj roj so' chuman' Listra do', chuman' Iconio do', chuman' Antioquía naj estadó Pisidia do' a.

22 Ne nari' nucaj nimán cunudanj nij síi tucu'yón se nana Jesucristó, qui'yaj roj so' a. Ne narqué roj so' chrej man nij síi tucu'yón se nana Jesucristó se vaa daj chihaa mój se ca'ne' rá nij so' ga suun noco' se tucuanj Jesucristó a. Ne cataj roj so' se vaa asino quirán' ndo'o ní' sayuun, gaa ne ca'vee cayáán ní' ga Diöse asa' guun chij Diöse rihaan chumii nihánj, taj roj so' a.

²³ Ne cune' roj so' man sí guun chij rihaan nij síí cuchumán rá ni'yaj man Jesucristó 'o 'o nij chuman' a. Gaa ne toco' roj so' x'naa man ma'an roj so', ne cachín ni'yaj roj so' rihaan Diose sij 'nij ra'a man ní' che'é nij síí cuchumán rá ni'yaj man so' se vaa racuúj so' man nij so' a.

²⁴ Dan me se cachén roj so' nu' estadó Pisidia, gaa ne cuhi' roj so' estadó Panfilia a.

²⁵ Gaa ne ca'mii natáj roj so' se nana Diose rihaan nij síí man chuman' Perge, gaa ne ca'anj roj so' chuman' Atalia a.

²⁶ Gaa ne chuman' Atalia ro', cavii roj so' rihoo chéé rihaan na, quinan' roj so' ndaa chuman' Antioquía naj estadó Siria a. Ne chuman' Antioquía ro', me rej cavii roj so' asino yaan gaa cachín ni'yaj nij síí cuchumán rá ni'yaj man Jesucristó rihaan Diose se vaa racuúj Diose man roj so' qui'yaj suun roj so' ca'mii natáj roj so' se nana Diose rihaan yuvii a. Ne nihánj me se quisij suun yo', qui'yaj roj so' nanj adonj.

²⁷ Dan me se gaa nucui' roj so', ne canacúún roj so' man nij síí cuchumán rá ni'yaj man Jesucristó se vaa cunu chre' nij so', gaa ne cataj xna'anj roj so' nu' se vaa qui'yaj Diose ga roj so', ne cataj roj so' se vaa ya x'núj rihaan nij yuvii yaníj cuchuman rá nij so' ni'yaj nij so' man Jesucristó, qui'yaj Diose, ne ca'vee cavii sa' nij yuvii yaníj yo' a.

²⁸ Gaa ne guun raan ndo'o roj so' ga nij síí tucu'yón se nana Jesucristó yanj chuman' Antioquía yo' a.

Nana nihánj taj xna'anj che'é juntá qui'yaj nij síi cuchumán rá ni'yaj man Jesucristó man chuman' Jerusalén gaa ca'mii nij so' che'é se tucuñj Moisés a

¹ Dan me se ta'aj nij síi cuchumán rá ni'yaj man Jesucristó cavii chuman' Jerusalén, ne ca'anj nij so' tucu'yón nij so' rihaan yo'ó tinúú nij so' se vaa sese se cata' ta'nga' man yo'o so' ndaa vaa taj se tucuñj Moisés, ne daj chihaa mǐj se ca'vee nanii so' rihaan sayuun qui'yaj Diose ma'.

² Gaa ne ca'mii canó tuvi' ndo'o síi cu'naj Pabló do', síi cu'naj Bernabé do', ga nij síi tucu'yón nana yo', gaa ne che'é dan cune' nij síi cuchumán rá ni'yaj man Jesucristó yanj chuman' Antioquía man roj so' ga yo'ó doj tinúú nij so' se vaa ca'anj nij so' chuman' Jerusalén nanao nij so' cuentó ga nij apóstol cune' Jesucristó man nata' se nana so' do', ga yo'ó nij síi uun chij rihaan nij so' do', che'é nana a'mii nij yuvīj yo' a.

³ Dan me se cavii nij so', ca'anj nij so', ne cachén nij so' estadó Fenicia do', estadó Samaria do', ne cataj xna'anj nij so' rihaan nij tinúú nij so' che'é nij yuvīj yanǐj se vaa cuchumán rá ta'aj nij so' ni'yaj nij so' man Jesucristó, gaa ne guun niha' uxrá rá cunudañj nij síi cuno nana yo' a.

⁴ Dan me se cuhi' nij so' chuman' Jerusalén, gaa ne ve'é ca'mii nij síi cuchumán rá ni'yaj man Jesucristó do', nij apóstol cune' Jesucristó man nata' se nana so' do', yo'ó nij síi uun chij do', ga nij so' a. Gaa ne cataj xna'anj nij so' rihaan nij síi yanj chuman' Jerusalén yo' che'é nu' se vaa qui'yaj Diose ga nij tinuj nij so' a.

⁵ Tzaj ne canicun' doj síi fariseo síi cuchumán

rá ni'yaj man Jesucristó, ne cataj nij so' se vaa no xcúun nij tuvi' Pabló cuta' nij so' ta'nga' man nij síi yaníj yo', ne cataj xna'anj nij so' rihaan nij síi yaníj yo' se vaa no xcúun nij so' qui'yaj nij so' nu' se tucuaj Moisés a.

⁶ Dan me se cunuu chre' nij apóstol cune' Jesucristó man nata' se nana so' rihaan yuvií ga yo'ó nij síi uun chij rihaan nij yuvií cuchumán rá ni'yaj man Jesucristó, qui'yaj nij so' junta, ca'mii nij so' che'é se nana nij síi fariseo yo' a.

⁷ Dan me se ca'mii ca'mii nij so', gaa ne canicun' síi cu'naj Pedró, ne cataj so':

—Cuno soj ca'mij, tinuj. Aj ne'en soj se vaa asij naá ndo'o guun rá Diose cunō nij síi yaníj se nana Diose nana sa', ne cuchuman rá nij síi yaníj ni'yaj nij so' man nana sa' yo' a. Gaa ne narii Diose man yo'ō tuvi' ní', ne 'unj me síi narii Diose nata' se nana Diose rihaan nij yuvií yaníj yo' chuguanj.

⁸ Ne Diose ro', me síi ne'en daj vaa nimán yuvií, ne Diose me síi rque Nimán Diose man nij síi yaníj yo' ndaa vaa qui'yaj so' che'é ma'an ní', che'é rej ca'vee guun ya rá ní' se vaa ya tinúú ní' me nij síi yaníj nanj adonj.

⁹ Dan me se cunuu sa' nimán nij síi yaníj rihaan Diose che'é se cuchumán rá nij so' ni'yaj nij so' man Jesucristó, ne cuano nihánj me se 'o' cyaan vaa nij so' ga ní' rihaan Diose nanj adonj.

¹⁰ "Ne tadó soj sese guun rá soj quene'en soj sese ca'vee ca'maan rá Diose qui'yaj soj ne qui'yaj Diose sayuun man soj á. 'O se xa' se tucuaj Moisés, tzaj ne ase vaa icón 'ee taj raá yuntá scúj ro', danj vaa se tucuaj Moisés rihaan xii ní' do',

rihaan ma'an ní' do', ne ne ca'vee qui'yaj ní' nu' tucuáán yo' ma'. Ne nihánj me se me rá soj cuchruj soj tucuáán yo' rihaan yo'ó nij tinúú ní' síí tucu'yón se nana Jesucristó,

¹¹ tzaj ne amán rá ní' se vaa che'é inanj se luj qui'yaj Jesucristó sij 'nij ra'a man ní' ro', che'é dan nanií ní' rihaan sayuun ei. Nuveé se tucuanj Moisés me se vaa qui'yaj nanií ní' rihaan sayuun ma'. Ne ase vaa ní' ro', danj vaa nij tinúú ní' síí yaníj uún adonj —taj Pedró rihaan cunudanj nij so' a.

¹² Dan me se ca'ne' rá nij so', ne a doj ne ca'mii nij so' a ma'. Maan se sa' uxrá nanó xrej nij so' gaa cataj xna'anj Bernabé ga Pabló che'é nij suun sa' nocoo guun nucuaj roj so' qui'yaj roj so' sca'núj nij síí yaníj qui'yaj Diose a.

¹³ Dan me se gaa quisíj ca'mii roj so', gaa ne ca'mii síí cu'naj Santiagó, cataj so':

—Cuno nij soj ca'mij, tinuj.

¹⁴ Nihánj me se cataj xna'anj tinú' Simón rihaan ní' se vaa asino yaan narií Diose man ta'aj nij yuvii yaníj guun nij so' 'o se chuman' Diose a.

¹⁵ Ne 'o cyaan vaa se nana nij síí nata' se nana Diose gaa naá ga se nana tinú' Simón nihánj a. Dan me se vaa nana no rihaan danj Diose taj:

¹⁶ “Asa' quisíj, gaa ne canicaj 'unj, ne naqui'yaj sa' 'unj rej ne síí cu'naj David a. Dan me se canee nu' ve' ne so', ne quiri' ndo'o ve', tzaj ne nacune' caya uún 'unj man nu' ve' yo', gaa ne cunu sa' cunudanj yo' a.

¹⁷ Danj qui'yaj che'é rej ca'vee nano' yo'ó nij yuvii yaníj man 'unj sij 'nij ra'a man nij so' a. Danj

qui'yaj cunudanj nij yuvii yanij noco' manj, taj 'unj sij 'nij ra'a man soj,

18 ne asij naá cataj 'unj se vaa qui'yáj danj adonj", taj se nana Diose nana cachrón síi nata' se nana Diose gaa naá rihaan yanj a.

19 "Che'é dan 'unj me síi guun rá se vaa se qui'yaj ní' sayuun man nij síi yanij canicaj nimán canoco' man Diose ma'. Se cataj ní' se vaa canoco' nij so' nu' se tucuanj Moisés ma'.

20 Maan se qui'yaj ní' yanj ca'nej ní' rihaan nij so', ne cataj xna'anj ní' rihaan nij so' se vaa se guun chá nij so' rasuun rqué yuvii rihaan ya'anj cacój yuvii ma'. Ne snó'o do', chana do', se cotoj nij so' ga yo'ó yuvii sese ne nica nij so' me yo' ma'. Ne se chá nij so' nee xcuu tuguáj nii gaán chihá ma'. Ne se chá nij so' ton ma'.

21 O se daj a güii cuetan' naránj rá ní' me se man ndo'o tuvi' ní' sij israelitá nayaa se nana Moisés, ne a'mii natáj nii che'é se tucuanj so' rá ve' tucu'yón ní' tucuáán yo' daj a chuman' a. Ne danj 'yaj inanj ní' sij israelitá asij naá ndo'o a —taj síi cu'naj Santiagó rihaan yo'ó nij so' a.

Nana nihánj taj xna'anj che'é yanj cartá qui'yaj nij síi man Jerusalén ca'néé nij so' rihaan nij yuvii yanij cuchumán rá ni'yaj man Jesucristó a

22 Gaa ne guun rá nij apóstol cune' Jesucristó man nata' se nana so' do', yo'ó nij síi uun chij do', cunudanj nij yuvii cuchumán rá ni'yaj man Jesucristó yanj chuman' Jerusalén do', narij nij so' doj tuvi' ma'an nij so' ca'anj nij so' ndaa chuman' Antioquía ga roj síi cu'naj Pabló do', Bernabé do' a. Gaa ne narij nij so' man síi cu'naj Judas Barsabás

do', man sí cu'naj Silas do', se vaa ca'anj roj so' a. 'O se sí sa' me roj so', rá nij tinúú roj so' a.

23 Gaa ne qui'yaj cunudanj nij so' yanj cartá ca'anj nıcaj nij sí ca'anj chuman' Antioquía, ne nihánj me se vaa taj yanj cartá yo' a: "Nihánj me yanj cartá 'yaj núj sij apóstol cune' Jesucristó man nata' se nana so' do', sij uun chij rihaan nij sí amán rá ni'yaj man Jesucristó do' a. Tinúú soj me núj, ne ca'nej núj yanj nihánj rihaan nij soj sij yanıj amán rá ni'yaj man Jesucristó yanj chuman' Antioquía do', estadó Siria do', estadó Cilicia do' a.

24 Dan me se ca'na' nana rihaan núj se vaa doj tuvi' núj me sí ca'mii nana qui'yaj sayuun rihaan soj, ne quiri' rá soj, qui'yaj nij sí ca'mii nana yo' rihaan nij soj a. Tzaj ne nuveé núj ca'néé man nij so' ma'.

25 Tzaj ne che'é se qui'yaj nij so' danj ro', che'é dan cyaan guun rá núj nariıj núj doj tinúú núj cuchi' rihaan soj ga roj tinúú ní' sí 'ee ndo'o rá núj sí cu'naj Bernabé ga Pabló adonj.

26 Ne xa' roj so', tzaj ne sij ca'néé nimán cunuú rihaan Jesucristó sij 'nij ra'a man ní' me roj so', ne ndaa ne chu'vi' roj so' cavi' roj so' ma'.

27 Dan me se ca'néé núj man sí cu'naj Judas do', man sí cu'naj Silas do', se vaa ca'anj roj so' ga sí cu'naj Bernabé ga Pabló, ne ma'an roj so' nata' rihaan soj ndaa vaa taj nana no rihaan yanj nihánj ei.

28 "Dan me se ne guun rá Nimán Diose do', ma'an núj do', cuchruj ndo'o núj tucuaán canoco' soj ma'. Tzaj ne vaa che'é cunō soj ca'anj guee nana nihánj, rá núj nanj adonj.

29 Dan me se se guun cha soj rasuun rqué yuvii

rihaan ya'anj cacój yuvij ma'. Se guun cha soj ton ma'. Se guun cha soj nee xcuu tuguáj nii gaán chihá ma'. Ne snó'o do', chana do', se cotoj soj ga yo'ó yuvij sese ne nica soj me yo' ma'. Ne sese qui'yaj soj nu' ndaa vaa taj nana nihánj, ne ve'é 'yaj soj, rá núj nanj adonj. Ne me rá núj se vaa ve'é cayáán soj adonj”, taj yanj cartá qui'yaj nij síi man chuman' Jerusalén yo' a.

³⁰ Dan me se ca'née nij so' man ca'anj nij síi ca'anj chuman' Antioquía, gaa ne gaa cuchí' nij so', ne canacúun nij so' cunu chre' cunudanj nij síi cuchumán rá ni'yaj man Jesucristó, gaa ne caxrij nij so' yanj cartá yo' ston nij síi yanj chuman' Antioquía a.

³¹ Gaa ne nayaa nij síi man Antioquía yanj cartá, gaa ne guun niha' uxrá rá nij so' che'é nana sa' cataj xna'anj nij síi man Jerusalén rihaan nij so' a.

³² Ne síi cu'naj Judas do', síi cu'naj Silas do', síi nata' se nana Diose me roj so', ne a'mii a'mii roj so' nago' roj so' chrej man nij síi man Antioquía yo', ne nari' nucuj nimán nij so', qui'yaj roj so' a.

³³ Dan me se quisij caran' roj so' chuman' Antioquía, gaa ne ve'é cataj nij tinuj nij síi man Antioquía rihaan roj so' se vaa dínj gaa nimán roj so' ca'anj roj so' a. Gaa ne dan me se quinán' roj so' rihaan nij síi ca'née man roj so' ca'na' roj so' a.

³⁴ Tzaj ne guun rá síi cu'naj Silas quinaj so' chuman' Antioquía a.

³⁵ Ne guun raan síi cu'naj Pabló do', síi cu'naj Bernabé do', chuman' Antioquía, ne tucu'yón roj so' se nana Diose sij 'nij ra'a man ní' nana sa' rihaan yuvij a. Ne que'ee ndo'o yo'ó nij yuvij nata'

nana sa' yo' ga roj so' a.

Nana nihánj taj xna'anj se vaa ca'anj uún Pabló tucu'yón so' se nana Diose rihaan yuvü, ne ca'anj Bernabé yo'ó rej yaníj a

³⁶ Dan me se cachén doj güii, gaa ne cataj Pabló rihaan Bernabé a:

—Canicaj ní' ca'anj uún ní' cunudanj nij chuman' yanj nij tinúú ní' nij síi nata' ní' se nana Diose nana sa' rihaan, gaa ne quene'en ní' daj vaa mán nij so' ei —taj Pabló rihaan Bernabé a.

³⁷ Tzaj ne Bernabé ro', guun rá so' se vaa ca'anj uún síi cu'naj Juan Marcos ga roj so' a.

³⁸ Tzaj ne ne ca'vej rá Pabló ca'anj uún Juan Marcos ga roj so', che'é se gaa rque me se tanáj Juan Marcos man roj so' estadó Panfilia, ne ne ca'anj so' qui'yaj suun nij so' che'é Diose ma'.

³⁹ Che'é dan guun vij nana ca'mii roj so' che'é Juan Marcos, ne che'é dan ca'anj yaníj roj so', ne Bernabé ro', nicaj síi cu'naj Marcos, ne cavii roj so' rihoo chéé rihaan na, ne ca'anj roj so' estadó Chipre a.

⁴⁰ Ne Pabló ro', narii so' man síi cu'naj Silas se vaa ca'anj so' ga Pabló a. Ne cachíin ni'yaj nij tinúú roj so' nij síi man chuman' Antioquía rihaan Diose se vaa qui'yaj Diose se luj ne racuíj so' man roj so' chrej ca'anj roj so', ne dan me se ca'anj roj so' a.

⁴¹ Gaa ne cachén roj so' nu' estadó Siria do', nu' estadó Cilicia do', ne nari' nucuj nimán nij x'ne' nij síi cuchumán rá ni'yaj man Jesucristó man cunudanj nij chuman' naj roj estadó yo', qui'yaj roj so' a.

16

Nana nihánj taj xna'anj se vaa cachéé síí cu'naj Timoteo ga síí cu'naj Pabló ga Silas a

¹ Dan me se cuchil' síí cu'naj Pabló ga Silas chuman' Derbe do', chuman' Listra do' a. Ne chuman' Listra ro', yáán 'o síí tucu'yón se nana Jesucristó, ne Timoteo cu'naj so' a. Ne nii Timoteo me chana israelitá cuchumán rá ni'yaj man Jesucristó, ne rej Timoteo me síí yaníj a'mii xna'ánj griego a.

² Ne síí sa' me Timoteo, taj nij tinúú so' síí ne chuman' Listra do', chuman' Iconio do' a.

³ Dan me se guun rá Pabló se vaa ca'anj Timoteo ga so' a. Ne cuta' Pabló ta'nga' man so', che'é se ne'en cunudanj nij síí israelitá yanj rej yo' se vaa sij yaníj me rej so' ne che'é dan nuvi' ta'nga' cata' man so' ma'.

⁴ Dan me se gaa cachén nij so' nu' nij chuman', ne cataj xna'anj nij so' rihaan nij yuvií cuchumán rá ni'yaj man Jesucristó se vaa cunó nij yuvií se nana nij apóstol cune' Jesucristó man do', yo'ó nij síí uun chij yanj chuman' Jerusalén do', nana naqui'yaj cuu nij so' che'é nij síí yaníj a.

⁵ Ne xa' nij x'ne' nij síí cuchumán rá ni'yaj man Jesucristó, tzaj ne doj a canoco' nij so' se tucuanj Jesucristó, ne doj a cunuu rij nij x'ne' daj a güii a.

Nana nihánj taj xna'anj se vaa naqui'yaa 'o síí ne estadó Macedonia rihaan Pabló, qui'yaj Diose a

⁶ Dan me se caráán Nimán Diose chrej rihaan nij so' nata' nij so' se nana Diose estadó cu'naj Asia, ne che'é dan cachén nij so' rej cu'naj Frigia do', rej cu'naj Galacia do' a.

⁷ Gaa ne vaj nij so' chrej ndaa rej cu'naj Misia, gaa ne guun rá nij so' ca'anj nij so' estadó cu'naj Bitinia a. Tzaj ne ne ca'vee qui'yaj nij so' danj, qui'yaj Nimán Diose ma'.

⁸ Che'é dan cachén nij so' rej cu'naj Misia, ne nanij nij so' ndaa chuman' Troas a.

⁹ Ne dan me se rej nij naqui'yaa 'o rasuun rihaan Pabló, qui'yaj Diose a. Ne dan me se nicun' 'o síi ne estadó Macedonia ni'yaj Pabló, ne canacúun snó'o yo' man Pabló, cataj so':

—Ca'na' so' ndaa estadó Macedonia nihánj, ne racuj so' man núj á —taj so' rquee so' man Pabló a.

¹⁰ Gaa ne nu' nanó rá ca'anj ran' núj daj gaa qui'yaj núj ne ca'vee ca'anj núj ndaa estadó Macedonia a. 'Q se cachrj rá ya núj se vaa Diose me síi ca'ne' suun rihaan núj nata' núj se nana Diose nana sa' rihaan nij síi ne estadó Macedonia yo' a.

Nana nihánj taj xna'anj che'é chana cu'naj Lidia chana cuchumán rá ni'yaj man Jesucristó a

¹¹ Dan me se chuman' Troas ro', cavii núj rihoo chéé rihaan na, ne 'o chrej ca'anj núj cuchí' núj ndaa rej cu'naj Samotracia a. Ne yo'ó güii ca'anj núj rque rihoo ndaa chuman' cu'naj Neápolis a.

¹² Gaa ne cavii núj chuman' yo', ca'anj núj chuman' cu'naj Filipos a. Ne chuman' Filipos ro', me chuman' nocoo naj estadó Macedonia, ne chuman' cuchruj nij síi cavii Romá me yo' a. Dan me se guun raan núj doj güii chuman' Filipos yo',

¹³ ne güii naránj rá nij yuvij israelitá curihanj núj ta'yaa xij rej atúj yuvij chuman' yo', ne ca'anj núj tu'va 'o chráa a. 'Q se guun rá núj se vaa rej yo' me

rej cunuu chre' nij yuvij israelitá cachinj ni'yaj nij so' rihaan Diose a. Dan me se cayáán núj rihaan yo'óó, ne ca'mii núj ga nij chana cunuu chre' rej yo',

¹⁴ ne yáán 'o chana cu'naj Lidia, ne no' ro', me chana ránj natu'vej yatzij mantá tintá sa' inanj, ne chana cavii chuman' Tiatira me no', ne chana yanij aráj guee rihaan Diose me no' a. Dan me se cuno no' se nana Pabló, ne racuíj ndo'o Diose sij 'nij ra'a man ní' man no' se vaa ca'vee cuchumán rá no' se nana Pabló yo' a.

¹⁵ Gaa ne cata' ne nij tucua no' a. Gaa ne canacúún no' man núj, cataj no':

—Sese 'unj me chana amán ya rá ni'yaj man Diose sij 'nij ra'a man ní', rá nij soj, ne caran' soj ve' tucuj doj güii á —taj chana cu'naj Lidia rihaan núj a.

Ne rquee ndo'o no' man núj, ne caran' núj ve' tucua no' a.

Nana nihánj taj xna'anj se vaa catúj roj sí cu'naj Pabló ga Silas taga' che'é se quirii roj so' nana chree nimán 'o chana yaan rii suerté, tzaj ne racuíj Diose man roj so' a

¹⁶ Dan me se yo'ó güii ca'anj uún núj rej cachinj ni'yaj núj rihaan Diose, ne nari' tuvi' 'o chana yaan ga núj, ne nuu 'o nana chree nimán no', ne qui'yaj canaán ndo'o nij sí uun chij rihaan no' sa'anj, qui'yaj no' gaa quirii no' suerté che'é yuvij a.

¹⁷ Dan me se canoco' ndo'o no' man núj ga Pabló, ne caguáj no', cataj no':

—Nij sí nihánj ro', me sí nuu rihaan Diose sí nicun' xta', ne nata' nij so' rihaan soj me tucuaán

canoco' soj ne ca'vee nanij soj rihaan sayuun ei —taj no', ni'yaj no' man núj a.

¹⁸ Dan me se guun que'ee güii qui'yaj no' danj, gaa ne guun rmii Pabló, qui'yaj no', ne che'é dan canicaj so' ca'mii so' rihaan nana chree nuu nimán no', cataj so':

—Nihánj me se che'é suun nucuaj rqué Jesu-cristó manj a'né' 'unj suun rihaan so' se vaa curihanj so' nimán chana nihánj á —taj Pabló rihaan nana chree yo' a.

Gaa ne nu' curihanj nana chree nimán no' a.

¹⁹ Dan me se nij síi uun chij rihaan chana yaan yo' me se xcaj nij so' cuentá se vaa che'é se curihanj nana chree nimán chana yo' ro', che'é dan se ca'vee qui'yaj canaán nij so' doj sa'anj qui'yaj chana yaan yo', rá nij so' a. Che'é dan quita'aa nij so' man Pabló ga Silas, ne nucuaj rii nii man roj so' ca'anj nij so' yu'vee ndaa rihaan nij síi nicaj suun uun chij rihaan chuman' yo' a.

²⁰ Gaa ne ca'anj nicaj nij so' man roj síi cu'naj Pabló ga Silas rihaan roj cuese uun chij rihaan chuman' yo', gaa ne cataj nij so' a:

—Roj síi nihánj me se nanj yuvij israelitá me roj so', ne uun rmii rá nu' nij síi man chiháán ní' 'yaj roj so' nanj á.

²¹ 'O se nata' roj so' tucuáán naca rihaan núj, ne nuveé tucuanj no xcúún ní' nicaj ní' me tucuáán yo' che'é se síi noco' gobiernó ne Romá me ní' á —taj nij so' rihaan roj cuese uun chij rihaan chuman' yo' a.

²² Gaa ne 'o cunihaan guun rá nij yuvij man chuman' yo', ne caxrj yuvaá ndo'o nij so' man

Pabló gā Silas a. Gaa ne nucuaj cuxuun roj cuese sagan' Pabló gā Silas ndaa se quitzin' yatzéj, ne ca'ne' roj cuese suun rihaan nij tanuu se vaa go' ndo'o nij tanuu rutzij xráá roj so' a.

²³ Ne gaa quisij cayuun roj so', ne tagüej nij tanuu man roj so' rá taga', ne ca'ne' roj cuese yo' suun rihaan síi tumé taga' se vaa cütumé uxrá so' man roj so' a.

²⁴ Dan me se gaa cuno síi tumé taga' nana yo', ne canu' so' man roj so' rá 'o ve' rej rque taga' yo', ne caxrij so' tacóo roj so' rque yu'uj taj rque caj a.

²⁵ Dan me se rej nij yan' achíin ni'yaj ndo'o roj síi cu'naj Pabló gā Silas ne achráá roj so' chra' rihaan Diose, ne uno nij síi man taga' se vaa 'yaj roj so',

²⁶ ne dan me se cachén ndo'o yuún, ne ndaa nasqui' ndo'o tacóo ve' taga' yo', ne x'núj nu' nij ta'yaa taj rihaan taga' yo', ne nache nu' aga' ne' nuu chihá ra'a cunudanj nij síi 'nij taga' yo' a.

²⁷ Ne nanuû rá síi tumé taga', ne quene'en so' se vaa táá ya'núj uun nij ta'yaa, gaa ne guun rá so' se vaa aj cunánj nij síi man taga', ne che'é dan quirii so' taneê so' neê espadá, ne daj doj se ticavi' so' man ma'an so' a.

²⁸ Tzaj ne nucuaj ndo'o caguáj síi cu'naj Pabló rihaan so', cataj Pabló:

—Se guun qui'yaj chi'ij so' man ma'án so' ma'. 'O se man chre' cunudanj núj nihánj nanj ei —taj Pabló, caguáj so' a.

²⁹ Gaa ne canacúún síi tumé taga' se vaa ca'na' nıcaj nii ya'an chuguun rihaan so', ne yoo ndo'o catúj so' rá taga', ne ri'ij ndo'o man so' che'é se

chu'vi' so', ne cayáan ruj so' ndaa canó tu'va so' rihaan yo'óo rihaan roj sí cu'naj Pabló ga Silas a.

³⁰ Dan me se ca'anj nicaj so' man roj so' xe', ne xná'anj so' man roj so', cataj so':

—Daj qui'yáj, gaa ne ca'vee nanii 'unj rihaan sayuun quirán' 'unj nihánj ga —taj so', xná'anj so' man roj so' a.

³¹ Gaa ne cataj roj so':

—Cuchuman rá so' ni'yaj so' man Jesucristó sij 'nij ra'a man ní', gaa ne nanii so' rihaan sayuun nihánj do', rihaan chrej chi'ii uun chij nimán so' do' a. Ne danj inanj qui'yaj nij tuvi' soj, gaa ne cavii sa' cunudanj soj rihaan Diose á —taj roj so' rihaan sí tumé taga' yo' a.

³² Gaa ne nata' roj so' se nana Diose sij 'nij ra'a man ní' rihaan nu' nij tucua so' a.

³³ Dan me se rej nii me yo', ne maan orá dan nicaj sí tumé taga' yo' man roj so', ne na'nu' so' xráa roj so' rej canó rutzii, ne nu' qui'yaj so' danj, ne nu' cata' ne nu' nij tucua so' a.

³⁴ Gaa ne ca'anj nicaj so' man roj so' rej xraj rej ne ma'an so', ne go' so' se chá chá roj so' a. Gaa ne dan me se guun niha' uxrá rá nij tucua so', che'é se cuchuman rá nij so' ni'yaj nij so' man Diose a.

³⁵ Gaa ne rej ranga' me se ca'née roj cuese man misión taga', ne cataj nij misión rihaan sí tumé taga' a:

—Na'nej so' man roj snó'o yo' á —taj nij so' a.

³⁶ Gaa ne cuchi' sí tumé taga' yo' rihaan Pabló, ne nata' so' se nana nij misión rihaan Pabló, cataj so':

—Ca'née roj cuese nana se vaa na'nej 'unj man roj soj nanj á. Che'é dan cuano nihánj me se ca'vee

ca'anj roj soj, ne gaa xej nimán roj soj á —taj so' rihaan Pabló a.

³⁷ Gaa ne cataj Pabló rihaan nij misión a:

—Dan me se roj cuese yo' ro', nda' se sij romanó me rój, tzaj ne ne naqui'yaj cuu roj so' che'é rój, ne maan se go' rma'an nii rutzii xraá rój, qui'yaj roj so', ne quene'en cunudanj nij yuvii man rój se vaa cayuun rój, gaa ne caxrij roj so' taga' man rój a. Ne nihánj me se uun rá roj so' quirii yuve roj so' man rój xe', tzaj ne se guun danj ma'. Tananj ca'na' ma'an roj so' nihánj, gaa ne ve'é quitaj yaan roj so' rihaan rój curihanj rój taga' nihánj á —taj Pabló rihaan nij misión ca'na' taga' a.

³⁸ Dan me se nata' nij misión se nana Pabló rihaan roj cuese yo', gaa ne kuchu'vi' ndo'o roj so' gaa cuno roj so' nana se vaa sij romanó me Pabló ga Silas a.

³⁹ Gaa ne cuchi' roj cuese taga', gaa ne ca'mii sa' roj so' ga roj sí cu'naj Pabló ga Silas a. Gaa ne quitáa yaan roj cuese rihaan roj so' curihanj roj so' taga', ne ve'é cachín ni'yaj roj cuese rihaan Pabló ga Silas se vaa qui'yaj roj so' se ndo'o, curihanj roj so' chuman' yo' a.

⁴⁰ Dan me se gaa quisíj curihanj roj so' taga', gaa ne ca'anj roj so' tucua chana cu'naj Lidia a. Gaa ne gaa quene'en roj so' man nij tinúú nij so' sí nocó' man Jesucristó, ne ca'mii roj so' ga nij so', ne cunuu xej nimán nij so' qui'yaj se nana roj so', gaa ne curihanj roj so' chuman' yo', ne ca'anj roj so' a.

17

Nana nihánj taj xna'anj se vaa ca'maan rá nij sí

man chuman' Tesalónica ni'yaj nij so' man Pabló ga Silas a

¹ Dan me se cachén roj so' chuman' Anfípolis do', chuman' Apolonia do', gaa ne catúj roj so' chuman' Tesalónica a. Ne chuman' Tesalónica ro', ne 'o ve' tucu'yón nij yuvī israelitá se tucuñanj Moisés a.

² Dan me se catúj Pabló rá ve' yo' rej nuu chre' nij yuvī israelitá yo', ndaa vaa u'yón inanj so' qui'yaj so' a. Ne va'nuj ya güii cuetan' naránj rá nij so' nanó Pabló cuentó ga nij so' che'é nana no rihaan danj Diose a.

³ Dan me se cataj xna'anj Pabló rihaan nij so' se vaa sí ca'née Diose tñanii man yuvī rihaan sayuun me se no xcúun so' quiran' so' sayuun ne cavi' so' ne cunu u'ina' uún so', ne cataj Pabló se vaa ma'an Jesucristó sí nata' Pabló che'e rihaan nij so' ro', ma'an ya so' me sí ca'née Diose tñanii man yuvī rihaan sayuun a.

⁴ Gaa ne ta'aj nij sí israelitá cuno se nana Pabló ro', cuchumán rá nij so' ni'yaj nij so' man Jesucristó, ne guun tuvi' nij so' ga Pabló ne ga Silas a. Ne cuchumán rá que'ee ndo'o nij sí yaníj a'mii xna'ánj griego aráj guee inanj rihaan Diose do', que'ee nij chana raa doj ne chuman' yo' do', cuchumán rá a.

⁵ Tzaj ne guun xcoj ruvaa rá yo'ó nij yuvī israelitá ni'yaj nij so' man roj sí cu'naj Pabló ga Silas, ne che'é dan nano' nij so' doj sí chi'ii man yu'vee, ne cunu chre' ndo'o yuvī, qui'yaj nij sí chi'ii yo', gaa ne naxumaan ndo'o sayuun chuman' yo', qui'yaj nij so' a. Gaa ne cuchi' nij yuvī yo' rihaan ve' tucúá sí cu'naj Jasón ve' caran' sí

cu'naj Pabló gā Silas, ne guun rá nij yuvii quirii nij so' man roj so' ndaa rihaan yuvii cunuu chre' a.

⁶ Dan me se nuvi' roj so' ne rá ve' yo' gaa cuchi' nij yuvii nano' man roj so' ma'. Che'é dan quirii nij yuvii man ma'an síi cu'naj Jasón do', man yo'ó nij tinúú ní' síi nocó' man Jesucristó do', ne nucuaaj riij nij yuvii man nij so' ndaa rihaan nij síi uun chij rihaan chuman' yo' a. Gaa ne caguáj nij yuvii, cataj nij yuvii:

—Nij síi nihánj 'yaj natuná tucuaán naj rihaan yuvii man nu' caxra' rihaan chumii, tzaj ne nihánj me se ndaa chiháán ní' 'na' nij so' tiri' nij so' yaj nanj chuguanj.

⁷ Ne síi cu'naj Jasón nihánj me se taj ya'anj so' man roj so' adonj. Ne cunudanj nij so' ro', inanj se vaa na'vej rá síi cu'naj César qui'yaj yuvii 'yaj nij so' nanj á. 'Q se tucu'yón nij so' rihaan yuvii se vaa Jesucristó me yo'ó síi nicaj suun rey uun chij rihaan ní' nanj ei —taj nij yuvii israelitá, caguáj nij so', cuno nij síi uun chij rihaan chuman' Tesalónica yo' a.

⁸ Dan me se cuyanj ndo'o rá nij síi uun chij do', yo'ó nij yuvii ne chuman' yo' do', gaa cuno nij so' nana yo',

⁹ gaa ne cata' tu'va nij tuvi' síi cu'naj Jasón se vaa se guun qui'yaj nij so' doj sayuun, ne ndaa cuchruj nij so' sa'anj, ne na'née nij síi uun chij yo' chrej man nij so' a.

Nana nihánj taj xna'anj se vaa ca'mii natáj síi cu'naj Pabló gā Silas se nana Diose rihaan nij síi man chuman' Berea a

10 Dan me se maan orá rej nij güii yo' ca'néé nij tinúú ní' síi man chuman' Tesalónica man síi cu'naj Pabló ga Silas ca'anj roj so' ndaa chuman' Berea a. Gaa ne cuchí' roj so', ne catúj roj so' rá ve' tucu'yón nij yuvij israelitá se tucuanj Moisés a.

11 Ne nij síi israelitá yanj chuman' Berea me se sa' doj vaa nimán nij so' rihaan nij síi israelitá yanj chuman' Tesalónica yo' a. 'O se aran' rá nij so' cunō nij so' se nana Diosē, ne daj a nij güii yanj ndo'o nayaa nij so' danj Diosē, che'é se guun rá nij so' xcaj nij so' cuentá sese ya ya cuyaan vaa se nana Pabló ga nana nō rihaan danj Diosē a.

12 Che'é dan que'ee ndo'o nij so' cuchumán rá ni'yaj man Jesucristó a. Ne nij síi yaníj a'mii xna'ánj griego me se que'ee tuvi' nij so' chana ni'yanj nimán do', snó'o do', cuchumán rá ni'yaj man Jesucristó a.

13 Dan me se xcaj nij síi israelitá yanj chuman' Tesalónica cuentá se vaa ndaa chuman' Berea nata' uún síi cu'naj Pabló se nana Diosē rihaan nij yuvij a. Che'é dan ca'anj nij so' chuman' Berea yo', ne ca'mii ne nij so' che'é Pabló, ne cuyanj rá nij síi man Berea ni'yaj nij so' man síi cu'naj Pabló ga Silas, qui'yaj nij síi man Tesalónica yo' a.

14 Gaa ne nu' ca'néé nij tinúú ní' man Pabló ca'anj so' ndaa tu'va na ya'anj, tzaj ne quináj síi cu'naj Silas do', síi cu'naj Timoteo do', chuman' Berea yo' a.

15 Ne ta'aj nij síi man Berea yo' me se ca'anj tacuachéé man Pabló, ne ca'anj nicaj nij so' man so' ndaa chuman' Atenas a. Gaa ne rqué Pabló nana rihaan nij síi man Berea nata' nij so' rihaan síi cu'naj Silas ga Timoteo se vaa cuaj ca'na' roj so'

rihaan Pabló a. Gaa ne canicaj nij síi man Berea yo' quinan' nij so' chiháán nij so' a.

Nana nihánj taj xna'anj che'é nij nana ca'mii natáj Pabló rihaan nij síi man chuman' Atenas a

¹⁶ Dan me se gaa na'vij Pabló ca'na' roj síi cu'naj Silas ga Timoteo chuman' Atenas, ne ve'ee ndo'o nimán Pabló gaa quene'en so' se vaa man ndo'o ya'anj qui'yaj ra'a nij síi man Atenas yo' rque chuman' yo',

¹⁷ ne che'é dan nanó ndo'o so' cuentó ga nij yuvij israelitá do', ga nij síi yanj aráj guee rihaan Diose do', rá ve' tucu'yón nij so' se tucuanj Moisés a. Ne daj a güii ca'anj so' yu'vee, ne nanó so' cuentó ga me ma'an síi chée yu'vee yo' a.

¹⁸ Dan me se man ndo'o síi chruun yanj ne chuman' Atenas yo', ne ta'aj nij so' me síi tucu'yón se nana síi cu'naj Epicuro, ne yo'ó ta'aj nij so' cu'naj estoico a. Ne doj tuvi' nij so' nanó cuentó ga Pabló a. Dan me se ta'aj nij so' cataj:

—Me taj síi nihánj tu'va rma'an so' danj, rá soj ga —taj nij so', xná'anj nij so' man tuvi' nij so', ni'yaj nij so' man Pabló a.

Ne yo'ó ta'aj nij so' cataj:

—Síi nata' se nana ya'anj curuvi' naca me so' nanj á —taj yo'ó ta'aj nij yuvij, ese nata' Pabló se nana Jesucristó nana sa' rihaan nij so', ne nata' Pabló se vaa ca'vee cunuu i'na' uún nij síi cavi' a.

¹⁹ Dan me se ca'anj nicaj nij so' man Pabló raa 'o quij le'ej cu'naj Areópago, ne cataj nij so' rihaan Pabló:

—Qui'yáá so' se ndo'o cataj xna'anj so' rihaan núj daj vaa nij nana naca nana tucu'yón so' rihaan yuvií á.

²⁰ 'Q se caráya'anj ndo'o núj ta'aj nij nana ca'mii so' cuno núj, ne che'é dan me rá núj xcaj núj cuentá daj vaa tucuáán tucu'yón so' a —taj nij síi man Atenas rihaan síi cu'naj Pabló a.

²¹ 'Q se nij síi man chuman' Atenas do', nij síi 'na' aran' chuman' Atenas do', inanj uun rá nij so' nata' nij so' nana naca do', nari' nij so' nana naca do', nanj adonj.

²² Dan me se canicun' Pabló tanuū sca'núj nij so' raa quij cu'naj Areópago, gaa ne cataj so' rihaan nij so':

—Cunō soj sij man chuman' Atenas nihánj ca'mij á. Aj ne'enj se vaa sij aran' ndo'o rá na'vij rihaan nij ya'anj me nij soj adonj.

²³ 'Q se gaa cachenj chuman' man soj, ne quene'én 'unj nij rej na'vij soj rihaan nij ya'anj noco' soj, ne quene'én 'unj yo'o chraan altar, ne nana no rihaan chraan altar yo' cataj, “Rej na'vij ní' rihaan ya'anj ne ne'en ní' man a”, taj nana no rihaan chraan altar yo' a. Ne xa' 'unj, tzaj ne nihánj me se nata' 'unj rihaan nij soj che'é ma'an ya'anj yo' ya'anj na'vij soj rihaan, ya'anj ne ne'en soj man nanj adonj.

²⁴ ”Dan me se Diose ro', me ya'anj qui'yaj nu' chumii do', nu' rasuun man rihaan chumii do', ne se ca'vee guun tucuā so' ve' une' yuvií cane so' che'é se so' me síi 'nij ra'a nu' rej xta' nu' yo'óó nu' a.

²⁵ 'Q se so' me síi 'yaj vaa i'na' ní', ne so' me síi 'yaj naránj ní' nana, ne dan me se rqué so' nu'

rasuun achiin man ní' adonj. Ne che'é dan taj vaj rasuun achiin man so', ne se ca'vee racuíj yuvii man so' ma'.

²⁶ Ne orún' snó'o qui'yaj so' asij rque ro', veé ton dan qui'yaj so' man daj a x'ne' nij yuvii, che'é rej cayáán nij yuvii rihaan nu' cachra' chumii adonj. Ne aj ne'en Diose me daj yo' cayáán 'o 'o x'ne' nij yuvii rihaan chumii, ne aj ne'en Diose me rej guun ran' to'óo 'o 'o x'ne' nij yuvii ei.

²⁷ 'O se guun rá Diose se vaa xcaj nij yuvii cuentá che'é Diose ne nari' nij yuvii man Diose chuguanj. 'O se nuveé sij ne gan' ndo'o rihaan 'o 'o ní' me Diose ma'.

²⁸ 'O se vaa i'na' ní', 'yaj so', ne chéé ní', 'yaj so', ne vaa ní' rihaan chumii nihánj, 'yaj so' adonj. 'O se ta'aj tuvi' nij soj síi chruun yanj cachrón nana nihánj rihaan yanj se vaa: "'O se ndaa ta'níi so' me ní' adonj", taj ta'aj tuvi' ma'an soj nanj ei.

²⁹ Ne che'é se ta'nij Diose me ní' ro', che'é dan ne nó xcúún ní' guun rá ní' se vaa ase vaa Diose ro', danj vaa nij aga' oró míi titaa ní' do', nij aga' platá catzii titaa ní' do', nij yahij acój ní' do' ma'. 'O se inanjan rasuun avii raaj ma'an ní' yuvii me nij rasuun vaa danj ei.

³⁰ "Dan me se asij rque me se ne qui'yaj Diose sayuun man nij síi na'víj rihaan aga' do', rihaan yahij do' ma'. 'O se ne ca'vee xcaj nij yuvii cuentá ma'. Tzaj ne yaj me se cataj xna'anj Diose rihaan nij yuvii man cunudanj nij chuman' naj rihaan chumii se vaa canicaj nimán nij yuvii canoco' nij yuvii tucuáán sa' adonj.

³¹ Ne dan me se cachrón Diose 'o güii ca'ne' nica so' cacun' che'é cunudanj nij yuvii man rihaan

chumij a. Ne aj cune' so' man 'o snó'o guun síi ca'ne' cacun' che'é yuvij a. Ne che'é se cunuu i'na' uún snó'o yo', qui'yaj Diose, gaa cavi' so', ne che'é dan no xcuún cunudanj yuvij cuchuman rá nij yuvij se vaa veé ya snó'o yo' me so' adonj —taj Pabló rihaan nij síi man Atenas yo' a.

³² Dan me se gaa cuno nij síi man Atenas nana se vaa cunuu i'na' uún 'o síi cavi', ne ta'aj nij so' ca'nga' naco, ne yo'ó ta'aj nij so' cataj:

—Ndaa yo'ó güii uún me se ca'na' núj cuno núj se nana so' nanj ei —taj yo'ó ta'aj nij síi man chuman' Atenas yo' a.

³³ Veé dan, ne curihanj Pabló sca'núj nij so' a.

³⁴ Tzaj ne doj nij yuvij guun tuvij' ga Pabló, ne cuchuman rá nij so' ni'yaj nij so' man Jesucristó a. Ne yo'ó so' me 'o síi uun chíj cu'naj Dionisio, ne yo'ó no' me chana cu'naj Dámaris, ne vaa doj yuvij ga nij so' uún a.

18

Nana nihánj taj xna'anj che'é suun qui'yaj suun Pabló chuman' Corinto a

¹ Cachén doj, gaa ne cavii Pabló chuman' Atenas, ca'anj so' ndaa chuman' Corinto a.

² Tihaj yuun nari' tui' so' ga 'o síi israelitá cu'naj Aquila, ne xa' so', tzaj ne sij cavii rej cu'naj Ponto me so', ne gaa cayáán so' chuman' Romá, ne ca'ne' síi nicaj suun emperador cu'naj Claudio suun se vaa cavij cunudanj nij yuvij israelitá chuman' Romá ca'anj yanij nij so' a. Che'é dan cavii so' ga nica so' chana cu'naj Priscila yo'óo noco cu'naj Italia, ne che'é dan sij ca'na' naca chuman' Corinto me roj so' a. Dan me se cuchi' Pabló rihaan roj so',

³ ne che'é se cyaan vaa suun 'yaj suun Pabló ga suun 'yaj suun roj so' ro', che'é dan caran' Pabló ga roj so', ne qui'yaj suun so' ga roj so' a.

⁴ Ne daj a nij güii cuetan' naránj rá nij yuvij israelitá me se ca'mii so' ga nij yuvij cunuu chre' rá ve' tucu'yón nij yuvij israelitá se tucuanj Moisés, ne cuchumán rá doj sít israelitá do', doj sít yaníj a'mii xna'ánj griego do', gaa cuno nij so' se nana so' a.

⁵ Dan me se gaa cavii sít cu'naj Silas ga Timoteo estadó Macedonia ca'na' roj so' chuman' Corinto, ne yo'ó ca'née nimán Pabló nata' so' se nana Diose rihaan nij yuvij, ne inanj cataj xna'anj so' rihaan nij yuvij israelitá se vaa Jesucristó me sít ca'née Diose tinanii man yuvij rihaan sayuun a.

⁶ Tzaj ne ca'mii canó tuvi' nij yuvij israelitá ga Pabló, ne quij ca'mii nij so' che'é Pabló a. Che'é dan tucuyuu so' yo'óo tachruu no rihaan sagan' so', gaa ne cataj so' rihaan nij yuvij a:

—Ma'an inanj soj me rá ca'anj rihaan ya'an nanj á. Ne tumé 'unj cacun' se vaa quiran' soj sayuun qui'yaj Diose ma'. Ne yaj me se rej rihaan nihánj me se ca'anj 'unj nata' 'unj se nana Diose rihaan nij sít yaníj nanj á —taj Pabló rihaan nij so' a.

⁷ Gaa ne cavii so' rej mán nij so', ne ca'anj so' ve' tucua' 'ó sít cu'naj Titó Justo, ne so' ro', me 'ó sít yaníj ne 'ó sít aráj guee rihaan Diose me so', ne ve' tucua' so' ro', ne rej x'nuj ve' tucu'yón nij yuvij israelitá se tucuanj Moisés a.

⁸ Dan me se 'ó sít cu'naj Crispo sít 'nij ra'a ve' tucu'yón nij yuvij israelitá se tucuanj Moisés ro', me 'ó so', ne cuchumán rá nu' nij tucua so' ni'yaj nij so' man Diose sij 'nij ra'a man ní' a. Gaa ne

cuchi' nana rihaan nij síi man Corinto se vaa síi cu'naj Crispo me síi cuchumán rá ni'yaj man Diöse sij 'nij ra'a man ní', ne che'é dan cuchumán rá uún que'ee nij so' ni'yaj nij so' man Jesucristó, ne cata' ne cunudanj nij so' a.

⁹ Ne rej nij me se naqui'yaa Diöse sij 'nij ra'a man ní' rihaan Pabló, ne cataj so' a:

—Se cuhu'ví' so' ma'. Yo'ó ca'mii so' se nanaj, ne se gaa díj tu'vá so' ma'.

¹⁰ 'O se vaj 'unj ga so', ne taj vaj síi go' mán so' ne qui'yaj chí'ii mán so' ma'. 'O se man uxrá yuvií man chuman' nihánj canoco' manj adonj —taj Diöse sij 'nij ra'a man ní' rihaan Pabló a.

¹¹ Gaa ne dan me se quináj Pabló 'o yo' táa yanée, tucu'yón so' se nana Diöse rihaan nij síi man chuman' Corinto yo' a.

¹² Dan me se yo' dan me se síi cu'naj Galión me síi nicaj suun gobernador uun chij rihaan chuman' Corinto yo' a. Ne naxumaan yuvií israelitá, ne yo'ó me nimán nij so' ni'yaj nij so' man Pabló, ne ca'anj nı́cay nij so' man Pabló rihaan síi nicaj suun cu'naj Galión yo', che'é rej naqui'yaj cuu so' che'é Pabló a.

¹³ Gaa ne cataj nij so':

—Síi nihánj ro', 'yaj tanáj xco yuvií se tucuanj núj che'é suun na'víj nij yuvií rihaan Diöse, ne ino doj na'víj nij yuvií rihaan Diöse, 'yaj síi nihánj ei —taj nij yuvií israelitá yo', ni'yaj nij so' man Pabló a.

¹⁴ Daj doj tzín' se cavii nana tu'va Pabló, tzaj ne ma'an síi cu'naj Galión me síi ca'mii rihaan nij yuvií israelitá yo', ne cataj so':

—Cunoj soj sij israelitá ca'mij á. Sese vaa cacun' chi'ii qui'yaj síi nihánj, ne no xcúnj cunoj se vaa taj soj saj á.

¹⁵ Sese taj, gaa ne che'é inanj se nana soj do', che'é se tucuanj soj do', araa soj cacun' xraá so', gaa ne che'é dan ma'an soj no xcúun ca'ne' cacun' che'é so' nanj adonj. 'O se xa' 'unj nihánj, tzaj ne na'vej uxrá raj naqui'yaj cuú 'unj che'é rasuun vaa danj ma' —taj síi cu'naj Galión rihaan nij yuvii israelitá yo' a.

¹⁶ Gaa ne quirii so' man cunudanj nij so' tucua suun a.

¹⁷ Gaa ne quita'aa cunudanj nij yuvii man síi cu'naj Sóstenes síi 'nij ra'a man ve' tucuyón nij so' se tucuanj Moisés, ne go' nij so' chruun xraá so' rihaan tucua suun a. Tzaj ne ne rihuun rá síi cu'naj Galión yo' gaa qui'yaj nij so' danj a ma'.

Nana nihánj taj xna'anj se vaa nanicaj Pabló nan' so' chuman' Antioquía a

¹⁸ Dan me se guun que'ee doj güii guun raan Pabló ga nij tinúú ní' síi ne chuman' Corinto, gaa ne cataj so' se vaa ca'anj so', ne cavii so' rque rihoo chée rihaan na, ne ca'anj so' ndaa estadó cu'naj Siria, ne ca'anj chana cu'naj Priscila do', síi cu'naj Aquila do', ga so' a. Tzaj ne asino yaan caca caan nii raá Pabló, qui'yaj Pabló, gaa vaj nij so' chuman' Cencrea, che'é se aj cata' tu'va so' 'o nana rihaan Dióse a.

¹⁹ Dan me se cuchi' nij so' chuman' Efeso, ne tanáj Pabló man roj so' chuman' yo' a. Gaa ne catúj ma'an so' rá ve' tucuyón nij yuvii israelitá se

tucuꝋnj Moisés, ne ca'mii so' ga nij yuvii che'é se nana Dioso a.

²⁰ Ne cachíin ni'yaj nij síi man chuman' Efeso se vaa guun raꝋn so' doj chiháán nij so', tzaj ne ne ca'vej so' a.

²¹ Tzaj ne cataj so':

—Ca'anj 'uꝋnj nanj ei. Vaa che'é ndo'o canicún' 'uꝋnj 'o cha'anj canuû chuman' Jerusalén, tzaj ne sese Dioso ca'vej, ne ndaa yuún xe ca'na' uún 'uꝋnj a —taj so', ne cavii so' rque rihoo chéé rihaan na, ne tanáj so' man chuman' Efeso yo' a.

²² Dan me se ca'anj so' ndaa chuman' Cesarea, ne cavii so' ca'anj ni'yaj so' man x'ne' nij síi amán rá ni'yaj man Jesucristó yanj chuman' Jerusalén a. Gaa ne nanij so' ndaa chuman' Antioquía a.

²³ Ne guun raꝋn so' doj chuman' Antioquía, gaa ne ca'anj so' ndaa vaa naj 'o 'o chuman' naj estadó Galacia do', estadó Frigia do', ne nari' nucuj rá cunudanj nij síi tucu'yón se nana Jesucristó yanj nij chuman' yo', qui'yaj so' a.

Nana nihánj taj xna'anj che'é síi cu'naj Apolos a

²⁴ Dan me se vaa 'o síi israelitá cu'naj Apolos, ne sij cavii chuman' Alejandría me so', ne sij ve'é ndo'o a'mii me so', ne sa' uxrá nari' so' danj Dioso a. Dan me se ca'anj so' ndaa chuman' Efeso a.

²⁵ Ne aj nari' so' se tucuꝋnj Dioso sij 'nij ra'a man ní', ne guun ndo'o rá nimán so', ne che'é dan nica nata' so' ne tucu'yón so' se nana Jesucristó rihaan nij yuvii a. Tzaj ne ataa xcaj so' cuentá se vaa no xcuún yuvii cata' ne yuvii che'é Jesucristó, ne inanj quene'en so' daj qui'yaj síi cu'naj Juan gaa cuta' ne Juan man yuvii a.

26 Dan me se guun che'e so' ve'é ca'mii natáj so' rá ve' tucu'yón nij yuvii israelitá man chuman' Efeso se tucuanj Moisés a. Ne cuno chana cu'naj Priscila do', sí cu'naj Aquila do', gaa ne nicaj tuvi' roj so' ga so', ne nica doj ne sa' doj tucu'yón roj so' se tucuanj Diose man Apolos a.

27 Dan me se guun rá sí cu'naj Apolos cachén so' ndaa estadó Acaya, gaa ne doj a nari' nucuj so' qui'yaj nij tinúú ní' sí man chuman' Efeso, ne qui'yaj nij so' yanj cartá nayaá nij sí tucu'yón se nana Jesucristó man estadó Acaya, ne cataj nij so' se vaa ve'é nicaj tuvi' nij sí man Acaya ga sí cu'naj Apolos yo' a. Gaa ne gaa cuchí' sí cu'naj Apolos ndaa estadó Acaya, ne racuj ndo'o so' man nij tinúú ní' sí cuchumán rá ni'yaj man Jesucristó che'é se luj qui'yaj Diose a.

28 'O se cunaj uxrá tihaan so' rihaan nij yuvii israelitá ne amán rá ni'yaj man Jesucristó se vaa taj danj Diose se vaa Jesucristó me sí ca'née Diose tinanii man yuvii rihaan sayuun, ne ca'mii canó tuvi' so' ga nij so' rej man ndo'o nij yuvii, ne qui'yaj canaán se nana sí cu'naj Apolos rihaan se nana nij sí israelitá yo' a.

19

Nana nihánj taj xna'anj se vaa ca'na' Nimán Diose rihaan nij sí tucu'yón se nana Jesucristó yanj chuman' Efeso a

1 Dan me se gaa cayáán sí cu'naj Apolos chuman' Corinto, ne cachén Pabló rej xraj doj cuchí' so' chuman' Efeso, ne nari' so' doj sí tucu'yón se nana Jesucristó a.

² Gaa ne xná'anj Pabló man nij so' a:

—Ne catúj Nimán Diose nimán nij soj gaa cuchumán rá soj ni'yaj soj man Jesucristó na' —taj Pabló, xná'anj so' man nij so' a.

Gaa ne cataj nij so':

—Taj ma'. 'O se a ne cunō núj nana se vaa vaa 'o Nimán Diose a ma' —taj nij so' rihaan Pabló a.

³ Gaa ne xná'anj Pabló man nij so' a:

—Ne me síi che'e cata' ne nij soj ga —taj so', xná'anj so' man nij so' a.

Gaa ne cataj nij so':

—'O se cata' ne núj ndaa vaa cataj xna'anj síi cu'naj Juan nanj á —taj nij so' rihaan Pabló a.

⁴ Gaa ne cataj Pabló rihaan nij so' a:

—Xa' Juan, tzaj ne cuta' ne so' man yuvii che'é yan canicaj nimán nij yuvii canoco' nij yuvii tu-cuáán sa' a. Ne cataj Juan rihaan nij yuvii se vaa síi ca'na' rej xco Juan ro', me síi nō xcúún nij yuvii cuchuman rá nij so' ni'yaj nij so' man, ne síi ca'na' rej xco Juan ro', me Jesucristó a —taj Pabló rihaan nij síi ne chuman' Efeso a.

⁵ Dan me se gaa cuno nij so' nana vaa danj, gaa ne cata' ne nij so' che'é Jesucristó sij 'nij ra'a man ní' a.

⁶ Gaa ne cuta' Pabló ra'a so' raaj nij so', ne catúj Nimán Diose nimán nij so', ne ca'mii nij so' xna'ánj naca, ne nata' nij so' nana rqué Diose rihaan ma'an nij so' nata' nij so' a.

⁷ Ne cunudanj nij snó'o me se quisíj ya 'o chuvij nij so' ta' asuun a.

Nana nihánj taj xna'anj se vaa ca'anj Pabló ca'mii so' ga yuvii man rá escuela 'nij ra'a sí cu'naj Tiranno a

⁸ Gaa ne catúj Pabló rá ve' tucu'yón nij yuvii israelitá man chuman' Efeso se tucuanj Moisés, ne va'núj yavii 'o rihāan inanj ca'mii so' ga nij so' che'é se me rá so' cuchuman rá nij so' nana che'é suun uun chij Diose nimán yuvii do', rihāan chumii nihánj vaa güii do' a.

⁹ Tzaj ne nichraj ndo'o rá ta'aj nij so', ne ne ca'vej rá nij so' cuchuman rá nij so' nana sa' yo' ma'. Gaa ne quij ca'mii nij so' che'é tucuaán noco' ní' cuno cunudanj nij yuvii man rá ve' yo', gaa ne che'é dan tanáj Pabló man nij sí nichraj rá yo', ne ca'anj yaníj nij sí tucu'yón se nana Jesucristó rihāan nij so', qui'yaj Pabló, ne ca'anj so' ve' escuela 'nij ra'a 'o sí cu'naj Tiranno, ne daj a güii ca'mii so' ga yuvii rá ve' escuela yo' a.

¹⁰ Ne quisíj vij ya yo' qui'yaj so' danj, ne che'é dan cunudanj nij sí israelitá ga nij sí yaníj a'mii xna'ánj griego yanj estadó Asia xcaj cuentá che'é se nana Jesucristó sij 'nij ra'a man ní' a.

Nana nihánj taj xna'anj se vaa quiran' nij ta'núí sí cu'naj Esceva sayuun, qui'yaj 'o nana chree a

¹¹ Dan me se guun nucuaj Pabló qui'yaj so' suun sa' noco, qui'yaj Diose,

¹² ne ndaa nicaj nii se vitó Pabló do', yatzíj numii catuun Pabló do', ca'anj nii cuta' nii raaj nij sí ran', ne nahuun sa' nij sí ran', ne curihanj nana chree nimán nij sí ran' yo', qui'yaj Diose a.

¹³ Ne vaa doj sí israelitá chéé canó chuman', ne nij so' me sí uta' ra'a raaj sí ran' ne urihanj nana

chree nimán nij sí ran' yo', 'yaj nij so' a. Ne cata' tu'va nij so' se chuvii Jesucristó sij 'nij ra'a man ní' se vaa guun rá nij so' račuíj so' man nij so' qui'yaj nij so' ndaa vaa 'yaj Pabló a. Dan me se cataj nij so' rihaan nana chree a: “Nihánj me se a'né' 'unj suun rihaan nij soj nana chree se vaa curihanj soj nimán sí ran' nihánj che'é Jesucristó sí a'mii natáj sí cu'naj Pabló che'é á”, taj nij so' a.

¹⁴ Ne vaa chij ta'ní' 'o sí israelitá cu'naj Esceva, ne xrej atá suun nocoo doj me so', ne chij nij ta'ní' so' ro', ca'mii danj rihaan 'o nana chree nuu nimán 'o so' a.

¹⁵ Gaa ne nana chree yo' ro', ca'mii rihaan nij so', ne cataj yo':

—Ne 'unj me se ne'enj man Jesucristó, ne ne'enj daj sij me Pabló a. Tzaj ne soj me se ne ne'en uxrá 'unj man soj a ma' —taj nana chree yo' rihaan chij nij so' a.

¹⁶ Gaa ne sí nuu nana chree yo' nimán ro', güéj so', ne tuguáj tuvi' so' ga nij so', ne nucuaj so' doj rihaan nij so', ne qui'yaj canaán so' man cunu' chij nij so' a. Dan me se cunánj nij so', curihanj nij so' rá ve' yo', ne cánj uun vaa nij so', ne quiran' ndo'o nij so' sayuun, qui'yaj sí nuu nana chree nimán yo' a.

¹⁷ Gaa ne xcaj cunudanj nij yuvií israelitá ga nij yuvií yaníj a'mii xna'ánj griego yanj chuman' Efeso yo' cuentá se vaa quiran' chij nij so', ne che'é dan kuchu'vi' ndo'o cunudanj nij so', ne cataj nij so' se vaa sa' uxrá vaa Jesucristó sij 'nij ra'a man ní' a.

¹⁸ Ne que'ee nij sí cuchumán rá ni'yaj man Jesucristó me se naxra' tu'va nij so', ne nata' ya nij

so' che'é cacun' qui'yaj nij so' a.

¹⁹ Ne que'ee nij sí qui'yaj chree gaa rque doj ro', naqui'yaj chre' nij so' danj nij so' yanj libró no nana chree, ne caxríj ya'an nij so' man nij yanj yo', ni'yaj cunudanj nij yuvií a. Gaa ne narii nij so' cuentá me daj sa'anj nó nij yanj yo', ne quisíj vij chihaa chí' míj sa'anj platá catzii nó nij yanj tucuaca a nij so' a.

²⁰ Veé dan me se cha'nuu uxrá se nana Jesucristó sij 'nij ra'a man ní', ne nari' nucuaaj doj se nana so' a.

Nana nihánj taj xna'anj se vaa ca'maan rá nij sí 'yaj ya'anj aga' yanj chuman' Efeso ni'yaj nij so' man Pabló a

²¹ Veé dan gaa ne ca'née nimán Pabló cachén so' estadó cu'naj Macedonia ga Acaya ne ca'anj so' ndaa chuman' Jerusalén, ne cataj so' se vaa asa' quisíj ca'anj so' ndaa chuman' Jerusalén, ne no xcúún so' ca'anj ni'yaj so' ndaa chuman' Romá, taj so' a.

²² Gaa ne ca'née so' vij tuvi' nij sí 'yaj suun ga so' catuu roj so' rej Macedonia a. Dan me se sí cu'naj Timoteo do', sí cu'naj Erasto do', me roj sí ca'née so', ne ma'an so' guun raan doj güii estadó Asia a.

²³ Ne güii dan me se guun ndo'o sayuun che'é se tucuanj ní' sij noco' man Jesucristó a.

²⁴ Dan me se vaa 'o sí cu'naj Demetrio ne sí 'yaj suun aga' me so', ne nij tuvi' nij so' nicaj aga' platá catzii ne 'yaj nij so' nuvií le'ej nii, ne ase vaa ma'an nuvií na'víj yuvií rihaan ya'anj chana cu'naj Diana vaa yo' a. Ne 'yaj canaán ndo'o nij so' sa'anj a.

²⁵ Dan me se canacúún sí cu'naj Demetrio man cunudanj nij sí 'yaj suun ase vaa suun 'yaj suun

ma'an so' ne chuman' Efeso yo', ne ca'mii natáj so' rihaan nij so', cataj so':

—Cuno nij soj nana ca'mij rihaan soj, tinuj. Dan me se aj ne'en soj se vaa che'é suun 'yaj suun ní' ro', che'é dan 'yaj canaán ndo'o ní' sa'anj á.

²⁶ Ne nihánj me se aj ne'en ní' daj 'yaj síi cu'naj Pabló yo', ne ca'na' nana rihaan ní' se vaa vaj so' nata' so' se nana so' se vaa xa' ya'anj 'yaj yuvij, tzaj ne nuveé ya'anj ya me ya'anj vaa danj ma'. Ne nuveé inanj chuman' Efeso nihánj me rej tu'va so' danj ma'. Tananj vaj so' ndaa nu' estadó Asia nihánj ta' asuun, ne cuchumán rá que'ee ndo'o yuvij man estadó Asia nihánj cuno nij so' se nana Pabló, ne tanáj nij so' se tucuanj ní' qui'yaj Pabló adonj.

²⁷ Dan me se xraj ne vaa güii nachri' yuvij ni'yaj yuvij se suun ní', gaa ne dan me se guun rá uún nij yuvij se vaa taj se gún' nuvií na'víj ní' rihaan ya'anj chana sa' ndo'o cu'naj Diana a ma'. Ne cataj nij yuvij se vaa nuveé ya'anj sa' me no' ma'. Ne xa' no', tzaj ne nu' ní' sij man estadó Asia nihánj do', ndaa yuvij man rihaan nu' chumii do', na'víj rihaan no' ei —taj síi cu'naj Demetrio cuno nij tuvi' so' a.

²⁸ Dan me se gaa cuno nij so' se nana Demetrio, ne cuyanj uxrá rá nij so', ne caguáj nij so', cataj nij so':

—Guee uxrá Diana ta'anj ní' sij man Efeso ei —taj nij so', caguáj nij so' a.

²⁹ Gaa ne yo'o nachej raá cunudanj nij yuvij man chuman' Efeso yo', ne quita'aa nij yuvij man síi cu'naj Gayo ga síi cu'naj Aristarco che'é se sij chéé ga Pabló me roj so', ne sij cavii estadó Macedonia

me roj so' a. Dan me se nicaj cunudanj nij yuvij man roj so', ca'anj nij yuvij, ne cunanj nij so' catuj nij so' rej estadió nuu chre' que'ee ndo'o yuvij a.

³⁰ Ne guun rá Pabló catuu so' rej man nij yuvij, tzaj ne ne ca'vej rá yo'ó nij sí tucu'yón se nana Jesucristó ca'anj so', ne ne ca'vee catuu Pabló rej yo' qui'yaj tuvi' so' a ma'.

³¹ Ne ta'aj nij sí uun chij rihaan nu' estadó Asia ro', me tuvi' Pabló, ne ca'née nij so' nana rihaan Pabló se vaa daj chihaa míj se guun catuu Pabló rej cunuu chre' nij yuvij a.

³² Dan me se ino doj vaa nana caguáj 'o 'o ta'aj nij yuvij, che'é se nachej se nana nij so' a. Ne me doj uxrá doj nij so' ne ne'en daj me che'é cunuu chre' nij so' ma'.

³³ Dan me se tiguíj ra'a nii man sí cu'naj Alejandro, ne canicun' so' rihaan nij yuvij, qui'yaj nij yuvij israelitá, ne guun rá ta'aj nij yuvij se vaa ca'mij Alejandro rihaan nij so' a. Gaa ne tucunó ra'a so' rihaan nij yuvij se vaa dínj gaa tu'va nij yuvij, gaa ne ca'vee ca'mij nacaj so' rihaan chuman' a.

³⁴ Tzaj ne xcay nij yuvij cuentá se vaa sij israelitá me sí canicun' rihaan nij so', ne che'é dan yo'o caguáj cunudanj nij yuvij, cataj nij so':

—Guee uxrá Diana ta'anj ní sij man Efeso ei —taj taran' nij yuvij, ne cunu' vij ya orá caguáj nij so' danj a.

³⁵ Ndaa síj, gaa ne ca'ne' rá nij yuvij caguáj nij so', qui'yaj sí uta' yanj tucúa suun, ne cataj ma'an so' rihaan nij yuvij a:

—Cuno soj sij man chuman' Efeso ca'mij á. Ya ya cunudanj yuvij man rihaan chumij ne'en se vaa

chuman' Efeso nihánj me chuman' na'vǐj rihaan ya'anj guee cu'naj Diana ga yahij quiniy rej xta' cuyaan vaa ga no' adonj.

³⁶ Che'é se ya vaa nu' nana nihánj ro', che'é dan no xcúun nij soj dínj cumán soj, ne xcaj soj cuentá, ne se guun qui'yaj soj a doj se nij ma'.

³⁷ 'Q se ca'na' roj snó'o nihánj, qui'yaj soj, ne nuveé sij qui'yaj se nij rque nuví me roj so', ne nuveé sij ca'mii nana nij che'é ya'anj na'vǐj ní rihaan me roj so' ma'.

³⁸ Dan me se xa' nij tuvi' sí cu'naj Demetrio, tzaj ne sese me rá nij tuvi' nij so' cuta' nij so' cacun' xráa 'o yuvi, ne vaa ya'núj rihaan nij so' ca'anj nij so' rihaan cuesé, ne ca'vee cuta' nij so' cacun' xráa tuvi' nij so' nanj á.

³⁹ Ne sese me rá soj naqui'yaj cuu soj doj che'é yo'ó rasuun, ne güii nuu chre' ní ndaa vaa tucuáan noco' ní ro', güii dan me ca'vee qui'yaj soj danj ei.

⁴⁰ 'Q se nihánj me se ca'vee cuta' nii cacun' xráa ní se vaa qui'yaj rma'an ní sayuun cuan', ne se guun nucuaj ní cataj xna'anj ní me che'é me ca'na' ní ne caguáj ndo'o ní nihánj ma' —taj sí uta' yanj tucua' suun rihaan nij yuvi,

⁴¹ gaa ne na'née so' chrej man taran' nij so' a.

20

Nana nihánj taj xna'anj se vaa ca'anj Pabló estadó cu'naj Macedonia ga Grecia a

¹ Dan me se gaa cha'nuu nij yuvi yo', gaa ne canacúun Pabló man nij sí tucuyón se nana Jesucristó se vaa cunu chre' nij so' ga so', ne nago' so' chrej nucuaj man nij so' a. Gaa ne quita'aa

so' ra'a cunudañj nij so', ne cataj so' se vaa ca'anj so', ne veé dan cavii so' ne ca'anj so' ndaa estadó Macedonia a.

² Dan me se cachén so' nu' estadó Macedonia yo', ne nago' ndo'o so' chrej nucuañj man nij síi noco' man Jesucristó ne chuman' yo', gaa ne ca'anj so' ndaa estadó cu'naj Grecia a.

³ Dan me se quisíj va'núj yavii guun raan so' estadó Grecia yo', gaa ne guun rá so' cavii so' rque rihoo chéé rihaan na ne ca'anj so' estadó cu'naj Siria, tzaj ne xcañj so' cuenta se vaa guun rá nij yuvii israelitá qui'yañj nij so' sayuun man so', ne che'é dan ca'née nimán so' asino yaan cachee tacoj so' cachén so' sca'núj estadó Macedonia gaa ne canicaj so' ndaa estadó Siria a.

⁴ Ne yo'o tuvi' nij síi cachée ga Pabló ro', me síi cu'naj Sópater, ne ta'níi síi cu'naj Piro me so', ne síi cavii chuman' Berea me so' a. Ne yavíj tuvi' nij so' me síi cavii chuman' Tesalónica, ne Aristarco do', Segundo do', cu'naj roñj so' a. Ne yo'ó so' me síi cu'naj Gayo, ne síi cavii chuman' Derbe me so' a. Ne vaa síi cu'naj Timoteo, ne yavíj tuvi' nij so' me síi cavii estadó Asia, ne Tíquico do', Trófimo do', cu'naj roñj so' a.

⁵ Dan me se guun yaan nij so' rihaan núj, ca'anj nij so' chuman' Troas, gaa ne na'vij nij so' man núj rej yo' a.

⁶ Gaa ne gaa cachén cha'anj chá nij yuvii israelitá chraa yo'óo trigó, ne cavii núj 'o rihoo chéé rihaan na, ne cavii núj chuman' Filipos, ca'anj núj, ne cachén 'un' güii, gaa ne cuchí' núj rihaan nij so' chuman' Troas yo' a. Gaa ne guun raan núj yo'ó chij güii chuman' yo' a.

Nana nihánj taj xna'anj se vaa cunuu i'na' uún 'o sí cavi', qui'yaj Pabló a

7 Dan me se güii cotungó me se gaa cunuu chre' taran' núj cuxra' ta'aj núj rachrúún, ne ca'mii natáj Pabló nana rihaan yo'ó nij tinúú ní' a. 'O se guun rá so' cavii so' ranga' yo'ó güii ca'anj so' níchrej, ne che'é dan yo'o ca'mii so' ndaa guun ta'aj yan' a.

8 Ne ve' nata' rej nuu chre' nij so' me se man ndo'o aga' ya'an chuguun rá ve' yo' a.

9 Dan me se táá 'o sí tachruu cu'naj Eutico 'o ta'yaa le'ej, ne che'é se xcaan ndo'o ca'mii Pabló, gaa ne che'é dan ca'na' ndo'o nej rihaan Eutico, ne yuun che'e cotoj so', ne quiniy so' ca'anj so' rej taj xe' a. Dan me se ndaa rej nata' va'nuj raá ve' táá so' gaa quiniy so' a. Gaa ne naniy yo'ó nij so' rihaan yo'ó, ne naxcaj nij so' man so', tzaj ne aj cavi' un' so' nanj á.

10 Gaa ne naniy Pabló, ne ca'anj quinaj Pabló rihaan nee man sí cu'naj Eutico yo', ne na'yaan Pabló man so', ne cataj Pabló rihaan yo'ó nij so' a:

—Se cuchu'vi' soj ma'. 'O se vaa i'na' so' ei —taj Pabló rihaan nij so' a.

11 Gaa ne cavii uún Pabló ga yo'ó nij so' rá ve' nata' yo', ne cuxra' ta'aj so' rachrúún chá nij so', ne dan me se gaa quisíj chá nij so', gaa ne ca'mii natáj so' doj rihaan nij so' ndaa se quisíj güii a. Gaa ne curihanj Pabló, ca'anj so' a.

12 Dan me se cunuu i'na' uún xnii quiniy, ne ca'anj nicaj nii man so', ne guun xej ndo'o nimán taran' nij so' a.

Nana nihánj taj xna'anj se vaa cavii nij tuvi' Pabló chuman' Troas, ne ca'anj nij so' ndaa chuman'

Mileto a

¹³ Dan me se cavii núj rque rihoo chéé rihaan na, ne táá yaan núj rihaan Pabló, ca'anj núj chuman' cu'naj Asón a. 'Q se guun rá Pabló cachee tacoj so' ca'anj so' chuman' Asón, ne che'é dan guun ya ca'mii Pabló ga núj se vaa nari' tuvi' núj ga so' chuman' Asón ne ca'anj taran' núj a.

¹⁴ Dan me se gaa nari' tuvi' núj ga Pabló chuman' Asón, ne cavii so' rque rihoo ga núj, ne ca'anj taran' núj ndaa chuman' Mitilene a.

¹⁵ Gaa ne cavii rihoo chuman' Mitilene, qui'yaj núj, ne yo'ó güii me se cachén núj nichrun' rej naj chuman' cu'naj Quío a. Ne yo'ó güii uún me se cuchi' núj ndaa rej cu'naj Samos, ne yo'ó güii uún me se ca'anj núj ndaa chuman' cu'naj Mileto a.

¹⁶ 'Q se guun ya rá Pabló se vaa se cachén so' chuman' Efeso, che'é se na'vej rá so' guun raan so' estadó Asia ma'. Tananj guun rá so' cuchi' ra'yanj so' chuman' Jerusalén che'é cha'anj Pentecostés canuú a.

Nana nihánj taj xna'anj daj ca'mii Pabló ga nij síi chij nicaj yu'unj man x'ne' nij síi cuchumán rá ni'yaj man Jesucristó yanj chuman' Efeso a

¹⁷ Dan me se gaa caran' Pabló chuman' Mileto, ne ca'née so' nana rihaan nij síi chij nicaj yu'unj man x'ne' nij yuvií cuchumán rá ni'yaj man Jesucristó yanj chuman' Efeso se vaa ca'na' nij so' rihaan so' a.

¹⁸ Dan me se gaa ca'na' nij so' rihaan Pabló, ne cataj Pabló rihaan nij so' a:

—Aj ne'en nij soj daj vaa 'unj daj a güii canej ga soj asij naca ca'ná' 'unj estadó Asia nihánj ndaa cuano a.

19 'O vaa nica' nimán 'un̄j nuu 'un̄j rihaan Diose sij 'nij ra'a man ní', ne ne'en soj daj vaa ta'veé 'un̄j, ne daj vaa quirán' 'un̄j sayuun che'é se nuchruj raá nij sí israelitá qui'yaj nij so' sayuun manj a.

20 Dan me se ne a'ne' rá 'un̄j ga suun natá' 'un̄j rihaan soj nu' nana qui'yaj cavii sa' soj doj, ne tucu'yón 'un̄j nana yo' rihaan soj rej cuno que'ee yuvii ca'mij do', ndaa rá ve' tucúa ma'an soj do', tucu'yonj man soj a.

21 Ne 'o xraan inanj cataj xna'anj 'un̄j rihaan nij yuvii israelitá do', rihaan nij yuvii yaníj a'mii xna'ánj griego do', se vaa no xcúún nij so' canicaj nimán nij so' canoco' nij so' man Diose ne cuchuman rá nij so' ni'yaj nij so' man Jesucristó sij 'nij ra'a man ní' a.

22 "Ne nihánj me se guun ya raj se vaa no xcúnj ca'anj 'un̄j chuman' Jerusalén, qui'yaj Nimán Diose, tzaj ne ne ne'enj daj quiranj sese cuchij yo' ma'.

23 Tzaj ne ne'én 'un̄j se vaa me ma'an chuman' vaj 'un̄j, ne Nimán Diose 'o xraan inanj taj xna'anj rihaan 'un̄j se vaa vaa güii, ne caxrii nii taga' manj ne qui'yaj nii sayuun manj nanj adonj.

24 Tzaj ne a doj ne chu'ví' 'un̄j sese ndaa ticavi' nii mán 'un̄j rihaan chumii nihánj a ma'. Tzaj ne ve'é inanj me raj tisíj suun ca'ne' Jesucristó sij 'nij ra'a man ní' rihanj, ne che'é dan 'o xraan inanj taj xna'anj 'un̄j nana sa' rihaan yuvii che'é se luj qui'yaj Diose che'é taran' ní' a.

25 Ne nihánj me se ne'én 'un̄j se vaa nij soj sij cuno nana ca'mii natáj 'un̄j che'é suun uun chij Diose nimán yuvii do', rihaan chumii nihánj vaa güii do', a ó soj se quene'en uún manj daj chihaa

míj a ma'.

²⁶ Che'é dan me cuano yaj me se cataj yá 'unj rihaan soj se vaa nuveé 'unj me síi tumé cacun' sese ca'anj ni'ya 'o tuvi' soj rihaan Diose ma'.

²⁷ 'O se ne a'ne' rá 'unj ga suun taj xna'anj 'unj rihaan cunudanj soj nu' se vaa me rá Diose cuno soj ma'.

²⁸ "Dan me se ase vaa tumé yuvij man daán yuvij matzinj ro', danj qui'yaj soj, tumé soj man ma'an soj do', man x'ne' nij síi amán rá ni'yaj man Jesucristó do' á. Dan me se Nimán Diose me síi cune' man soj nicaaj yu'unj soj man x'ne' nij síi amán rá ni'yaj man Jesucristó a. Ne dan me se quiránj Jesucristó man cunudanj nij síi noco' x'ne' yo' che'é ton cavii man ma'an so' adonj.

²⁹ Dan me se ne'enj se vaa asa' ca'anj 'unj, ne catuu síi chi'ii sca'núj soj, ne ase vaa xca'yanj ca'nu' yuvaa ro', danj gaa nij síi chi'ii yo', ne se caráj x'naa nij so' man nij tinúú ní' nij síi noco' man Jesucristó, ne qui'yaj ndo'o nij síi chi'ii yo' sayuun man nij so' a.

³⁰ Ne ndaa tuvi' ma'an ya soj me síi guun che'e tuguáj nij so' nana ya, che'é se guun rá nij so' canoco' nij síi tucu'yón se nana Jesucristó man ma'an nij so' a.

³¹ Che'é dan yo'o ni'yaj soj, ne xcaj soj cuentá á. 'O inanj nanuj rá soj se vaa rque va'nuj ya yo' me se ne ca'ne' raj ga suun narqué chrej nucuaj man 'o 'o nij soj nuvij nigan' ma'. Ne ndaa ta'veé 'unj che'é soj adonj.

³² "Ne cuano nihánj me se nucuaj rá 'unj man ma'an Diose se vaa tumé Diose man soj, ne nucuaj

rá 'un̄j man se nanā Diosē se vaa cun̄o soj nanā yo' ne ca'vee qui'yaj̄ ndo'o Diosē se luj̄ che'é soj a. Dan me se sa' doj canoco' soj man Diosē, qui'yaj̄ se nanā Diosē yo', ne guun̄ tuv̄i' soj gā cunudanj̄ yo'ó nij s̄í cunuu sa' rihaan Diosē, ne ca'vee quir̄i' soj xna'anj̄ ni'yaj̄ cata' tu'va Diosē gāa rquē adon̄j.

³³ ”Dan me se ne sij̄ uun̄ ne rá guun̄ si'yaj̄ si'yaj̄ yo'ó yuvī, se aga' plata' catzīi do', se aga' oró m̄í do', se yatz̄íj sa' do', mé 'un̄j ma'.

³⁴ Nē aj̄ ne'en ma'an̄ nij soj se vaa ma'an̄j ra'aj̄ nihánj̄ qui'yaj̄ suun̄ che'é rej ca'vee quir̄i' 'un̄j nij rasuun̄ achiin̄ manj̄ do', achiin̄ man̄ nij s̄í chéé gāj do' a.

³⁵ Cunudanj̄ qui'yaj̄ suun̄ 'un̄j, che'é se guun̄ raj̄ xcaj̄ soj cuentá se vaa nō xcúun̄ soj qui'yaj̄ suun̄ ma'an̄ soj, che'é rej ca'vee raçuíj̄ soj man̄ tinúú ní' s̄í achiin̄ rasuun̄ man̄ a. Nē yo'ō cunuû rá soj nanā nihánj̄ nanā ca'mii ma'an̄ Jesucristó sij̄ 'nij̄ ra'a man̄ ní' a: “S̄í rquē rasuun̄ rihaan̄ tuv̄i' ro', uun̄ nih̄a' rá so' doj̄ rihaan̄ s̄í ri' rasuun̄ yo' ra'a tuv̄i' a”, taj̄ s̄í 'nij̄ ra'a man̄ ní' a —taj̄ Pabló rihaan̄ nij̄ s̄í chij̄ nicāj̄ yu'un̄j man̄ x'ne' nij̄ s̄í cuchumán rá ni'yaj̄ man̄ Jesucristó yan̄j̄ chuman' Efeso a.

³⁶ Dan me se gāa quis̄íj̄ ca'mii Pabló nu' nanā yo', gāa nē canicun' ruj̄ so' gā nij̄ so', nē cachíin̄ ni'yaj̄ Pabló rihaan̄ Diosē gā taran' nij̄ so' a.

³⁷ Gāa nē ta'vee uxr̄a cunudanj̄ nij̄ so', nē na'yaan̄ nij̄ so' man̄ Pabló, nē cachrón̄ tu'vā nij̄ so' xruū Pabló a.

³⁸ Q se quinano' doj̄ rá nij̄ so' che'é se nanā Pabló nanā se vaa daj̄ chih̄aa m̄íj̄ se quene'en̄ uún̄ nij̄ so' man̄ Pabló ma'. Gāa nē ca'an̄j̄ tan̄áj̄ nij̄ so' man̄

Pabló ndaa rej cavii so' rque rihoo chéé rihaan na a.

21

Nana nihánj taj xna'anj daj guun gaa ca'anj Pabló ndaa chuman' Jerusalén a

¹ Dan me se gaa tanáj xcō núj man nij síi man chuman' Efeso, ne ca'anj núj vaj núj rque rihoo, ne yo'ō chrej ca'anj núj, cuchí' núj rej cu'naj Cos, ne yo'ō güii me se cuchí' núj ndaa rej cu'naj Rodas, ne ca'anj uún núj, cuchí' núj ndaa chuman' cu'naj Pátara a.

² Gaa ne nari' núj yo'ó rihoo ca'anj ndaa rej cu'naj Fenicia a. Gaa ne cavii núj rque rihoo, ne ca'anj núj a.

³ Gaa ne quene'en núj yo'óo taj rihaan na ya'anj cu'naj Chipre, ne tanáj xcō núj Chipre rej nichruun núj, ne cachén núj ca'anj núj ndaa estadó Siria a. Dan me se cuchí' núj chuman' Tiro, ne 'ō se yo' me rej guun rá nij síi tumé rihoo tucuayūu nij so' cargá man rque rihoo rihaan yo'óo yo' a.

⁴ Dan me se nano' núj man nij síi tucu'yón se nana Jesucristó yanj chuman' Tiro yo', ne nari' núj man nij so', ne chij güii caran' núj chuman' yo' a. Dan me se gaa nari' tuvi' núj, ne dan me se nata' nij so' nana rqué Nimán Diōse rihaan nij so' rihaan Pabló se vaa se guun ca'anj Pabló chuman' Jerusalén a.

⁵ Dan me se gaa quisíj chij güii yo', ne curihanj núj ca'anj núj rej taj rihoo rihaan na, ne cachéé cunudanj nij tucua nij síi tucu'yón se nana Jesucristó ga núj ndaa se cuchí' núj tu'va chuman' a. Gaa ne canicun' ruj núj rihaan yo'óo chruu naj

tu'va na ya'anj rej yo', ne cachíin ni'yaj núj rihaan Diose,

⁶ ne cataj núj rihaan tuvi' núj se vaa ca'anj núj, ne dan me se cavii núj rque rihoo, ne canicaj nij so' quinan' nij so' tucua' nij so' a.

⁷ Dan me se tanáj núj chuman' Tiro yo', ne ca'anj uún núj rque rihoo, ne cuchi' núj ndaa chuman' cu'naj Tolemaida, ne nanó núj cuentó ga nij tinúú ní' sí yanj chuman' yo', ne quináj núj orún' güii ga nij so' a.

⁸ Ne yo'ó güii me se cavii uún núj rque rihoo ga Pabló, ca'anj núj, ne cuchi' núj chuman' Cesarea, gaa ne catúj núj ndaa chuman' Cesarea, ne ca'anj núj ve' tucua' sí cu'naj Felipé sí nata' se nana Diose nana sa' rihaan yuvij a. Ne so' ro', me 'o' tuvi' chij nij sí rque se chá rihaan nij chana' cavi' nica yanj chuman' Jerusalén gaa rque doj a. Ne caran' núj tucua' so' a.

⁹ Ne vaa ca'anj ta'ní so' chana yaan, ne ca'anj nij no' me ní nata' nana rque Diose rihaan a.

¹⁰ Dan me se gaa guun raan núj que'ee güii tucua' sí cu'naj Felipé, ne nanij 'o' sí cavii estadó Judea, ne sí nata' nana rque Diose rihaan me so', ne Agabo cu'naj so' a.

¹¹ Dan me se ca'na' so' rihaan núj, ne nicaj so' marque 'nij catuun Pabló, numij so' tacóó Pabló do', ra'a Pabló do' a. Gaa ne cataj so':

—Sí si'yaj yatzij nihánj me se ase vaa qui'yáa 'unj cuano nihánj ro', danj gaa qui'yaj nij sí israelitá man chuman' Jerusalén, numij nij so' man so', ne tacuachén nij so' man so' ra'a nij sí yanij adonj —taj sí cu'naj Agabo yo' a.

12 Dan me se gaa cuno núj nana yo', ne rquee uxrá núj ga nij sí yanj chuman' Cesarea yo' rihaan Pabló se vaa se cavii so' ca'anj so' ndaa chuman' Jerusalén ma'.

13 Gaa ne cataj Pabló:

—Taj che'é ta'vee soj ne quinano rá 'unj qui'yaj soj ma'. 'O se 'unj nihánj me se a'vej raj numíj nii manj ne ndaa ticaví' nii manj rej Jerusalén che'é se sí nata' che'é Jesucristó sij 'nij ra'a man ní' mej chuguanj —taj Pabló rihaan nij so' a.

14 Ne taj se qui'yá' cuno so' se nana núj a ma'. Che'é dan ca'ne' rá núj, ne cataj núj:

—Qui'yaj Diose sij 'nij ra'a man ní' ndaa vaa me rá ma'an so' qui'yaj so' á —taj núj a.

15 Dan me se quisíj caran' núj chuman' Cesarea yo', gaa ne qui'yaj chuvii núj, ne cavii núj ca'anj núj ndaa chuman' Jerusalén a.

16 Ne chéé ta'aj nij sí tucu'yón se nana Jesucristó yanj chuman' Cesarea ga núj, ne táa yaan nij so' rihaan núj ca'anj núj ve' tucua' 'o sí cu'naj Mnasón, caran' núj a. Ne sí cu'naj Mnasón me se sij cavii yo'óó taj rihaan na ya'anj cu'naj Chipre me so', ne aj quisíj que'ee yo' tucu'yón so' se nana Jesucristó a.

Nana nihánj taj xna'anj se vaa cuchi' Pabló chuman' Jesusalén a.

17 Dan me se gaa cuchi' núj chuman' Jerusalén, ne guun niha' ndo'o rá nij tinúú ní' sí man Jerusalén nano nij so' cuentó ga núj a.

18 Ne yo'ó güii me se ca'anj n'yaj núj ga Pabló man sí cu'naj Santiagó ne catúj núj rque 'o ve' ne so', ne nari' chre' núj man nu' nij sí chij nicaaj

yu'unj man nij yuvij cuchumán rá ni'yaj man Jesucristó gā Santiagó a.

19 Dan me se ve'é ca'mii sa' taran' núj, gaa ne cataj xna'anj Pabló rihaan nij síi chij nuu chre' gā Santiagó ndaa 'o 'o se vaa qui'yaj Diose gā nij síi yaníj gaa nata' Pabló se nana Diose rihaan nij síi yaníj yo' a.

20 Ne gaa cuno nij síi chij se nana Pabló, ne cataj nij so' se vaa sa' uxrá qui'yaj Diose gā nij síi yaníj a. Gaa ne cataj nij tuvi' Santiagó rihaan Pabló a:

—Aj ne'én so' se vaa que'ee míj tuvi' ní' sij israelitá amán rá ni'yaj man Jesucristó, tinuj. Ne nij so' ro', me síi yaníj uxrá qui'yaj nu' ndaa vaa taj se tucuanj Moisés a.

21 Ne cuchí' nana ne rihaan nij so' se vaa tucu'yón so' man cunudanj nij yuvij israelitá yaníj chihaán nij síi yaníj se vaa tanáj xcō nij so' se nana Moisés, ne cataj so' se vaa ca'ne' rá nij so' gā suun uta' ta'nga' man ta'níi dō', gā suun noco' se tucuanj Moisés dō' a.

22 Me se nō xcúún ní' qui'yaj ní', rá so' gā. 'O se ya cunu chre' yuvij gaa xcaj cunudanj nij so' cuentá se vaa ca'ná' so' nihánj adonj.

23 "Che'é dan me rá núj qui'yáá so' ndaa vaa cataj núj rihaan so' á. Dan me se vaa ca'anj tinúú ní', ne aj cata' tu'va ma'an nij so' rihaan Diose che'é 'o rasuun qui'yaj nij so' rihaan Diose a.

24 Ne me rá núj nīcaj tuví' so' gā nij so', ne cunu guee so' rihaan Diose gā nij so', gaa ne naru'vee so' che'é xcuu nago' nij so' rihaan Diose, gaa ne ca'vee caca caan nii raa nij so' ne quisij nu' se vaa cata' tu'va nij so' rihaan Diose á. Gaa ne xcaj nij tinúú

ní' cuentá se vaa xa' nana cuno nij so' che'é so', tzaj ne ne ya vaa nana yo' ma'. Ne ma'án so' me síi noco' raan man se tucuanj Moisés a.

²⁵ Ne xa' nij síi yanj amán rá ni'yaj man Jesucristó, tzaj ne aj ca'née núj yanj cartá rihaan nij so', ne cataj xna'anj núj rihaan nij so' se vaa taj che'é canoco' ma'an nij so' se tucuanj Moisés ma'. Maan se xcaj nij so' cuentá, ne se chá nij so' rasuun rqué yuvií rihaan ya'anj cacój yuvií ma'. Ne se chá nij so' ton ma'. Ne se chá nij so' nee xcuu tuguáj nii gaán chihá ma'. Ne snó'o do', chana do', se cotoj nij so' ga yo'ó yuvií sese ne nica nij so' me yo' ma'. Danj taj yanj ca'née núj rihaan nij so' adonj —taj nij síi chij yo' rihaan Pabló a.

²⁶ Gaa ne nicaj tuvi' Pabló ga ca'anj nij snó'o yo', ne yo'ó güii me se cunuu guee so' ga nij so' rihaan Diose, ne catúj so' rá nuvií noco, ne nata' so' rihaan xrej me güii quisij cunuu guee nij so' rihaan Diose ne ca'na' nicaj nij so' nij rasuun guee nago' 'o 'o nij so' rihaan Diose a.

Nana nihánj taj xna'anj daj guun gaa quita'aa nii man Pabló rá nuvií noco a

²⁷ Dan me se gaa nichrun' quisij chij nij güii nuu guee 'un' nij so' rihaan Diose, ne nij síi israelitá cavii estadó Asia ro', quene'en nij so' man Pabló rá nuvií noco, ne naxumaan cunudanj nij yuvií man rej yo', qui'yaj nij so', ne quita'aa nij so' man Pabló a.

²⁸ Ne caguáj nij síi cavii estadó Asia, cataj nij so': —Cuno soj sij israelitá ca'mii núj, ne racuáj soj man núj á. 'O se síi nihánj ro', me síi tucu'yón man nij yuvií yanj cunudanj chuman' se vaa nij vaa ní'

sij israelitá do', se vaa nij vaa tucuáán nocoo ní do', se vaa nij vaa nuvií nocoo nihánj do', taj so' a. Ne ndaa yuvií yaníj catúj nuvií nocoo nihánj, ne quiri' rej guée nihánj, qui'yaj so' nanj á —taj nij so', ni'yaj nij so' man Pabló a.

²⁹ 'O se aj quene'en nij so' man síi cu'naj Trófimo síi yaníj cavii chuman' Efeso se vaa vaj so' ga Pabló rque chuman' Jerusalén, ne guun rá nij so' se vaa catúj síi cu'naj Trófimo yo' rá nuvií nocoo, qui'yaj Pabló a.

³⁰ Dan me se naxumaan cunudanj nij yuvií man chuman' Jerusalén yo', ne cunanj nij so' ndaa nuvií nocoo, gaa ne quita'aa nij yuvií man Pabló, ne nucuaj rii nij so' man so' xe', ne nu' naráán nii nij ta'yaa rihaan nuvií nocoo yo' a.

³¹ Dan me se guun rá nij yuvií ticavi' nij yuvií man Pabló, ne cuchi' nana rihaan síi 'nij ra'a man cunudanj nij tanuu romanó man chuman' Jerusalén se vaa ca'maan ndo'o rá nij síi man chuman' Jerusalén ne naxumaan ndo'o sayuun a.

³² Ne nicaj so' tanuu nicaj so' síi 'nij ra'a 'o ciento tanuu, ne cunanj so' ndaa rej man nij yuvií yo' a. Ne gaa quene'en nij yuvií se vaa ca'na' síi uun chij rihaan cunudanj nij tanuu do', se vaa ca'na' nij tanuu do', gaa ne ca'ne' rá nij so' ga suun o' man Pabló a.

³³ Gaa ne cuchi' síi 'nij ra'a man nij tanuu yo' rihaan Pabló, ne quita'aa so' man Pabló, ne ca'ne' so' suun se vaa numíj nij tanuu vij aga' ne' man Pabló, ne xná'anj so' man nij yuvií me síi me Pabló ne daj qui'yaj so' a.

³⁴ Ne ino vaa nana caguáj 'o 'o nij yuvií a. Dan me se ne ca'vee xcaj so' cuentá daj me che'é me

ca'maan rá nij yuvii ma'. 'O se caguáj ndo'o nij yuvii, ne ne ca'vee cuno so' se nana nij yuvii ma'. Che'é dan ca'ne' so' suun rihaan nij tanuu se vaa ca'anj nicaj nij tanuu man Pabló rá cuarteé man nij tanuu a.

³⁵ Ne gaa cuchi' nij tanuu cuarteé, gaa ne che'é se man ndo'o nij yuvii a'maan rá ni'yaj man Pabló, gaa ne ndaa ata xta' ma'an nij tanuu man Pabló, che'é se guun ndo'o rá nij yuvii quirii nij so' man Pabló go' nij so' man so' a.

³⁶ 'O se canoco' raan nij yuvii man nij tanuu, ne caguáj nij yuvii, cataj nij yuvii:

—Ticavi' soj man so' cuaj ei —taj nij yuvii, caguáj nij yuvii, ni'yaj nij yuvii man Pabló a.

Nana nihánj taj xna'anj se vaa guun che'e Pabló nacaj man so' rihaan nij sí israelitá a

³⁷ Dan me se daj doj catuu Pabló cuarteé man nij tanuu, qui'yaj nij tanuu, gaa ne cataj Pabló rihaan sí 'nij ra'a man cunudanj nij tanuu a:

—Ne ca'vee ca'mij 'o nana rihaan so' na' —taj so', xná'anj so' man sí 'nij ra'a man nij tanuu a.

Ne so' cataj:

—Ne'én so' ca'mii so' xna'ánj griego na'.

³⁸ Ne nuveé so' me sí cavii rej cu'naj Egiptó sí me rá cunu' ga gobiernó ne ca'anj nicaj ca'anj mij nij sí me rá ticavi' man yuvii ndaa rej tacaan asij rque doj na' —taj sí 'nij ra'a man nij tanuu, xná'anj so' man Pabló a.

³⁹ Gaa ne cataj Pabló rihaan so' a:

—'Unj ro', me 'o sí israelitá cavii chuman' Tarso chuman' naj estadó Cilicia, ne chuman' vaa suun ndo'o me chihánj á. Rqueé 'unj rihaan so', ne

ca'vej rá so' ca'mij doj ga nij yuvii á —taj Pabló rihaan síi 'nij ra'a man nij tanuu a.

⁴⁰ Dan me se ca'vej rá so', ne che'é dan canicun' Pabló rej xta' rej atúj nii cuarteé, ne tucunó ra'a so', che'é rej cunuú dínj tu'va nij yuvii a.

Dan me se cunuú dínj tu'va nij yuvii, gaa ne guun che'e Pabló ca'mii so' xna'ánj hebreo rihaan nij yuvii, ne cataj so':

22

¹—Cunō soj ca'mij, tinuj, ta'nuj. Ne nano xrej soj se vaa ca'mii nacaj 'unj manj —taj Pabló rihaan nij síi israelitá a.

² Dan me se xcax nij yuvii israelitá cuentá se vaa ca'mii Pabló xna'ánj hebreo, ne che'é dan ndaa dínj ma'an mán nij so' a. Gaa ne cataj uún Pabló a:

³—Dan me se ya síi israelitá mé 'unj, ne ca'ngaa 'unj chuman' Tarso chuman' naj estadó Cilicia a. Tzaj ne cachij 'unj chuman' Jerusalén nihánj, ne narí' 'unj noco' 'unj nu' se tucuānj xii ní', qui'yaj maestró Gamaliel a. Ne cuano nihánj me se sij yanj qui'yaj nu' ndaa vaa me rá Diose mé 'unj ase vaa 'yaj ma'an soj güii cuan' adonj.

⁴ Ne qui'yaj ndo'oj sayuun man nij yuvii noco' se tucuānj Jesucristó yo', ne guun ndo'o raj cavi' nij so' a. Dan me se snó'o do', chana do', numij, ne canú' 'unj man nij so' taga',

⁵ ne xrej atā suun noco'o doj do', nij síi uun chij rihaan ní' do', me síi cataj se vaa ya vaa nana nihánj nana natá' 'unj rihaan soj adonj. 'Q se ma'an nij so' rqué yanj cartá rihaan 'unj nayaa tuvi' ní' síi man chuman' Damasco, gaa ne ca'anj

'un̄j chuman' Damasco, ne guun rá 'un̄j cunumíj 'un̄j man nij yuvīi noco' man Jesucristó yan̄j chuman' Damasco, che'é rej ca'na' nij so' chuman' Jerusalén nihánj ne quirán' nij so' sayuun, qui'yáj adon̄j.

6 "Dan me se vaj 'un̄j chrej, ne caxuj me ta' asuun, ne nichrún' 'un̄j chuman' Damasco, gaa ne taj ni'yón cuchuguun nu' xta' nu' anicaj rej nicun' 'un̄j a.

7 Gaa ne quinij 'un̄j rihaan yo'óó, ne cunó 'un̄j se vaa ca'mii 'o so' rihan̄j, ne cataj so': "Saulo, Saulo, me che'é 'yáá so' sayuun man̄j, ga", taj síi ca'mii rihan̄j, xná'an̄j so' man̄j a.

8 Gaa ne: "Me síi mé so', Señor", cataj 'un̄j rihaan so', xná'an̄j 'un̄j man so' a. Gaa ne cataj so': "'Un̄j ro', me Jesús síi cavii chuman' Nazaret, ne síi 'yaj ndo'o so' sayuun man mej adon̄j", taj so' rihan̄j a.

9 Gaa ne dan me se nij síi vaj ga 'un̄j ro', ya quene'en nij so' ya'an chuguun rej nicun' 'un̄j, tzaj ne ne cunō nij so' nana ca'mii Jesús rihan̄j a ma'.

10 Gaa ne cataj 'un̄j rihaan so' a: "Daj qui'yáá 'un̄j, rá so' ga", taj 'un̄j, xná'an̄j 'un̄j man so' a. Gaa ne síi 'nij ra'a man ní ro', cataj: "Naxumaan so', ne ca'an̄j so' chuman' Damasco, gaa ne asa' cuchí so' yo', ne cataj xna'an̄j nii rihaan so' che'é nu' se vaa no xcúún so' qui'yáá so' á", taj síi 'nij ra'a man ní rihan̄j a.

11 Dan me se che'é se nucuaj ndo'o chuguun ya'an yo' ro', che'é dan ne ca'vee curuvi' rlij rihan̄j, ne che'é dan nij síi chéé gaj ro', quita'aa nij so' ra'aj, racuíj nij so' man̄j, ne ca'an̄j 'un̄j catúj 'un̄j chuman' Damasco a.

12 "Dan me se chuman' Damasco ro', yáán 'o síí cu'naj Ananías, ne síí ve'é noco' man Diose me so', ne síí qui'yaj nu' se tucuanj Moisés me so', ne cunudanj nij yuvii israelitá yanj chuman' Damasco taj se vaa sij sa' me so' a.

13 Dan me se ca'na' so' rihanj ne canicun' so' x'núj, ne cataj so': "Nachuguun rihaan so', gaa ne ni'yaj so', tinuj Saulo", taj so' rihanj a. Ne maan orá dan nachuguun rihanj, ne quene'enj man so' a.

14 Gaa ne cataj síí cu'naj Ananías: "Diose síí noco' xii ní' gaa naá ro', narii so' mán so' che'é rej xcaj so' cuentá daj me rá so' qui'yaj so' che'é yuvii, ne guun rá so' quene'én so' man Jesucristó síí sa' inanj ne cunó so' nana ca'mii so' rihaan so' á.

15 Gaa ne guún so' síí ne'en che'é so', ne dan me se ca'anj so', ne nata' so' rihaan nu' nij yuvii che'é se vaa quene'én so' do', che'é nij nana cunó so' do' a.

16 Ne nihánj me se se guun raan so' doj a ma'. Maan se naxumaan so', ne cata' ne so', ne cachinj ni'yáá so' rihaan Jesucristó che'é rej tinaruvii Diose nu' cacun' xráá so' á", taj síí cu'naj Ananías yo' rihanj a.

17 "Dan me se nanicaj 'unj ca'ná' 'unj chuman' Jerusalén nihánj, ne gaa cachín ni'yáá 'unj rihaan Diose, ne naqui'yaa 'o rasuun rihaan 'unj,

18 ne dan me se quene'én 'unj man Jesucristó, ne cataj so' rihanj a: "Yoó so' cuaj, curihanj so' rque chuman' Jerusalén nihánj á. 'O se se cuno nij síí man chuman' Jerusalén nana nata' so' rihaan nij so' che'é 'unj ma'", taj so' rihanj a.

19 Gaa ne cataj 'unj rihaan so' a: "Tzaj ne aj ne'en nij so' se vaa 'unj me síí catúj daj a nij ve' tucu'yón

nij so' se tucuañj Moisés, ne quita'aa 'un̄j nij síi cuchumán rá ni'yaj mán so', ne canú' 'un̄j man nij so' taga' ne gó' 'un̄j quartá xráá nij so', Señor.

20 Ne aj ne'en nij so' se vaa gaa cavi' síi cu'naj Esteban síi nata' rihaan yuvīj che'é so', ne 'un̄j me síi 'o vaa rá ga nij síi ticavi' man so', ne dan me se cutumej sagan' nij so' gaa go' nij so' yahij man Esteban adon̄j. Che'é dan cun̄o nij so' se nan̄aj nan̄aj á", taj 'un̄j rihaan Jesucristó a.

21 Gaa ne cataj so': "Ca'an̄j so' á. 'O se 'un̄j ca'nej mán so' ca'an̄j so' gan' rihaan nij síi yan̄ij a", taj so' rihan̄j a —taj Pabló rihaan nij síi israelitá yo' se xna'an̄j nij so' a.

22 Dan me se ndaa dan ca'mii Pabló nana yo', ne nanó xrej nij síi israelitá se nana so' a. Tzaj ne gaa canicaj so' ca'mii so' che'é nij síi yan̄ij, gaa ne canicaj uún nij so', nucuaj caguáj nij so', cataj nij so':

—Cavi' síi nihánj á. Ne nó xcúún síi nihánj gaa i'na' so' rihaan chumīj nihánj a ma' —taj nij so', caguáj nij so' a.

23 Dan me se caguáj ndo'o nij so', ne quirii nij so' roto nij so', ne taman' ndo'o nij so' yo'óo tachruu xta' che'é se ca'maan ndo'o rá nij so' a.

24 Gaa ne ca'ne' síi uun chij suun rihaan nij tanuu se vaa ca'an̄j n̄icaj nij so' man Pabló rá cuarteé ne nij so', gaa ne go' nij so' quartá xráá Pabló, che'é rej cataj xna'an̄j so' me che'é caguáj nij yuvīj dan̄j ni'yaj nij so' man Pabló a.

25 Dan me se nicaj nij tanuu nuj xcaan, num̄ij nij tanuu man Pabló, ne gaa qui'yaj nij so' dan̄j, gaa ne ca'mii Pabló rihaan 'o síi nicun' rej nicun' so',

ne tanuu uun chij rihaan 'o cientó tanuu me so',
ne dan me se cataj Pabló rihaan so' a:

—Nó xcúún soj go' soj cuartá xráá 'o síi guun
chihanj Romá gaa ataa ca'ne' nii cacun' che'é so'
axe —taj so' rihaan tanuu yo' a. '

²⁶ Gaa cuno tanuu yo' nana ca'mii Pabló rihaan
so', ne ca'anj so' cataj xna'anj so' rihaan síi uun
chij rihaan cunudanj nij tanuu, ne cataj so':

—Ya me rá so' go' ní' cuartá xráá so' na'. 'O
se sij romanó me snó'o nihánj ei —taj so' rihaan
tuvi' tanuu so' tanuu uun chij rihaan cunudanj nij
tanuu a.

²⁷ Gaa ne cuchil' tanuu uun chij yo' rihaan Pabló,
ne xná'anj so' man Pabló, cataj so':

—Cataj so' 'o nana rihanj á. Ya ya sij romanó mé
so' na' —taj so', xná'anj so' man Pabló a.

—Vej adonj —taj Pabló rihaan so' a.

²⁸ Gaa ne cataj tanuu uun chij yo' rihaan Pabló
a:

—'Unj nihánj, tzaj ne nocoo ndo'o sa'anj gó' 'unj
che'é rej ca'vee guún 'unj 'o síi romanó nanj á —taj
so' rihaan Pabló a.

Gaa ne cataj Pabló:

—Tzaj ne 'unj ro', me síi romanó asij ca'ngaa
'unj adonj —taj so' rihaan tanuu uun chij yo' a.

²⁹ Nu' ca'mii so' danj, ne nu' ca'anj yanij nij
tanuu guun rá go' cuartá xráá Pabló a. Ne ma'an
tanuu uun chij rihaan nij so' cuchu'vi', che'é se
xcaj so' cuentá se vaa sij romanó me Pabló ne aj
numij so' man Pabló a.

*Nana nihánj taj xna'anj daj ca'mii Pabló gaa
canicun' so' rihaan junta qui'yaj nij síi uun chij
rihaan nij yuvij israelitá a*

30 Ne ranga' yo'ó güii me se tanuu uun chij rihaan cun_uanj nij tanuu ro', guun ya rá so' xcaj so' cuentá me che'é guun rá nij síí israelitá cutá' nij so' cacun' xráá Pabló a. Che'é dan ca'ne' so' suun se vaa nache nij tanuu man Pabló, ne ca'ne' so' suun se vaa cun_uu chre' nij xrej atá suun nocoo doj do', nu' nij síí uun chij rihaan nij yuvij israelitá do', qui'yaj nij so' juntá a. Gaa ne catúj Pabló rej man nij so', qui'yaj so', ne canicun' Pabló tanuu rihaan nij so' a.

23

1 Dan me se ni'yaj uxrá Pabló man taran' nij síí uun chij yo', ne cataj so':

—Cun_o nij soj ca'mij, tinuj. Nu' cavii nu' ca'na' ro', inanj sa' uxrá 'yáá 'unj rihaan Diose, raj a. Taj cacun' tumej ma' —taj Pabló rihaan nij so' a.

2 Gaa ne xrej atá suun nocoo doj síí cu'naj Ananías ro', ca'ne' so' suun rihaan nij síí nicun' rej x'núú Pabló se vaa coxr_o nij so' tu'va Pabló, gaa ne danj qui'yaj nij so' a.

3 Gaa ne cataj Pabló rihaan síí cu'naj Ananías yo' a:

—Vaa güii coxr_o Diose tu'vá so' á. 'O se síí nucui' rá mé so' á. 'O se táá so' naqui'yaj cuú so' che'ej sese qui'yáá 'unj cacun' rihaan se tucuanj Moisés, rá so' a. Tzaj ne nihánj me se tananj ca'né' so' suun se vaa coxr_o nii tu'vaj, ne se tucuanj Moisés taj se vaa ne nó xcúún so' a 'ó xco' qui'yáá so' danj ma' —taj Pabló rihaan síí cu'naj Ananías a.

4 Gaa ne nij síí nicun' rej x'núú Pabló ro', cataj nij so' rihaan Pabló a:

—Ne nó xcúún so' caxrii yuvaá so' man síi cune' Diose guun xrej atá suun nocoo doj ma' —taj nij so' rihaan Pabló a.

⁵ Gaa ne cataj Pabló:

—Ne quene'én 'unj se vaa xrej atá suun nocoo doj me síi tu'va danj, man tinuj. 'O se danj Diose taj se vaa se ca'mii chi'ii ní' ni'yaj ní' síi uun chij rihaan nij tuvi' ní' a ma' —taj Pabló rihaan nij so' a.

⁶ Dan me se xcaj Pabló cuentá se vaa ta'aj nij síi uun chij yo' me síi saduceo ne yo'ó ta'aj nij so' me síi fariseo, ne che'é dan caguáj so', cataj so' rihaan cunudanj nij so' a:

—Síi fariseo mej, ne ta'níi síi fariseo mej, tinuj. Ne nihánj me se cuta' nii cacun' xraj che'é se 'unj me síi amán rá se vaa cunu i'na' uún nij síi cavi' vaa güii, tinuj —taj Pabló rihaan cunudanj nij so' a.

⁷ Dan me se gaa ca'mii Pabló danj, ne ca'maan rá nij síi fariseo do', nij síi saduceo do', ni'yaj nij so' tuvi' nij so', ne xra' ta'aj nij so' a.

⁸ 'O se nij síi saduceo ro', taj se vaa se ca'vee cunu i'na' uún nij síi cavi' ma'. Ne se mozó Diose do', nimán yuvi' do', taj vaj ma', taj nij síi saduceo yo' a. Tzaj ne nij síi fariseo ro', taj se vaa ya ya cunu i'na' uún nij síi cavi' vaa güii, ne vaa se mozó Diose, ne vaa nimán yuvi', taj nij so' a.

⁹ Dan me se caguáj ndo'o cunudanj nij síi uun chij yo', ne canicun' ta'aj nij síi fariseo atá suun naquiyaj cu se tucuanj Moisés rihaan yuvi', ne ca'mii canó tuvi' nij so' ga nij síi saduceo, cataj nij so':

—Nuvi' cacun' tumé síi nihánj, rá núj ma'. 'O se ca'vee se aj ca'mii 'o nimán rihaan so' ca'vee se aj

ca'mii 'o se mozó Diose rihaan so' ca'vee nanj á —taj nij so', ca'mii nacaj nij so' man Pabló a.

¹⁰ Gaa ne ca'maan uxrá rá cunudanj nij so', ne che'é dan cuchu'vi' tanuu uun chij doj se vaa cutun' nij so' man Pabló, ne che'é dan ca'ne' so' suun rihaan nij tanuu se vaa ca'anj nij tanuu quita'aa nij tanuu man Pabló ne quirii nij tanuu man Pabló sca'núj nij síi uun chij rihaan nij yuvii israelitá yo' ne ca'anj nıcaj nij tanuu man Pabló rá cuarteé man nij tanuu a.

¹¹ Ti'nuu yo'ó güii me se curuvi' ma'an Jesucristó sij 'nij ra'a man ní' rihaan Pabló, ne cataj so' rihaan Pabló a:

—Gaa nucuaj nimán so' á. 'O se ase vaa 'o xraan taj xna'anj so' rihaan nij síi man chuman' Jerusalén nihánj che'é 'unj ro', danj gaa cataj xna'anj so' rihaan nij síi man chuman' Romá uún che'é 'unj adonj —taj síi 'nij ra'a man ní' rihaan Pabló a.

Nana nihánj taj xna'anj se vaa guun rá nij síi israelitá ticavi' nij so' man Pabló a

¹² Dan me se yo'ó güii cunuu chre' nij síi israelitá che'é rej qui'yaj nij so' sayuun man Pabló, ne cataj nij so' rihaan Diose a:

—Sese cha núj do', sese co'o núj na do', gaa ataa cavi' Pabló qui'yaj núj, ne ca'vee qui'yáa so' sayuun man núj á —taj nij so' rihaan Diose a.

¹³ Ne vij chihaa táa doj nij so' me nij síi guun 'o rá qui'yaj danj man Pabló a.

¹⁴ Gaa ne nij síi me rá ticavi' man Pabló ro', cuchi' nij so' rihaan nij xrej ata suun nocoo doj do', rihaan nij síi uun chij do', ne cataj nij so' a:

—Aj cata' tu'va núj rihaan Dioso se vaa ca'vej rá núj qui'yaj Dioso sayuun man núj sese chá núj me ma'an rasuun gaa ataa cavi' Pabló qui'yaj núj a.

¹⁵ Che'é dan soj ga yo'ó nij síi uun chij ro', cataj xna'anj soj rihaan tanuu uun chij doj se vaa me rá soj ca'na' uún Pabló rihaan soj che'é se me rá soj xcaj sa' soj doj cuentá che'é Pabló, cataj soj rihaan tanuu yo' a. Tzaj ne cumañ núj rá chrej, caráán núj chrej man Pabló, ne se gaa i'na' Pabló cuchij' Pabló rihaan soj, qui'yaj núj a man adonj —taj nij so' rihaan xrej atá suun nocoo doj do', rihaan tuvi' nij so' síi uun chij do' a.

¹⁶ Tzaj ne cuno xticun' Pabló se vaa ca'mii nij so' che'é rej caráán nij so' chrej man Pabló, ne che'é dan ca'anj so' catúj so' rá cuarteé, gaa ne nu' tacuachén so' nana rihaan Pabló a.

¹⁷ Gaa ne canacúún Pabló ca'na' yo'o nij tanuu uun chij rihaan 'o cientó tanuu rihaan so', ne cataj so' rihaan tanuu yo' a:

—Catuu síi tachruu nihánj nata' so' rihaan tanuu uun chij doj, qui'yáá so' á. 'O se vaa nana me rá so' nata' so' rihaan tanuu uun chij doj a —taj Pabló rihaan tanuu yo' a.

¹⁸ Che'é dan nicaj tanuu yo' man xticun' Pabló, ca'anj so' rihaan tanuu uun chij rihaan cunudanj nij tanuu, ne cataj so' rihaan tanuu a:

—Síi cu'naj Pabló síi 'nij taga' ro', canacúún so' manj cuchij rihaan so', ne cachíin ni'yaj so' rihanj se vaa ca'na' síi tachruu nihánj rihaan so' qui'yá a. 'O se vaa nana me rá síi tachruu nihánj nata' so' rihaan so', taj Pabló a —taj tanuu yo' rihaan tanuu uun chij doj a.

19 Dan me se coroj tanuu uun chij yo' ra'a xticun' Pabló, gaa ne ca'anj yaníj roj so', gaa ne xná'anj tanuu yo' man so', cataj so':

—Me nana nata' so' rihanj, rá so' ga —taj so' rihaan síi tachruu yo' a.

20 Gaa ne so' cataj:

—Nij síi israelitá ro', cuyaan guun rá nij so' se vaa cachinj ni'yaj nij so' rihaan so' se vaa a'yuj ca'anj nicaj so' man Pabló rej cunu chre' nij síi uun chij rihaan nij so' a. 'O se cataj nij so' se vaa me rá nij so' xcaj nij so' cuentá sa' doj che'é Pabló a.

21 Tzaj ne se cuchumán rá so' se nana nij so' ma'. 'O se vaa vij chihaa tuvi' nij so' táá doj caráán chrej man Pabló, ne aj cata' tu'va nij so' rihaan Diose se vaa se chá nij so' do', se co'o nij so' na do', gaa ataa cavi' Pabló qui'yaj nij so', ne sese se cavi' Pabló qui'yaj nij so', ne ca'vee qui'yaj Diose sayuun man nij so', taj nij so' nanj á. Ne cuano nihánj me se me ndo'o rá nij so' se vaa cata' tu'vá so' se vaa ya ca'anj nicaj so' man Pabló rihaan nij síi uun chij yo' adonj —taj xticun' Pabló rihaan tanuu uun chij doj a.

22 Ne tanuu yo' ro', na'née so' chrej man síi tachruu yo', ne ca'ne' so' suun rihaan síi tachruu se vaa se cataj xna'anj so' rihaan a 'ó yuvij se vaa aj nata' so' nana vaa danj rihaan tanuu yo' ma'.

Nana nihánj taj xna'anj se vaa ca'née tanuu uun chij doj man Pabló rihaan síi nicaj suun gobernador cu'naj Félix a

23 Dan me se canacúun tanuu uun chij yo' man vij nij tanuu uun chij rihaan 'o cientó tanuu, ne cataj so' rihaan roj so' a:

—Nīcāj roj soj vīj cientó tanuu chéé tacōj dō', va'nūj chihāa chī' tanuu taj xráa cuayó dō', vīj cientó tanuu nicāj chruun lanzá dō', ne cumān chruun soj cavīi soj aga' uun nīi corá, ca'anj soj chuman' Cesarea á.

²⁴ Ne quirīi soj 'o cuayó quitaj sīi cu'naj Pabló, gaa ne cuchī' Pabló rihaan sīi nicāj suun gobernador cu'naj Félix, qui'yaj soj, ne dan me se quinānīi so' rihaan nij sīi israelitá a —taj tanuu uun chīj doj cuno roj so' a.

²⁵ Gaa ne qui'yaj so' 'o yanj cartá, ne ase vaa nanā nihānj ro', danj vaa nanā cachrón so' rihaan yanj cartá yo' a:

²⁶ “Unj sīj cu'naj Claudio Lisias ro', 'yáá 'unj yanj cartá nihānj ca'nej 'unj rihaan so' sīj nicāj suun gobernador cu'naj Félix sīj sá' ndo'o a. Ve'é cayáán so' á.

²⁷ Xa' sīi ca'nej 'unj rihaan so' nihānj, tzaj ne quita'aa nij sīi israelitá man so', ne guun rá nij so' ticavī' nij so' man so' a. Gaa xcaj 'unj cuentá, ne nacaj núj gā nij tanuu man so', che'é se xcaj 'unj cuentá se vaa sīj romanó me so' a.

²⁸ Dan me se guun rá 'unj xcaj 'unj cuentá me che'é me guun rá nij sīi israelitá cutá' nij so' cacun' xráa so', ne che'é dan ca'anj nicāj 'unj man so' rihaan nij sīi uun chīj rihaan nij so' a.

²⁹ Ne xcaj 'unj cuentá se vaa inānj che'é tucuáán nocō' ma'an nij so' me cuta' nij so' cacun' xráa so' a. Tzaj ne taj vaj cacun' chī'īi tumé so' ma'. Taj che'é cavī' so' dō', taj che'é qui'nij so' taga' dō' ma'.

³⁰ Tzaj ne cataj xna'anj nīi rihanj se vaa guun rá ta'aj nij sīi israelitá ticavī' nij so' man so', ne che'é dan ca'nej 'unj man so' rihaan so', ne cataj

'un̄j rihaan nij síi me rá cuta' cacun' xráá so' se vaa cuchi' nij so' rihaan so' ne ca'mii nij so' ga so' a", taj nan̄ cachrón tanuu uun chij doj rihaan yan̄j cartá ca'néé so' rihaan síi nicaj suun gobernador cu'naj Félix a.

³¹ Dan me se qui'yaj nij tanuu ndaa vaa cataj xna'an̄j so' rihaan nij so', ne rej nīj ca'an̄j nicaj nij so' man Pabló ndaa chuman' cu'naj Antípatris a.

³² Gaa ne yo'ó güii me se cavii nij tanuu taj xráá cuayó, ca'an̄j nij so' ga Pabló, ne yo'ó nij tanuu ro', canicaj nij so' chuman' Jerusalén ndaa cuarteé a.

³³ Dan me se gaa catúj nij tanuu taj xráá cuayó ga Pabló chuman' Cesarea, ne nago' nij so' yan̄j cartá yo' ra'a síi nicaj suun gobernador, ne tacuachén nij so' man Pabló rihaan so' uún a.

³⁴ Gaa quisij nayaa so' yan̄j cartá, ne xná'an̄j so' me estadó cavii Pabló, ne cataj xna'an̄j nii rihaan so' se vaa cavii Pabló estadó Cilicia a.

³⁵ Gaa ne cataj so' rihaan Pabló a:

—Naqui'yaj cuú 'un̄j che'é so' asa' ca'na' nij síi cuta' cacun' xráá so' á —taj so' rihaan Pabló a.

Gaa ne ca'ne' so' suun rihaan nij tanuu se vaa ca'an̄j nicaj nij tanuu man Pabló rá tucúa suun noc̄o cune' síi cu'naj Herodes ne tumé nij tanuu man so' a.

24

Nan̄ nihánj taj xna'an̄j che'é cacun' cuta' nii xráá Pabló a

¹ Dan me se cachén 'un' güii, gaa ne nanij xrej at̄a suun noc̄o doj cu'naj Ananías ndaa chuman' Cesarea, ne ca'an̄j ta'aj nij síi uun chij rihaan nij yuvī israelitá do', 'o síi a'mii natáj cu'naj Tértulo

do', ga so', ne cuta' nij so' cacun' xraá Pabló rihaan sí nica_j suun gobernador a.

² Dan me se ga_a canacúún nii ca'na' sí cu'naj Pabló, ne ca'na' Pabló, ne guun che'e sí cu'naj Tértulo cuta' so' cacun' xraá Pabló rihaan sí cu'naj Félix, cataj so':

—Che'é se so' me sí acaj ndo'o cuentá ro', che'é dan dínj mán núj sij israelitá, ne naxcaj ndo'o chiháán núj,

³ ne cunudanj núj me sí taj se vaa inanj sa' uxrá qui'yáá so', Félix sij sa' ndo'o a. Ne: “O guun ni'yaj ndo'o ní”, taj taran' núj rihaan so' me rej ma'an vaj núj a.

⁴ Tzaj ne taj che'é guun rmii so' doj qui'yáj ma'. Ne che'é dan rqueé 'unj rihaan so' se vaa veé danj ga_a inaj nimán so', ne cunó so' doj tzin' se nana núj nanj adonj.

⁵ ”Dan me se xcaj núj cuentá se vaa xa' sí nihánj, tzaj ne ase vaa yu_{vee} xíj man naa vaa so', ne so' me sí 'yaj se vaa ino vaa rá cunudanj nij sí israelitá yanj rihaan chumii nihánj ne xra' ta'aj nij so', ne so' me sí uun chij rihaan nij sí noco' 'o tucuáán ne se tucuanj sí cavii chuman' Nazaret a.

⁶ Ne ndaa guun rá so' qui'yaj chi'ii so' man nuví nocoo, ne che'é dan quita'aa núj man so', ne guun rá núj ca'ne' núj cacun' che'é so' ndaa vaa a'mii tucuáán noco' ma'an núj a.

⁷ Tzaj ne sí cu'naj Lisias tanuu uun chij rihaan taran' nij tanuu man chuman' Jerusalén ro', ca'néj yuva_a so' man sí nihánj ra'a núj,

⁸ ne cataj xna'anj so' rihaan nij sí me rá cuta' cacun' xraá Pabló se vaa ca'na' nij so' rihaan so'

nihánj a. Ne dan me se ma'án so' me síi guun nucuaj naqui'yaj cuu che'é nu' rasuun nihánj, ne xcaj ma'án so' cuentá che'é cacun' cuta' núj xráá Pabló nanj adonj —taj síi cu'naj Tértulo cuno síi cu'naj Félix a.

⁹ Gaa ne yo'ó nij yuvij israelitá ro', caraa ndo'o nij so' cacun' xráá Pabló, ne cataj nij so' se vaa ya vaa se nana síi cu'naj Tértulo yo' a.

Nana nihánj taj xna'anj che'é nana ca'mii ma'an Pabló rihaan síi nicaj suun gobernador cu'naj Félix yo' a

¹⁰ Gaa ne guun ra'a síi nicaj suun gobernador cataj so' se vaa ca'vee ca'mii Pabló, ne che'é dan cataj Pabló a:

—Ne'én 'unj se vaa quisij que'ee yo' guún so' síi a'ne' cacun' che'é nij síi man chiháán núj, ne che'é dan uun niha' raj ca'mii nacaj 'unj che'é ma'anj rihaan so' á.

¹¹ Ne guun nucuaj ma'án so' xcaj so' cuentá se vaa ataa quisij chuvij güii asij cavii 'unj chuman' Jerusalén caraa guee 'unj rihaan Diose a.

¹² Ne rá nuvíi nocoo do', rá nij ve' tucu'yón núj sij israelitá se tucuaj Moisés do', rque chuman' do', ne cano tuví 'unj ga yuvij ma'. Ne a doj ne ca'maan rá nij yuvij quí'yáá 'unj ma'.

¹³ Ne se ca'vee tijaan nij síi nihánj se vaa vaa che'é cuta' nij so' cacun' xráj ma'.

¹⁴ "Tzaj ne cataj yá 'unj rihaan so' se vaa xa' tucuáán tucu'náj nij síi nihánj tucuáán ne ro', danj 'yáá 'unj aráj guee 'unj rihaan Diose sij nocoo' nij xii 'unj a. 'O se amán raj nu' nana no rihaan yanj no

se tucuanj Moisés do', se nana nij sí nata' se nana Diose gaa naá do' a.

¹⁵ Ne nucuj rá 'unj man Diose ndaa vaa 'yaj ma'an nij sí nihánj se vaa vaa güii cunu i'na' uún nij sí sa' cavi' do', nij sí chi'ii cavi' do' a.

¹⁶ Che'é dan nu' se vaa 'yáj, tzaj ne ve'é inanj 'yáj che'é rej se guun quitaj cacun' xráj rihaan Diose do', rihaan yuvii do' ma'.

¹⁷ "Dan me se cachén que'ee yo', gaa ne guun rá 'unj rque 'unj caridad rihaan tuví' 'unj sí nique ne rque 'unj rasuun guee rihaan Diose, ne che'é dan ca'anj 'unj ndaa chuman' Jerusalén a.

¹⁸ Ne gaa qui'yáa 'unj danj, ne nari' doj sí israelitá cavii estadó Asia mán 'unj rá nuvií nocoo, ne aj cunu sa' 'unj rihaan Diose daj vaa taj se tucuanj núj a. Tzaj ne taj vaj yuvii vaj ga 'unj, ne taj vaj sayuun chi'ii qui'yáa 'unj gaa nari' nij so' manj ma'.

¹⁹ Ne xa' nij so', tzaj ne sese vaa cacun' tumé 'unj rá nij so', ne no xcúún nij so' ca'na' ma'an nij so' canicun' nij so' nihánj rihaan so' á.

²⁰ Ne sese taj, ne no xcúún ma'an nij sí nihánj cataj xna'anj nij so' rihaan so' me cacun' tumé 'unj nari' nij so' gaa canicún' 'unj rihaan juntá qui'yaj nij sí ata suun rihaan núj á.

²¹ 'O se vaa orún' nana caguáj 'unj gaa canicún' 'unj rihaan nij sí uun chij rihaan nij yuvii israelitá yo', ne dan me se cataj 'unj danj: "Maan che'é se 'unj me sí amán rá se vaa vaa güii cunu i'na' uún nij sí cavi' qui'yaj Diose ro', che'é dan naqui'yaj cuu nij soj che'ej cuan' a", cataj 'unj rihaan nij so' a —taj Pabló rihaan sí nicaj suun gobernador cu'naj Félix a.

²² Ese síi cu'naj Félix ro', me síi quene'en sa' daj vaa se tucuanj ní' sij noco' man Jesucristó, gaa ne cataj so' se vaa guun raan doj, gaa ne ca'ne' so' cacun' che'é Pabló a. Che'é dan cataj so':

—Asa' ca'na' tanuu uun chij cu'naj Lisias nihánj, ne naqui'yaj cuú 'unj che'é nij soj á —taj síi cu'naj Félix a.

²³ Ne ca'ne' síi cu'naj Félix suun rihaan tanuu uun chij rihaan 'o cientó tanuu se vaa cutumé tanuu man Pabló, tzaj ne ca'vee cachee uun Pabló doj, ne ca'vee ca'na' nij tuvi' Pabló racuíj nij so' doj man Pabló, qui'yaj tanuu, taj síi cu'naj Félix yo' a.

Nana nihánj taj xna'anj se vaa yo'o 'nij Pabló taga', qui'yaj síi cu'naj Félix a

²⁴ Dan me se cachén doj güüi, gaa ne ca'na' síi cu'naj Félix ga nica so' chana israelitá cu'naj Drusila, ne canacúun so' se vaa ca'na' Pabló rihaan so', ne cuno so' nana ca'mii Pabló rihaan so' che'é tucuaán noco' ní' sij amán rá ni'yaj man Jesucristó a.

²⁵ Dan me se cataj xna'anj Pabló rihaan síi cu'naj Félix se vaa no xcúun ní' cunu sa' ní' rihaan Diose ne no xcúun ní' cutumé ní' man ma'an ní' se vaa ve'é inanj qui'yaj ní' a. Ne ca'mii so' che'é güüi ca'ne' Diose cacun' che'é yuvii a. Gaa neuchu'vi' ndo'o síi cu'naj Félix, ne cataj so':

—Cuanó nihánj me se ca'anj so' yaj, tzaj ne asa' vaa i'núj rihanj, ne canacunj uún 'unj mán so' á —taj so' rihaan Pabló a.

²⁶ Danj cataj Félix che'é se me rá so' caráán Pabló sa'anj rihaan ma'an so' che'é rej quirii so' taga' man Pabló, rá so' a. Che'é dan que'ee güüi

canacúun so' man Pabló ca'na' Pabló rihaan so', ne ca'mii so' ga Pabló a.

²⁷ Dan me se quisíj vij ya yo' 'nij Pabló taga', gaa ne x'néj suun ra'a síí cu'naj Félix, ne catúj síí cu'naj Porcio Festo a. Ne guun rá síí cu'naj Félix qui'yaj so' se luj che'é nij yuvij israelitá, ne che'é dan tanáj so' man Pabló taga' a.

25

Nana nihánj taj xna'anj se vaa cataj Pabló se vaa guun rá so' naqui'yaj cuu síí nicaj suun emperador che'é so' a

¹ Quisíj va'núj güii yáán síí cu'naj Festo síí nicaj suun gobernador, gaa ne curihanj so' chuman' Cesarea cavii so' ndaa chuman' Jerusalén a.

² Gaa ne nij xrej atá suun nocoo doj do', nij síí raa doj rihaan nij yuvij israelitá do', cuta' nij so' cacun' xráá Pabló rihaan síí cu'naj Festo a. Gaa ne nucuaj

³ cachíin ni'yaj nij síí israelitá rihaan síí cu'naj Festo se vaa ca'ne' so' suun se vaa ca'na' Pabló ndaa chuman' Jerusalén a. 'O se guun rá nij so' caráán nij so' chrej ne ticavi' nij so' man Pabló a.

⁴ Che'é dan cataj síí cu'naj Festo se vaa tumé nij tanuu man Pabló chuman' Cesarea a. 'O se rque doj güii nucui' so' chuman' Cesarea, taj so' a.

⁵ Gaa ne cataj uún síí cu'naj Festo rihaan nij síí israelitá a:

—Che'é dan sese nij tuvi' soj síí guun nucuaj ca'anj ndaa chuman' Cesarea ga 'unj ro', ca'anj nij so', ne sese vaa se chi'ii qui'yaj síí cu'naj Pabló, ne cuta' nij so' cacun' xráá Pabló á —taj síí cu'naj Festo rihaan nij so' a.

⁶ Dan me se guun raan síi cu'naj Festo 'o tunj güii chuman' Jerusalén ta' asuun, gaa ne nanii so' ndaa chuman' Cesarea, gaa ne yo'ó güii me se ca'anj quitaj so' chruun xlá sa' rej naqui'yaj çuu so' che'é yuvií, gaa ne ca'ne' so' suun rihaan nij tanuu se vaa ca'na' Pabló rihaan so' qui'yaj nij tanuu a.

⁷ Gaa ne gaa ca'na' Pabló rihaan so', ne man nij síi israelitá nanij ndaa chuman' Jerusalén, ne canicun' nij so' nu' anicaj rej x'nuj Pabló, ne caraa ndo'o nij so' cacun' nocoo xráá Pabló, tzaj ne ne ca'vee tijaan nij so' se vaa ya ya qui'yaj so' cacun' yo' ma'.

⁸ Gaa ne canicaj Pabló, ca'mii nacaj so' che'é ma'an so', cataj so':

—Taj cacun' qui'yáa 'unj rihaan se tucuaj nij síi israelitá do', rihaan nuvií nocoo do', rihaan síi nicaj suun emperador cu'naj César do' a ma' —taj Pabló rihaan síi cu'naj Festo yo' a.

⁹ Dan me se guun rá síi cu'naj Festo qui'yaj so' se luj che'é nij yuvií israelitá, ne che'é dan cataj so' rihaan Pabló a:

—Ne me rá so' ca'anj so' ndaa chuman' Jerusalén ne ndaa ti'yaj ca'ne' 'unj cacun' che'é so' che'é nij rasuun nihánj na' —taj so', xná'anj so' man Pabló a.

¹⁰ Gaa ne cataj Pabló rihaan so' a:

—Nihánj me nicún' 'unj rihaan so', sij cune' síi nicaj suun emperador cu'naj César se vaa ca'ne' so' cacun' che'é yuvií á. Ne che'é dan no xcúun so' ca'ne' so' cacun' che'é 'unj nanj adonj. Ne qui'yáa 'unj cacun' rihaan a 'ó nij síi israelitá ma'. Ne aj ne'én so' se vaa ya vaa nana nihánj nana a'mii 'unj rihaan so' chuguaj.

11 Dan me se sese vaa cacun' qui'yáá 'un̄j ne sese vaa che'é ticavi' nii mán 'un̄j, ne a'vej 'un̄j cavi' 'un̄j á. Tzaj ne sese cacun' rmi' in̄anj me se nana nij síi nihánj, ne taj a 'ó síi nó xcúun tacuachén mán 'un̄j rihaan nij so' ma'. Cuanō nihánj me se achíin ni'yáá 'un̄j rihaan síi nicaj suun emperador cu'naj César se vaa ma'an so' ca'ne' cacun' che'é 'un̄j adonj —taj Pabló rihaan síi cu'naj Festo a.

12 Dan me se nuchruj raā síi cu'naj Festo ga nij síi narqué chrej man so' daj qui'yaj nij so', ga ne cataj so' rihaan Pabló a:

—Aj cachíin ni'yáá so' rihaan síi cu'naj César se vaa ma'an so' ca'ne' cacun' che'é so' á. Che'é dan ca'an̄j so' rihaan so' adonj —taj so' rihaan Pabló a.

Nana nihánj taj xna'an̄j daj guun ga ca'na' Pabló rihaan síi nicaj suun rey cu'naj Agripa do', rihaan ra'vij so' chana cu'naj Berenice do' a

13 Dan me se cachén doj güii, ga ne síi nicaj suun rey cu'naj Agripa do', chana cu'naj Berenice do', ca'na' chuman' Cesarea, ca'na' ni'yaj roj so' síi nicaj suun gobernador cu'naj Festo a.

14 Ne guun raan roj so' que'ee güii chuman' Cesarea a. Che'é dan cataj xna'an̄j síi cu'naj Festo rihaan síi nicaj suun rey yo' che'é Pabló a. Dan me se cataj so':

—Dan me se síi quináj taga' nihánj qui'yaj síi cu'naj Félix me yo'o so',

15 ne ga nuu 'un̄j chuman' Jerusalén, ne nij xrej atā suun nocōo doj do', nij síi uun chij rihaan nij yuvij israelitá do', cataj xna'an̄j nij so' rihaan 'un̄j che'é so', ne guun rá nij so' se vaa nari' 'un̄j cacun' xráa so' ne qui'yáá 'un̄j sayuun man so' a.

16 Gaa ne cataj xna'anj 'unj rihaan nij so' se vaa nuveé se tucuanj núj sij romanó me tucuachén uun ní' man 'o so' ticaví' nii man so' ma'. Tananj asino yaan quene'en síi ata' cacun' man nij síi cuta' cacun' xráá so', gaa ne ca'mii nacaj so' che'é ma'an so', cataj 'unj rihaan nij so' a.

17 "Dan me se ca'na' nij so' chuman' Cesarea nihánj, ne ne guun raan 'unj ma'. Tzaj ne yo'ó güii me se quitáá 'unj chruun xlá sa' rej a'né' 'unj cacun' che'é yuvií, gaa ne ca'né' 'unj suun rihaan nij tanuu se vaa ca'na' síi 'nij taga' yo' rihaan 'unj qui'yaj nij so' a.

18 Ne gaa ca'na' so', ne nij síi guun rá cuta' cacun' xráá so' ro', canicun' nij so' ne cuta' ndo'o nij so' cacun' xráá so', tzaj ne nuveé cacun' chí'ii me cacun' cuta' nij so' xráá so', rá 'unj ma'.

19 'O se ino doj vaa rá nij so' ga síi 'nij taga' yo', ni'yaj nij so' tucuáán noco' ma'an nij so' do', 'o síi cavi' cu'naj Jesús do' a. 'O se vaa i'na' síi cu'naj Jesús, cataj síi 'nij taga' cu'naj Pabló yo' a.

20 "Dan me se ne quene'én 'unj daj naquiyaj cuj che'é rasuun vaa danj ma'. Che'é dan xna'anj 'unj man síi cu'naj Pabló yo' sese guun rá so' ca'anj so' chuman' Jerusalén, ne ca'vee ca'ne' 'unj cacun' che'é so' che'é nij rasuun yo', taj 'unj rihaan so' a.

21 Tzaj ne cachíin ni'yaj Pabló se vaa yo'o qui'nij so' taga' nihánj ndaa se ca'vee naquiyaj cuu síi nicaj suun emperador che'é so' a. Che'é dan ca'né' 'unj suun rihaan nij tanuu se vaa yo'o cutumé nij so' man Pabló taga' ndaa se ca'nej 'unj man so' rihaan síi cu'naj César yo' a —taj síi cu'naj Festo rihaan síi cu'naj Agripa a.

22 Gaa ne cataj sí cu'naj Agripa rihaan sí cu'naj Festo a:

—Me rá 'unj cunō ma'án 'unj ca'mii snó'o yo' á —taj so' rihaan sí cu'naj Festo a.

—A'yuj me se cunó so' ca'mii so' adonj —taj sí cu'naj Festo rihaan sí cu'naj Agripa a.

23 Ne yo'ó güii me se ve'é ndo'o qui'yaj nij yuvii gaa ca'na' sí nicaj suun rey cu'naj Agripa do', chana cu'naj Berenice do', ne catúj roj so' rá ve' 'yaj nii juntá a. Ne ca'na' tanuu uun chij rihaan 'o mij tanuu ca'na' nij sí raá man chuman' Cesarea yo' ca'na' ga roj so' a. Gaa ne ca'ne' sí cu'naj Festo suun rihaan nij tanuu se vaa ca'na' Pabló rihaan nij so' qui'yaj nij tanuu a.

24 Ne gaa catúj Pabló, ne cataj sí cu'naj Festo rihaan sí cu'naj Agripa a:

—Cunó so', sij nicaj suun rey Agripa. Cunō soj sij cunuu chre' ga núj nihánj á. Nihánj me se ni'yaj nij soj man sí nihánj á. 'O se rque chuman' Jerusalén do', ndaa ma'an chuman' nihánj do', ca'na' ndo'o nij yuvii israelitá rihanj ne caguáj nij so' cataj nij so' se vaa ne nó xcúún so' gaa i'na' so' doj a ma'.

25 Tzaj ne xcaj 'unj cuentá se vaa taj se chi'ii qui'yaj so', ne taj che'é ticavi' nii man so' qui'yáá 'unj ma'. Tzaj ne ma'an so' cachíin ni'yaj rihaan sí nicaj suun emperador se vaa ca'ne' ma'an emperador cacun' che'é so', ne che'é dan guun raj se vaa ca'nej 'unj man so' rihaan sí nicaj suun emperador adonj.

26 Tzaj ne ne cavii raá 'unj me nana cachron 'unj rihaan yanj ca'nej 'unj rihaan sí nicaj suun emperador yo' che'é cacun' tumé sí nihánj ma'. Che'é dan ca'na' so' rihaan so' sij nicaj suun rey Agripa

do', rihaan yo'ó nij soj do', che'é rej naqui'yaj cuu nij soj che'é so' ne cataj xna'anj nij soj rihaan 'unj me nana cachron 'unj rihaan yanj che'é so' á.

²⁷ 'O se snúú rma'án 'unj, sese ca'nej 'unj man 'o síi 'nij taga' rihaan síi nicaj suun emperador, sese nuvi' nana cataj xna'anj 'unj rihaan so' che'é cacun' tumé síi 'nij taga' yo', rá 'unj a —taj síi cu'naj Festo rihaan yo'ó nij so' a.

26

Nana nihánj taj xna'anj daj ca'mii Pabló rihaan síi nicaj suun rey cu'naj Agripa a

¹ Gaa ne cataj síi cu'naj Agripa rihaan Pabló a:
—Ca'vee ca'mii so' che'é so' á —taj so' rihaan Pabló a.

Gaa ne ticun' ra'a Pabló, ne ca'mii nacaj so' che'é ma'an so', cataj so':

² —Aj cavii sa' uxrá 'unj nihánj, che'é se vaa i'núj rihanj ca'mii nacaj 'unj manj rihaan so' cuan', sij nicaj suun rey cu'naj Agripa. Ne nihánj me se ca'mij che'é nu' cacun' cuta' yo'ó nij síi israelitá xráj a.

³ 'O se ne'én 'unj se vaa so' me síi nicaj cuentá che'é nu' se tucuanj ní' sij israelitá, ne ne'én so' daj vaa nu' nana nocó' ní' a. Che'é dan achín n'yáá 'unj rihaan so' se vaa qui'yáá so' se ndo'o, ne gaa inaj nimán so', ne cunó so' nana a'mij á.

⁴ ”Dan me se gaa síi tachruu mé 'unj, ne cayáán 'unj chuman' Jerusalén ga yo'ó nij síi israelitá, ne aj ne'en cunudanj nij síi israelitá se vaa qui'yáá gaa mej síi tachruu a.

⁵ Ne sese guun rá nij so', ne guun nucuaj nij so' cataj xna'anj ma'an nij so' se vaa sij fariseo mé 'unj asino yaan, ne qui'yáá 'unj nu' ndaa vaa 'yaj nij sí fariseo, ne nij sí fariseo ro', me sí nica doj noco' se tucuaj ní nanj á.

⁶ Ne nihánj me se cuta' nij sí israelitá cacun' xráj, ne nicún' 'unj nihánj rihaan so', che'é se guun ya raj se vaa qui'yaj Diose nu' ndaa vaa cata' tu'va so' rihaan xii ní gaa naá a.

⁷ Ne nuvii nigan' yo'o na'vij cunu' chuvij nij x'ne' nij sí israelitá rihaan Diose, che'é se guun ya rá ma'an nij so' se vaa qui'yaj Diose nu' danj che'é nij so' a. Ne che'é rasuun yo' rasuun qui'yaj Diose che'é ní ro', che'é dan cuta' nij so' cacun' xráj, nanj rey Agripa.

⁸ Ne me che'é ne amán rá soj se vaa ca'vee cunu u'na' uún nij sí cavi' qui'yaj Diose ga.

⁹ "Dan me se 'unj nihánj me se gaa rque me se guun ya ya rá 'unj qui'yaj ndo'o 'unj sayuun man nij sí noco' man Jesucristó sí cavii chuman' Nazaret a.

¹⁰ Ne danj qui'yáá 'unj rque chuman' Jerusalén nanj á. 'O se 'unj me sí canu' man que'ee nij sí sa' noco' man Diose taga', ne rque nij xrej atá suun noco' doj se nucuaj rihanj se vaa qui'yaj danj a. Ne gaa ca'ne' núj cacun' che'é nij so' se vaa cavi' nij so', ne ndaa 'unj me sí cataj se vaa no xcúún nij so' cavi' nij so' adonj.

¹¹ Ne guun que'ee ndo'o ca'anj 'unj cunudanj nij ve' tucu'yón ní sij israelitá se tucuaj Moisés, ne qui'yáá 'unj sayuun man nij sí noco' man Jesús, ne ndaa rqueé 'unj man nij so' ca'mii chi'ii nij so' che'é Jesucristó, ne che'é se ca'maan ndo'o rá 'unj

ni'yaj 'un̄j man nij so', ne ndaa canocó' 'un̄j man nij so' ndaa yo'ó chuman' naj gan' che'é rej qui'yáá 'un̄j doj sayuun man nij so' adon̄j.

12 ”Dan me se gaa qui'yáj dan̄j, ne 'o güii me se ca'an̄j 'un̄j chuman' Damasco, ne aj rqué nij xrej at̄a suun noc̄o doj rej nucuaj, ne ca'née nij so' mán 'un̄j ca'an̄j 'un̄j qui'yáá 'un̄j sayuun man nij síi noc̄o' man Jesucristó yan̄j chuman' Damasco yo' a.

13 Cunó so' nana ca'mij rihaan so' nihánj, nan̄j rey. 'O se caxuj me yo', ne vaj 'un̄j chrej, ne rej xta' ro', cuchuguun 'o ya'an nu' anicaj rej nicun' 'un̄j ga nij síi vaj chrej ga 'un̄j, ne nucuaj doj ya'an yo' rihaan naán güii á.

14 Dan me se quinij taran' núj rihaan yo'óó, ne cunó 'un̄j ca'mii yo'o so' rihaan 'un̄j, ne xna'ánj hebreo ca'mii so', cataj so': “Me che'é 'yáá so' sayuun manj, ga Saulo'. 'O se me rá so' qui'yáá so' sayuun manj, tzaj ne man ma'án so' 'yáá so' sayuun ase 'yaj scúj o' tacanj rihaan chruun sihaa nicaj síi 'yaj suun ga yuntá nan̄j á”, taj síi ca'mii rihan̄j a.

15 Gaa ne taj 'un̄j: “Me síi mé so', Señor”, taj 'un̄j, xná'an̄j 'un̄j man so' a.

”Gaa ne cataj síi 'nij ra'a man ní': “Un̄j ro', me Jesús, ne sij 'yáá so' sayuun man mej adon̄j.

16 Tzaj ne naxagaa so', canicun' cayá so' á. 'O se nihánj me se curuví' 'un̄j rihaan so' che'é se narii 'un̄j mán so' qui'yaj suun so' rihan̄j ne nata' so' rihaan yuvij che'é nij rasuun narí' so' cuano do', che'é rej quene'én so' manj do', che'é nij rasuun narí' so' asa' curuvi' uún 'un̄j rihaan so' rej rihan̄j doj do' a.

17 Dan me se t̄inanii 'uñj mán so' rihaan nij síi man chiháán so' yuvīi israelitá do', rihaan nij síi yaníj do', ne yaj ca'nej 'uñj mán so' rihaan nij so',

18 che'é rej naxra' rihaan nij so' ne xcaj nij so' cuentá qui'yáá so', gaa ne tanáj xco nij so' rej rmi' rej uun chij síi chree rihaan nij so', ne canicaj nij so' rihaan Diose rej ranga' rej guun nucuj nij so' xcaj nij so' cuentá a. Gaa ne ca'vee quinavij nu' cacun' tumé nij so', ne ca'vee cavij sa' nij so' ga nij síi cunuu sa' nimán rihaan Diose, sese cuchuman rá nij so' ni'yaj nij so' mán 'uñj, qui'yáá so' á", taj síi 'nij ra'a man ní' rihanj a.

19 "Ne xcaj so' cuentá, sij nicaj suun rey Agripa. 'O se ne guun nichraj nimanj ma'. Tananj qui'yáá 'uñj nu' ndaa vaa cataj Jesucristó rihanj gaa curuvi' so' rihanj rej xta' a.

20 Asino yaan natá' 'uñj chuman' Damasco do', chuman' Jerusalén do', nu' estadó Judea do', gaa ne natá' 'uñj ndaa rej man nij síi yaníj uún a. Natá' 'uñj rihaan cunudanj nij yuvīi se vaa canicaj nimán nij yuvīi canoco' nij so' Diose, ne ve'é qui'yaj nij so' ndaa vaa 'yaj síi canicaj ya nimán nanj adonj.

21 Che'é dan quita'aa nij yuvīi israelitá mán 'uñj rá nuvií nocoo, ne guun rá nij so' ticavi' nij so' manj a.

22 "Che'é dan nicun' 'uñj rihaan nij soj cuano, ne ta'aj soj me síi yanj uun ne ta'aj soj me síi raa atā suun, tzaj ne Diose me síi racuíj manj ndaa cuano nihánj, ne che'é dan natá' 'uñj se nana Diose rihaan nij soj a. Tzaj ne ne ino vaa nana natá' 'uñj rihaan nij soj cuano ga se nana nij síi nata' se nana Diose gaa naá do', se nana ma'an síi cu'naj Moisés

do', gaa cataj xna'anj nij so' daj guun rej rihaan nij so' ma'.

²³ Dan me se ma'an nij so' cataj se vaa sí ca'nej Diose t̄inani man yuvī rihaan sayuun me se quirañ' so' sayuun, ne guun so' sí cunuu i'na' uún asino yaan rihaan yo'ó nij sí cavi', ne nata' so' nana ya rihaan nij yuvī israelitá do', rihaan nij yuvī yaníj do' a —taj Pabló rihaan sí cu'naj Agripa yo' a.

²⁴ Dan me se gaa ca'mii so' danj rihaan sí cu'naj Agripa, ne caguáj sí cu'naj Festo, cataj so':

—Snúú so', Pablo. Che'é se tucu'yón ndo'o so' yanj ro', che'é dan guun snuj raá so' nanj á —taj so' rihaan Pabló a.

²⁵ Gaa ne cataj Pabló rihaan sí cu'naj Festo yo' a:

—Ne snuj 'unj, man Festo sij uun chij. Tananj ya vaa nana natá' 'unj, ne nana ve'é vaa no xcúún ní cunó ní me nij nana yo' a.

²⁶ 'O se sij nicaj suun rey me sí nihánj, ne so' me sí ne'en daj vaa nu' rasuun natá' 'unj rihaan nij soj cuano á. Ne ne chu'ví' 'unj nata' 'unj nu' nana nihánj rihaan so' ma'. 'O se aj xcaj sí cu'naj Agripa nihánj cuentá che'é nu' rasuun nihánj, rá 'unj á. 'O se nuveé rasuun 'nij yuve me rasuun nihánj a man adonj —taj Pabló rihaan sí cu'naj Festo a.

²⁷ Ne cataj so' rihaan sí cu'naj Agripa a:

—Ne cataj so' 'o nana rihanj, Agripa. Amán rá so' daj taj se nana nij sí nata' se nana Diose gaa naá na'. Aj ne'én 'unj se vaa amán rá so' nanj adonj —taj Pabló rihaan sí cu'naj Agripa yo' a.

²⁸ Gaa ne cataj Agripa rihaan so' a:

—Ca'mij so' doj rihanj, gaa ne cuaj guún 'unj sí nocō' man Jesucristó, rá so' na' —taj Agripa rihaan Pabló a.

²⁹ Gaa ne cataj Pabló rihaan so' a:

—Achíin ni'yáá 'unj rihaan Diose se vaa, ca'vee se doj nana ca'mij, ca'vee se nocōo ndo'o ca'mij, tzaj ne nuveé curuún so' cuchuman rá se nanaj ma'. Tananj me rá 'unj cuchuman rá cunudanj soj sij uno nana a'mij cuano, ne ase vaa 'unj ro', danj gaa soj uún nanj adonj. Tzaj ne se cunumij soj ga aga' ne' nihánj, rá 'unj ma' —taj Pabló rihaan nij so' a.

³⁰ Gaa ne canicun' caya sí nicaj suun rey do', sí nicaj suun gobernador do', chana cu'naj Berenice do', yo'ó nij sí yanj ga nij so' do',

³¹ ne curihanj nij so', ne cataj nij so' rihaan tuvi' nij so' se vaa taj vaj cacun' qui'yaj Pabló, ne ne nó xcúún so' cavi' so' do', qui'nij so' taga' do' ma'.

³² Gaa ne cataj sí cu'naj Agripa rihaan sí cu'naj Festo a:

—Sese ne cachinj ni'yaj sí nihánj se vaa ca'ne' César cacun' che'é so', ne ca'vee curihanj so' taga' asuun saj á —taj sí cu'naj Agripa rihaan sí cu'naj Festo a.

27

Nana nihánj taj xna'anj se vaa ca'née sí cu'naj Festo man Pabló ca'anj Pabló chuman' Romá a

¹ Dan me se guun ya rá sí cu'naj Festo se vaa ca'anj núj ndaa yo'óo nocōo Italia rej ne sí nicaj suun emperador cu'naj César a. Gaa ne tacuachén so' man Pabló do', man yo'óo doj sí 'nij taga' do', rihaan 'o tanuu uun chij rihaan 'o cientó tanuu, ne

Julio cu'naj tanuu yo', ne síi nuu rihaan ma'an síi nicaj suun emperador me so' a.

² Dan me se cavii núj ga tinú' Aristarco síi cavii chuman' Tesalónica chuman' naj estadó Macedonia rque 'o rihoo chéé rihaan na a. Ne xa' rihoo yo', tzaj ne rihoo cavii chuman' Adramitio me yo', ne ca'anj yo' ndaa nij chuman' naj tu'va na ya'anj estadó Asia a.

³ Ne yo'ó güii me se cuchí' núj chuman' cu'naj Sidón, ne ve'é inanj qui'yaj síi cu'naj Julio ga Pabló, ne ca'vej rá so' ca'anj Pabló rihaan nij tuvi' Pabló síi yanj chuman' Sidón yo', che'é rej taj ya'anj nij so' man Pabló a.

⁴ Gaa ne cavii uún núj rque rihoo, ne ca'anj uún rihoo, ne cachén núj rej sur rej nichrun' yo'óó taj rihaan na ya'anj cu'naj Chipre a. 'O se go' ndo'o nana rej rihaan rihoo yo' a.

⁵ Gaa ne cachén uún núj rihaan na ya'anj, ne cachén núj tu'va estadó Cilicia do', estadó Panfilia do', ne cuchí' núj ndaa chuman' Mira chuman' naj estadó Lisia a.

⁶ Ne chuman' yo' ro', nari' tanuu yo' 'o rihoo cavii chuman' Alejandría, ne rihoo ca'anj ndaa Italia me yo' a. Che'é dan cavii núj rque rihoo yo' qui'yaj tanuu yo' a.

⁷ Dan me se nanaj ndo'o cachéé rihoo yo' rque que'ee güii, ne che'é dan sayuun ndo'o vaa cuchí' núj rihaan chuman' Gnido a. Ne ne ca'vee ca'anj núj a doj, qui'yaj nana ma'. Che'é dan cachén núj nichrun' yo'óó taj rihaan na ya'anj cu'naj Creta, ne nichrun' rej cu'naj Salmón rej naj yo'óó Creta cachén núj a.

⁸ Ne sayuun uxrá vaa cachén núj rej yo', ne

cuchi' núj ndaa 'o rej cu'naj Buenos Puertos, ne nichrun' naj chuman' yo' ga chuman' cu'naj Lasea a.

⁹ Dan me se aj cachén ndo'o güii, qui'yaj rihoo yo', ne aj cachén güii toco' nij yuviij israelitá x'naa man ma'an nij so' che'é se aráj guee nij so' rihaan Diose, ne nichrun' quisij dió avii nana yuvaa rihaan na ya'anj a. Che'é dan cuchu'vi' núj se vaa quiran' núj sij man rque rihoo yo' sayuun a. Che'é dan narqué Pabló chrej rihaan nij síi man rque rihoo yo',

¹⁰ ne cataj so' rihaan nij so' a:

—Ne'én 'unj se vaa xa' rihoo nihánj, tzaj ne sese yo'o ca'anj rihoo nihánj, ne quiran' ndo'o nij rasuun man rque rihoo nihánj do', ma'an rihoo nihánj do', sayuun, ne quirí' ndo'o nij yo', qui'yaj nana yuvaa, ne ndaa cavi' ma'an ní' adonj —taj Pabló rihaan nij so' a.

¹¹ Tzaj ne tanuu uun chij rihaan 'o cientó tanuu yo' ro', ne cuchuman rá so' se nana Pabló ma'. Tananj cuchumán rá so' se nana síi tuguáj rihoo do', síi si'yaj rihoo do' a.

¹² Dan me se rej cu'naj Buenos Puertos yo' ro', nuveé rej sa' quinaj rihoo nu' dió avii nana yuvaa me rej yo' a. Che'é dan nocoo doj ta'aj nij síi man rque rihoo cataj se vaa guun rá nij so' curihanj rihoo rej yo', ne guun rá nij so' se vaa cuchí' rihoo chuman' Fenice ne guun raan rihoo chuman' yo' nu' dió avii nana yuvaa a. Ne chuman' Fenice ro', me chuman' naj yo'óo cu'naj Creta, ne caráán qui rihaan nana yuvaa rej chuman' Fenice, rá nij so' a.

Nana nihánj taj xna'anj che'é sayuun quiran' nij so' rihaan na ya'anj, qui'yaj nana yuva a

13 Dan me se cavii 'o nana catun' rej rque tu'va na ya'anj, ne guun rá nij so' se vaa guun nucuaj nij so' qui'yaj nij so' ndaa vaa guun rá nij so' a. Che'é dan guun che'e rihoo ca'anj rihoo, ne nichrun' yo'ó cu'naj Creta vaj nij so' qui'yaj nana a.

14 Dan me se doj orá vaj rihoo, gaa ne taj ni'yón cavii 'o nana yuva rej xraj rihaan na ya'anj, ne go' uxrá nana yuva rihaan rihoo, ne nana cu'naj Euroclidón me yo' xna'ánj griego a.

15 Ne ne guun nucuaj rihoo ca'anj rihoo rej rihaan rihoo ne qui'yaj canaán rihoo rihaan nana yuva ma'. Che'é dan ca'ne' rá núj, ne canicaj rihoo ne vaj rma'an rihoo, qui'yaj nana yo' a.

16 Ne cachén núj nichrun' yo'o yo'ó nii taj rihaan na ya'anj, ne yo'ó cu'naj Claudia me yo' a. Ne sayuun uxrá guun nucuaj núj naxcaj núj rihoo cunii noco' rej xcó rihoo xij ne naqui'yaj raan núj man rihoo cunii yo' rque rihoo xij yo' a.

17 Ne gaa quisíj naxcaj núj man rihoo cunii yo', ne numíj nij so' ne' naqui'yaj raan nij so' man rihoo xij yo' a. Dan me se kuchu'vi' ndo'o nij so' se vaa cano rihoo rihaan yo'ó chrū naj rque na ya'anj rej cu'naj Sirte ne quirí' nu' rihoo yo' a. Che'é dan nacué nij so' mantá o' nana rihaan, che'é rej se ca'anj yoo rihoo ma'. Ne me rej ma'an go' nana ro', ca'anj rihoo uún adonj.

18 Ne yo'ó güii me se che'é se go' uxrá nana rihaan núj, ne che'é dan quirí'íj nij so' nij rasuun man rque rihoo rque na ya'anj,

19 ne güii va'núj me se ma'an nij so' ra'a nij so'

ri'lj nij so' nij rasuun rásuun ma'an yuvi tuguáj rihoo rque na ya'anj, che'é rej cunu yoo rihoo ne nij so' a.

²⁰ Ne güii do', yati' do', ne curuvi' ni'yaj núj que'ee güii a ma'. Ne yo'o go' nana yuvaa rihaan núj, ne che'é dan guun ya rá núj se vaa daj chihaa mij se ca'vee quinanj núj rihaan sayuun yo' a ma'.

²¹ Dan me se a 'ó nij sí man rque rihoo ne cha nij so', ne che'é dan canicun' Pabló sca'núj nij so', ne cataj so':

—Ve'é doj sese cuno nij soj se nanaj, tinuj. 'O se sese ne cavi ní' yo'óo cu'naj Creta, ne ne quiran' ní' sayuun nihánj, ne ne ca'anj ni'ya cunudanj nij rasuun asuun saj ma'.

²² Ne nihánj me se cuno soj chrej nago' 'unj man soj, ne naqui'yaj niha' soj nimán soj á. 'O se a 'ó tuvi' nij soj se cavi' ma'. Maan orún' rihoo nihánj ca'anj ni'ya a.

²³ 'O se 'unj me sí noco' man Diose, ne 'yaj suun 'unj che'é so', ne ni cua'aa ro', canicun' yo'o se mozó Diose rihanj,

²⁴ ne cataj so': “Se cuchu'ví' so', man Pablo. 'O se no xcúún so' canicún' so' rihaan sí cu'naj César, ne nihánj me se cataj xna'anj 'unj rihaan so' se vaa aj guun rá Diose se vaa caráán Diose rihaan sayuun che'é so' ga cunudanj nij sí nuu rque rihoo nihánj adonj”, taj se mozó Diose rihanj a.

²⁵ Che'é dan naqui'yaj niha' soj nimán soj, tinuj. 'O se 'unj me sí amán ya rá ni'yaj Diose se vaa qui'yaj Diose nu' ndaa vaa cataj xna'anj se mozó Diose rihanj adonj.

²⁶ Tzaj ne 'o se cataj se mozó Diose rihanj se vaa

ya quir̄i' rihoo nihánj tu'va 'o yo'óo taj rihaan na ya'an̄j adonj —taj Pabló rihaan yo'óo nij so' a.

27 Dan me se quis̄ij xca'an̄j güii vaj núj rihaan na ya'an̄j cu'naj Adria, qui'yaj nana a. Ne rej yan' ro', guun rá nij sí tuguáj rihoo se vaa daj doj cuch̄i' núj rihaan 'o yo'óo a.

28 Che'é dan xcaj ta'nga' nij so' me daj metró cunū nū na, ne xcaj nij so' cuentá se vaa ícō xnū' yaan metró nū na rej yo' a. Gaa ne na'vij nij so' 'o orá nii, ne xcaj ta'nga' uún nij so', ne xcaj nij so' cuentá se vaa ícō ch̄ij guee metró cunū nū na a.

29 Che'é dan kuchu'vi' nij so' se vaa canō rihoo yo' rihaan yujej naj rque na ya'an̄j ne cachran' rihoo a. Che'é dan ca'an̄j nij so' rej xcō rihoo, ne tananij nij so' ca'an̄j aga' ganchó rque na ya'an̄j, che'é rej nucu'lu' aga' yo' rque nij yujej naj rque na ya'an̄j, ne canicun' rihoo yo' a. Ne guun ndo'lo rá nij so' se vaa cuaj cuaj quis̄ij güii ne guun nucuaj nij so' quene'en nij so' me rej vaj nij so' a.

30 Gaa ne nij sí tuguáj rihoo ro', guun rá nij so' cunan̄j ma'an̄ in̄anj nij so', ne quinanīi nij so' rihaan sayuun quiran' tuvi' nij so' qui'yaj rihoo yo', rá nij so' a. Che'é dan tu'va rma'an̄ nij so' cataj nij so' se vaa ca'an̄j nij so' tananij nij so' doj aga' ganchó rque na ya'an̄j rej tacúún rihoo, ne ca'an̄j tananij nij so' rihoo cunii yo' rihaan na ya'an̄j catūu nij so' a.

31 Tzaj ne ca'mii Pabló rihaan tanuu uun chij rihaan 'o cientó tanuu do', rihaan yo'óo nij tanuu do', cataj so':

—Sese se quináj nij sí nihánj rque rihoo nihánj, ne se ca'vee quinanīi ma'an̄ soj rihaan sayuun a

ma' —taj Pabló rihaan nij so' a.

³² Gaa ne ca'anj nij tanuu, ca'ne' nij tanuu ne' numii rihoo cunii yo', ne quiniy ma'an rihoo cunii yo' rihaan na ya'anj, ca'anj ni'ya ma'an yo' a.

³³ Ne nichrun' rá ranga', ne nago' Pabló chrej man yo'ó nij so' se vaa chá nij so' doj se chá a. Ne cataj so':

—Cuan' me sǐj 'o xnu' güii quinanó ndo'o rá nij soj, ne a doj ne chá soj se chá ma'.

³⁴ Che'é dan narque 'unj chrej man nij soj cuano se vaa chá soj á. Gaa ne guun nucuaj soj quinanii soj rihaan sayuun nanj á. 'O se a 'ó yuvé raá a 'ó nij soj se ca'anj ni'ya a ma' —taj so' rihaan yo'ó nij so' a.

³⁵ Sǐj ca'mii so' danj, gaa ne nicaj so' rachrúun, ne nago' so' graciá rihaan Diose che'é rachrúun ni'yaj cunudanj nij so', gaa ne cuxra' ta'aj so' rachrúun, ne guun che'e so' chá so' a.

³⁶ Gaa ne guun niha' rá cunudanj nij so', ne ndaa ma'an nij so' chá uún a.

³⁷ Ne cunudanj núj sǐj vaj rque rihoo yo' ro', me vij cientó táa va'núj chihaa xnu' yaan ya yuviij a.

³⁸ Ne gaa quisǐj caraa rque nij so', ne quiri'ij nij so' nu' 'núú trigó rihaan na ya'anj, che'é rej gaa yoo doj rihoo a.

³⁹ Dan me se quisǐj güii, ne quene'en núj yo'óó, tzaj ne ne cunu yaan núj yo'óó yo' a ma'. Tzaj ne quene'en nij so' 'o rej atúj yanǐj doj tzin' na ya'anj, ne naj yo'óó chruu tu'va na ya'anj rej yo' a. Ne guun rá nij so' ca'anj rihoo rej yo' sese ca'vee ca'anj rihoo a.

⁴⁰ Che'é dan ca'ne' nij so' ne' noco' nij aga' ganchó, ne quináj nij aga' ganchó rque na ya'anj,

qui'yaj nij so' a. Ne nache nij so' ne' numji chruun tuguáj rihoo, ne naxumaan mantá rej tacúun rihoo, qui'yaj nij so', ne guun rá nij so' go' nana rihaan mantá ne ca'anj rihoo rej naj yo'óo chruu yo', rá nij so' a.

⁴¹ Tzaj ne ca'anj rihoo canó rihoo xráá 'o tacaan yo'óo chruu naj rque na, ne raan canó tacúun rihoo yo'óo chruu, ne ne ca'vee curihanj yo' a ma'. Ne nucuaj ndo'o go' na rej xcó rihoo, ne daj doj quirj' rej xcó rihoo, qui'yaj na yo' a.

⁴² Ne guun rá nij tanuu ticavi' nij so' man nij síi 'nij taga' tumé nij so', che'é rej se ca'vee go' nij so' xtáj rihaan na ne cunanj nij so' rihaan nij tanuu a.

⁴³ Tzaj ne tanuu uun chij rihaan 'o cientó tanuu ro', ne ca'vej rá so' cavi' Pabló ma'. Che'é dan caráán so' chrej se qui'yaj yo'óo nij tanuu danj ma'. Ne ca'ne' so' suun se vaa nij síi ne'en go' xtáj rihaan na ro', güej asino nij so' rihaan na go' nij so' xtáj rihaan na ca'anj nij so' rihaan yo'óo a.

⁴⁴ Ne yo'óo nij so' ro', cano nij so' rcuchra' do', chruun cavii rihoo yo' gaa cachran' rihoo do', ne ca'anj nij so' rihaan yo'óo yo', taj so' a. Ne danj qui'yaj nij so', ne cuchi' cunudanj nij so' rihaan yo'óo, ne quinani cunudanj nij so' a.

28

Nana nihánj taj xna'anj daj qui'yaj Pabló yo'óo cu'naj Malta a

¹ Dan me se gaa cuchi' sa' núj yo'óo taj rihaan na ya'anj yo', ne xcaj núj cuentá se vaa yo'óo cu'naj Malta me yo' a.

² Ne nij sí chihanj yo'óo yo' ro', ve'é uxrá qui'yaj nij so' ga núj a. 'O se nicaj tuvi' ndo'o nij so' ga núj, ne che'é se caman' maan ne acoj tiha', ne che'é dan naran' nij so' ya'an cunuu guun núj a.

³ Gaa ne naran' Pabló 'o nánj rca', ne cuta' so' rihaan ya'an a. Ne che'é se ya'aan ndo'o ya'an, ne che'é dan curihanj 'o xcuáa yuvaá rque rca' yo', ne canó xo' ra'a Pabló a.

⁴ Ne gaa quene'en nij sí man rej yo' se vaa noco' xcuáa ra'a Pabló, ne cataj nij so' rihaan tuvi' nij so' a:

—Ya ya sij ticavi' yuvij me sí nihánj nanj á. 'O se nda' se quinanii so' rihaan na ya'anj, tzaj ne che'é se tumé so' cacun', ne che'é dan ne no xcuún so' gaa i'na' so' ma' —taj nij so' rihaan tuvi' nij so' a.

⁵ Tzaj ne nacunan' Pabló ra'a so', ne quinij xcuáa rihaan ya'an, ne ne qui'yaj chi'ii xcuáa a doj man Pabló a ma'.

⁶ Tzaj ne nij sí man yo'óo yo' ro', guun rá nij so' se vaa caraa cu'maan ra'a so', ase taj ni'yón cavi' so' ne naxru' so' rihaan yo'óo, tzaj ne gaa guun raan na'vij nij so' quiran' so' danj, ne gaa quene'en nij so' se vaa ne quiran' so' a doj se chi'ii, ne noná nij so' se naná nij so', ne cataj nij so' se vaa 'o ya'anj me Pabló a.

⁷ Dan me se nichrun' rej yo' me se naj to'óo sí uun chij doj rihaan yo'óo taj rihaan na ya'anj yo', ne Publio cu'naj so' a. Ne nicaj tuvi' so' ga núj, ne va'núj güii ve'é taj ya'anj so' man núj a.

⁸ Dan me se naca ndo'o rej Publio yo', ne naj so' rihaan yuvéé, ne ran' ndo'o so' chi'ii ton a. Gaa ne catúj Pabló rej naj so', ne cachíin ni'yaj Pabló rihaan Diose che'é so', gaa ne cuta' Pabló

ra'a Pabló xráá so', ne dan me se nahuun sa' so', qui'yaj Pabló a.

⁹ Gaa quisíj qui'yaj Pabló danj, ne yo'ó nij síi anó chí'ij yanj yo'óó yo' ro', ca'na' nij so' uún rihaan Pabló, ne nahuun sa' nij so', qui'yaj Pabló a.

¹⁰ Gaa ne caráj cochroj uxrá nij so' rihaan núj, ne gaa curihañj núj yo'óó yo', ne rque nij so' rihaan núj cunudanj nij rasuun cachiin man núj a.

Nana nihánj taj xna'anj se vaa cuchì Pabló chuman' Romá a

¹¹ Dan me se cachén va'núj yavii, gaa ne cavii núj rque yo'ó rihoo chéé rihaan na ca'anj núj a. Ne xa' rihoo yo', tzaj ne rihoo quináj sa' tu'va yo'óó taj rihaan na ya'anj yo' nu' nij yavii avii nana yuvaa me yo', ne rihoo cavii chuman' Alejandría me yo', ne no se tinanga' roj ya'anj cuaté cu'naj Cástor ga Pólux rihaan rihoo yo' a.

¹² Dan me se cuchì núj chuman' cu'naj Siracusa, ne va'núj güii caran' núj chuman' yo' a.

¹³ Gaa ne cavii uún rihoo chuman' Siracusa, ne cachén rihoo nichrun' tu'va na ya'anj, ne cuchì rihoo ndaa chuman' Regio a. Gaa ne cachén 'o güii, gaa ne cavii 'o nana rej rque rihaan na ya'anj, ne ca'anj rihoo, ne rque vij güii cuchì núj ndaa chuman' cu'naj Puteoli a.

¹⁴ Ne chuman' Puteoli ro', nari' núj doj tinúú ní', ne cachín ni'yaj nij so' rihaan núj se vaa caran' núj chíj güii ga nij so' a. Ne gaa quisíj chíj nij güii, ne nayón núj chrej, ne ca'anj núj chrej vaj ndaa chuman' Romá a.

¹⁵ Ne cuchì nana che'é núj rihaan nij tinúú ní' síi yanj chuman' Romá, ne ca'na' nij so' nari'

tuvi' nij so' ga núj chuman' cu'naj Foro de Apio do', chuman' cu'naj Tres Tabernas do' a. Ne gaa quene'en Pabló man nij so', ne nago' so' graciá rihaan Diöse, ne nari' nucuj nimán so' a.

¹⁶ Ne gaa quisíj catúj núj chuman' Romá, ne tacuachén tanuu uun chij rihaan 'o cientó tanuu man nij síj 'nij taga' rihaan yo'ó tanuu uun chij doj, ne ca'vej rá nij síj nicaj suun caran' Pabló rá 'o ve' ne cayáán orún' so' ga tanuu tumé man so' a.

Nana nihánj taj xna'anj daj ca'mii Pabló ga nij síj uun chij rihaan nij yuvij israelitá yanj chuman' Romá a

¹⁷ Dan me se cachén va'núj güii, gaa ne canacúún Pabló man nij síj uun chij rihaan nij yuvij israelitá yanj chuman' Romá se vaa cunu chre' nij so' ga so' a. Ne gaa quisíj cunu chre' nij so', ne cataj so' rihaan nij so' a:

—Xa' 'unj nihánj, tzaj ne taj vaj cacun' qui'yáá 'unj rihaan tuvi' ní' sij israelitá do', rihaan se tucuanj xij ní' do' man tinuj. Tzaj ne tuvi' ní' síj yanj chuman' Jerusalén ro', numíj nij so' manj ne tacuachén nij so' manj rihaan nij síj romanó adonj.

¹⁸ Ne nij síj romanó ro', taj se vaa taj che'é cavij 'unj rá nij so' gaa naqui'yaj cuu nij so' che'ej ma'. Ne guun rá nij so' quirij nij so' taga' manj a.

¹⁹ Tzaj ne cuta' ndo'o nij síj israelitá yo' cacun' xráj, ne che'é dan nó xcúnj cachinj nij'yáj rihaan síj cu'naj César se vaa ca'ne' so' cacun' che'ej a. Tzaj ne taj a' ló cacun' cuta' 'unj xráá soj sij man chiháán 'unj ma'.

20 Che'é dan canacúún 'un̄j man nij soj ca'na' soj, che'é se guun rá 'un̄j quene'én 'un̄j man soj do', ca'mii 'un̄j ga soj do' a. 'O se che'é síi ca'vee qui'yaj cavii sa' ní' sij israelitá me se n̄umií 'un̄j 'yaj aga' ne' nihánj adonj —taj Pabló rihaan yo'ó nij síi israelitá yo' a.

21 Gaa ne cataj nij so' rihaan Pabló a:

—Xa' nij tuvi' ní' síi yanj estadó Judea, tzaj ne taj yanj cartá ca'née nij so' rihaan n̄új nayaa n̄új ma'. Ne a 'ó tinúú ní' ne ca'na' rihaan n̄új nata' nana chi'ii che'é so' rihaan n̄új ma'.

22 Ne vaa che'é cataj ma'án so' rihaan n̄új daj uun rá so', rá n̄új a. 'O se tucuáán ino nocó' nij tuvi' nij soj me se ne'en n̄új se vaa me rej ma'an a'mii chi'ii yuvii che'é tucuáán yo' nanj á —taj nij so' rihaan Pabló a.

23 Dan me se cachrón nij so' güii ca'na' uún nij so' ve' yanj Pabló, ne güii yo' me se ca'na' que'ee tuvi' nij so' a. Gaa ne nata' Pabló rihaan nij so' che'é suun uun chij Diose nimán yuvii do', rihaan chumii nihánj vaa güii do' a. Ne nayaa so' se tucuanj síi cu'naj Moisés do', nana cachrón nij síi nata' se nana Diose rihaan yanj gaa naá do', ne cataj xna'anj so' me che'é no xcuún nij so' cuchuman rá nij so' cunó nij so' se nana Jesucristó a. Dan me se asij na'yaan guun che'e so' ca'mii so' rihaan nij so', ne ndaa ca'anj güii navij ca'mii so' a.

24 Ne ta'aj nij so' ro', cuchumán rá se nana so', ne yo'ó ta'aj nij so' ne cuchuman rá nana yo' ma'.

25 Ne ne guun cyaan rá cunudanj nij so' a ma'. Ne guun che'e nij so' ca'anj nij so' a. Tzaj ne gaa ataa ca'anj nij so', ne ca'mii Pabló orún' nana rihaan nij so', cataj so':

—Cunaj uxrá vaa nana nihánj nana rqué Nimán Diose rihaan xii ní' gaa ca'mii síi cu'naj Isaías síi nata' se nana Diose gaa naá rihaan nij so' a.

²⁶ Nana ca'mii Isaías rihaan nij so' me nana ca'mii ma'an Diose rihaan so' a: “Cuchi' so' rihaan nij so' ne cataj xna'anj so' rihaan nij so' se vaa catuu uxrá nana xréé nij so', tzaj ne se xcaj nij so' cuentá ma'. Ne ni'yaj uxrá nij so', tzaj ne se quene'en nij so' ma'.

²⁷ 'O se caráán ma'an nij yuvii nihánj rihaan nij so' che'é rej na'vej rá nij so' quene'en ma'an nij so', ne caráán nij so' xréé nij so', che'é rej na'vej rá nij so' cunō nij so' uún a. Ne ne atúj nana nimán nij so', 'yaj nij so', che'é yan na'vej rá nij so' xcaj nij so' cuentá ne canicaj nimán nij so' ma'. 'O se na'vej rá nij so' nahuun sa' nimán nij so' quí'yáá 'unj a man adonj”, me se nana Diose ca'mii síi cu'naj Isaías gaa naá a.

²⁸ Che'é dan xcaj soj cuentá se vaa aj ca'anj nana nihánj rihaan nij síi yaníj, ne nij so' me síi cuchuman rá se vaa tinanii Diose man nij so' rihaan chrej chí'ij uun chij nimán nij so' a. 'O se nij so' me síi cunō ya nana nihánj nanj á —taj Pabló rihaan nij síi uun chij rihaan nij yuvii israelitá yanj chuman' Romá yo' a.

²⁹ Síj ca'mii so' danj, gaa ne cavii nij yuvii israelitá yo' ca'anj nij so', ne ca'mii canó tuvi' ma'an nij so' ga tuvi' nij so' a.

³⁰ Dan me se vij ya yo' cayáán Pabló chuman' Romá yo', ne ma'an so' go' tu'vee ve' ne so' a. Ne ve'é ca'mii so' ga cunudanj nij síi ca'na' ni'yaj man so' a.

31 Ne ca'mii natáj so' che'é suun uun chij Diose
nimán yuviij do', rihaan chumiij nihánj vaa güii do',
ne tucu'yón so' se nana Jesucristó sij 'nij ra'a man
ní', ne a doj ne cuhu'vi' so', ne ne caráán nii chrej
rihaan so' qui'yaj so' danj a ma'.

**Se-nānā Diosē nanā sã' me rá catũũ nimán ní'
a
New Testament in Triqui, Copala (MX:trc:Triqui,
Copala)**

copyright © 1987 Wycliffe Bible Translators, Inc.

Language: Triqui, Copala

Translation by: Wycliffe Bible Translators, Inc.

Triqui, Copala [trc], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Triqui, Copala

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

3a8f2838-fe9f-5490-8d78-a7bbfddab871